



KUVENDI I KOMUNËS

Procesverbal nga mbledhja e XII-të (dymbëdhjetë), mandati VII-të, mbajtur më 30 qershor 2022, dhe vazhduar më 15 korrik 2022, (për shkak të ndërprerjes në mungesë të kuorumit).

Mbledhja filloi në orën 10;15 dhe u mbajt në sallën e mbledhjeve të Kuvendit të Komunës.

Mbledhjen e hapi dhe e kryesoi z.Hilmi Hoxha, Kryesues i Kuvendit.

Në mbledhje të pranishëm ishin të gjithë anëtarët/et e Kuvendit të Komunës së Podujevës, përveç; znj.Arjeta Abazi, znj.Donjetë Sheqiri, znj.Tringa Sfishta dhe z.Burim Hasani, që munguan.

Gjithashtu në mbledhje i pranishëm ishte z.Shpejtim Bulliqi, Kryetar i Komunës së Podujevës, znj.Marigona Lahu, Nënkryetare e Komunës, drejtorët e Drejtorive të Komunës.

Në mbledhje të pranishëm ishin edhe përfaqësues të mediave lokale, disa zyrtar komunal dhe një numër i qytetarëve.

Rendi i ditës

z.Hilmi Hoxha, Kryesues i Kuvendit, e hapi mbledhjen duke i përshëndetur të pranishmit dhe duke i'u dëshiruar punë të mbar në këtë mbledhje, konstatoi kuorumin, i njoftoj rreth konstatimeve të rekomanduara nga mbledhja e Komitetit për Politikë dhe Financa-KPF përfshirë edhe dy pikat shtesë të rekomanduara për përfshirje në rend të ditës.

Ftoj nëse ka të interesuar për të marrë fjalën rreth rendit të ditës.

z.Arjant Topanica, theksoi, lidhur me rendin e ditës do ta ngris një shqetësim se unë kam qenë pjesë e hartimit të planit të punës së kuvendit nga Grupi i këshilltarëve të LDK-së dhe me të gjitha të metat dhe mangësitë që kanë qenë në hartimin, përpilimin dhe miratim e atij plani unë shohë se në këtë rend të ditës janë heqë dy pika mjaftë të rëndësishme siç ka qenë informata mbi gjendjen e arsimit dhe raporti i auditorit të jashtëm.

Informatën rreth gjendjes së arsimit ne me qëllim e patëm lënë të jetë në fund të muajit qershor për arsye se përfundon edhe viti shkollor dhe jemi dakorduar që të kemi informatë nga DKA-ja mirëpo megjithatë se çfarë ka ngjarë kohët e fundit me këtë drejtori nuk po e shohë assesit të arsyeshme që kjo pikë të hiqet nga rendi i ditës.

Kryesuesi i Kuvendit, theksoi, kjo pikë nuk është tërheqë nga rendi i ditës sepse ka qenë vetëm e planifikuar, prezent këtu e kemi edhe drejtorin e DKA-së i cili mund të na japë sqarime mirëpo ende s'ka përfunduar viti shkollor në shkollat fillore, më konkretisht fjalën ia kalojmë drejtorit të DKA-së.

z.Avni Fetahu, U.D. drejtor i Drejtorisë së Arsimit-DKA, theksoi, sipas planit të punës në mbledhjen e muajit korrik unë do të raportoj rreth gjendjes në arsim, nëse ka ndryshuar diçka unë nuk e di.

z.Fatum Osmani, U.D. drejtor i Drejtorisë së Buxhetit dhe Financave-DBF, theksoi, sa i takon planit të punës që ka të bëjë me shqyrtimin e raportit të auditorit po jap një sqarim raporti final i auditorit ka ardhë të hënën prej zyrës së auditorit gjeneral dhe rrjedhimisht ne kemi mund të kalojmë këtë përmes KPF-së, por duke qenë se është një pikë mjaftë e rëndësishme kemi dashur të shkojmë në procedurë të rregullt në mënyrë që materiali asamblistëve t'i dërgohet 7 ditë para mbajtjes së mbledhjes së asamblesë komunale

kështu që nuk ka pasë mundësi për 2 ose 3 ditë të dërgohet materiali se normalisht ne jemi varur nga zyra e auditorit gjeneral, e mira është që është raport pozitiv.

z.Ragip Fetahu, theksoi, propozoj që sot në kuadër të rendit të ditës të hyjnë edhe dy pika, pika e parë është rregullorja për organizimin dhe bashkëpunimin e komunës me fshatra, vendbanime dhe lagje urbane në territorin e Komunës së Podujevës e cila ka muaj që i ka kaluar gjitha procedurat dhe është futur dikund në sirtarë dhe nuk e di se çfarë ka ndodhur me të dhe pse nuk po sillet në kuvend, janë disa rekomandime dhe disa çështje tjera të cilat brenda një ore mund të inkorporohen në rregullore.

Bazuar në ligjin për vetëqeverisjen lokale, rregulloren e kuvendit të komunës si dhe udhëzimin administrativ të MPL-së nr. 05/2020, propozoj që të futet si pikë e rendit të ditës formimi i komisioneve tjera, komiteteve tjera në kuadër të kuvendit komunal e që janë, komiteti për shëndetësi dhe mirëqenie sociale, komiteti për barazi gjinore dhe komiteti për zhvillim ekonomik.

Janë komitete të cilat po e prolongojnë punën e kuvendit dhe ne si asamblistë nuk mund të japim kontributin tonë pa këto komitete mirëpo mund të ketë edhe komitete tjera që mund të propozohen nga kolegët dhe me një fjalë propozoj që këto pika të hyjnë si pika të rendit të ditës e që s'kanë të bëjnë me çështje politike por me interes të përgjithshëm të qytetarëve.

z.Shpejtim Bulliqi, Kryetar i Komunës, theksoi, për faktin që z.Halil Kastrati përmes shoqatës së tij “Jetimat e Ballkanit”, deri më tani në komunën tonë ka ndërtuar më shumë se 72 shtëpi për familjet në nevojë, andaj duke marrë parasysh faktin që një numër i komunave në nivel vendi në emër të ndihmave që ka bërë për ndërtimin e shtëpive për familjet në nevojë z.Halil Kastrati e kanë shpallë qytetar nderi, unë propozoj që si pikë të veçantë të rendit të ditës në këtë seancë të fillojmë procedurën për marrjen e vendimit për shpallje të z.Halil Kastrati qytetar nderi i Komunës së Podujevës sepse puna dhe angazhimi i tij i jashtëzakonshëm që ka bërë për komunën tonë meriton që këtë person ta kemi qytetar nderi të Komunës së Podujevës.

Vlera e gjithmbarshme e këtyre objekteve që janë ndërtuar në komunën tonë i kalon vlerat milionëshe prandaj mendoj se me këtë vendim që do ta merr kjo assemble e kuvendit besoj se i bëjmë nder veti por i bëjmë nder edhe qytetarëve por në veçanti një nder të madh ia bëjmë atyre të cilët kanë përfituar nga këto ndihma të mëdha të cilat i ka bërë z.Halil Kastrati, ky person është duke bashkëpunuar me komunën tonë madje i kemi edhe disa projekte të cilat shpresojmë se së shpejti do të fillojnë në procesin e realizimit të tyre prandaj unë mendoj se është mirë që sot ta vejmë në rend të ditës çështjen e shpalljes z.Halil Kastrati qytetar nderi i Komunës së Podujevës.

z.Gazmend Islami, theksoi, meqenëse kryetari po kërkon që të shpallet qytetar nderi z.Halil Kastrati natyrisht që ne e përkrahim këtë ide sepse është në të mirën e të gjithë neve por po më vjen shumë keq që ende qyteti i Podujevës nuk e ka asnjë rrugë dhe asnjë shesh me emrin e “Adem Demaçit”, pra po më vjen shumë keq dhe po ndihem shumë i turpëruar që ne çdo herë po harrojmë figurat më madhore që kanë dhënë çdo gjë për këtë vend e sidomos për rajonin tonë e që ende për asnjë rrugë asnjë shesh komuna jonë nuk e ka marrë mundin as për pesë minuta të mendoj për këtë çështje edhe pse më duket se është bërë një kërkesë nga shoqatat e dal nga lufta dhe ka ardhë në adresë të komunës.

Është mirë që edhe në komunën tonë ta kemi një shesh së paku kur njerëzit vijnë ta vizitojnë Podujevën ta dinë se “Adem Demaçi” është Llapjan dhe është një ikonë kombëtare e që besoj se duhet ta përkrahim gjithë asamblistët këtë propozim prandaj nga drejtoria përkatëse kisha kërkuar ta ketë parasysh këtë dhe ta merr si iniciativë dhe në qoftë se nuk kemi mjete të mjaftueshme mundemi të gjitha bizneset së bashku të ndajmë mjete financiare dhe një vend ku ata vizitorë që vijnë e vizitojnë qytetin tonë ta kenë mundësinë ta shohin shtatoren e “Adem Demaçit”, që i ndjeri ka qenë shtyllë kryesore të shtetit tonë.

Kryesuesi i Kuvendit, theksoi, desha t'i përgjigjem këshilltarit z.Ragip Fetahu për dy pyetjet të cilat i bëri apo për dy kërkesat e tij, ne si kuvend jemi të ngarkuar me pika të rendit të ditës dhe kjo ka qenë arsyeja pse formimi i komiteteve nuk ka hyrë si pikë e rendit të ditës, arsye kjo se ne edhe në mbledhjen e KPF-së

e pamë se dy pika nuk u miratuan që të kalojnë në kuvend me të vetmin arsyetimin se rendi i ditës po ngarkohet me shumë pika edhe këtë propozim ne e kemi në plan të punës dhe në seancën e ardhshme ne do t'i formojmë këto komitete.

Sa i përket Rregullores për organizimin dhe bashkëpunimin e komunës me fshatra, vendbanime dhe lagje urbane në territorin e Komunës së Podujevës drejtorja e administratës është në përfundim e sipër dhe besoj se së shpejti këto dy pika të rendit të ditës do të procedohen në kuvend.

z.Ragip Fetahu, theksoi, i nderuari z.kryesues nuk janë pyetje por janë propozime që të hidhen në votim këto dy pika.

Kryesuesi i Kuvendit, theksoi, i nderuar këshilltar z.Ragip Fetahu janë disa procedurat që duhet të ndiqen për tu proceduar si pika të rendit të ditës në kuvend këto propozime.

z.Ragip Fetahu, theksoi, është e drejtë e një asamblisti që të propozoj pika të rendit të ditës.

znj.Antoneta Ejupi, U.D. drejtoresh e Drejtorisë së Administratës-DA, theksoi, dua t'ju njoftoj se ne si pjesë e ekzekutivit i kemi kryer të gjitha punët që varen nga ne, vetëm jemi duke e pritur një përgjigje nga ana e Ministrisë së Administrimit të Pushtetit Lokal.

Për shkak të mungesës së dispozitave ligjore dhe nënligjore lidhur me rregullimin e procedurës për shkak të ndryshimit të strukturës së asamblesë kemi pyetur në qoftë se kjo draft rregullore mund të vije në asamble si pikë për miratim ashtu siç është ose duhet të fillohen procedurat edhe njëherë prej fillimit dhe të formohet komisioni dhe të mbahen edhe njëherë dëgjimet publike dhe të vendoset si draft rregullore, mirëpo deri në kthimin e një përgjigje nga ana e ministrisë ne nuk mund të marrim veprime tjera.

z.Ragip Fetahu, theksoi, e nderuara drejtoreshë kjo rregullore ka qenë e planifikuar që të kalojë në muajin maj dhe ne tani jemi në fund të muajit qershor dhe mendoj se këto justifikime të tilla unë nuk po i kuptoj andaj mendoj se propozimi im duhet të hyjë si pikë e rendit të ditës në qoftë se është në kundërshtim me rregullativën ligjore është MAPL-ja, që e jep vendimin përfundimtar dhe të kisha sugjeruar që të merresh me këtë çështje dhe t'i shikosh ato rekomandime që i kanë dhënë qytetarët e të njëjtat t'i inkorporosh në rregullore dhe të na e sjellësh rregulloren në kuvend.

znj.Antoneta Ejupi, U.D. drejtoresh e DA-së, theksoi, rekomandimet të cilat i kemi pranuar nga ana e qytetarëve nuk janë në përputhje me udhëzimin administrativ i cili përcakton se sa këshilla lokale të fshatrave, vendbanimeve dhe lagjeve urbane duhet të jenë për këto arsye ato rekomandime nuk mund të merren parasysh dhe rregullorja nuk mund të krijohet në bazë të tyre, për këtë arsye ne jemi në komunikim me ministrinë dhe së shpejti do të jetë si pikë e rendit të ditës.

z.Pajtim Balaj, U.D. drejtor i Drejtorisë së Kulturës Rinisë dhe Sportit-DKRS, theksoi, në lidhje me propozimin e këshilltarit z.Gazmend Islami për shtatoren në sheshin "Adem Demaçi", sigurisht që unë e mirëpres idenë dhe propozimin e tij mirëpo në planifikimet buxhetore që i kemi e kemi të pamundur që këtë vit të ndërmarrim diçka, aktualisht ne kemi bërë një kërkesë të cilën ia kemi dërguar ministrisë për vendosjen e shtatores së legjendës së futbollit "Fadil Vokrri", pasi që paraprakisht ka një vendim të kuvendit komunal të vitit 2020 nëse nuk gaboj për vendosjen e shtatores.

Në këtë fazë po merremi me vendosjen e shtatore së legjendës së futbollit "Fadil Vokrri", mirëpo edhe ideje dhe propozimi juaj që në të kaluarën ka qenë edhe propozim i LVV-së është e mirëseardhur dhe besoj se ne mund të takohemi të diskutojmë dhe ta gjejmë një mënyrë se si ta realizojmë këtë sa më shpejt.

z.Adnan Zymeri, theksoi, vetëm desha të ndërlidhem me çështjen e propozimit të asamblistit z.Ragip Fetahu, është mirë që propozimi i tij të hidhet në votim, zakonisht nuk është e preferuar që të diskutohet për pikat e rendit të ditës përderisa hidhen në votim, hidhen propozimet në votim, kalojnë ose nuk kalojnë si pika të rendit të ditës, nëse kalojnë si pika të rendit të ditës jepen sqarimet ashtu siç i dha drejtoresha e DA-së dhe kalojnë si pika të rendit të ditës këtu nuk ka asgjë të keqe dhe se di pse po ndalemi tani në këtë fazë për të diskutuar për këtë çështje se a të hyjnë ose jo propozimet si pika të rendit të ditës.

Kryesuesi i Kuvendit, theksoi, të gjithë ne e dimë se pikat e rendit të ditës ne si kuvend i miratojmë pastaj këto vendime që i marrim ne kalojnë për vlerësim të ligjshmërisë në MAPL, dhe nëse këto vendime pas vlerësimeve të ligjshmërisë kthehen si vlerësime negative atëherë ne si kuvend nuk dalim mirë.

Ne kemi rastin si kuvend kur kemi mbajtur mbledhje të jashtëzakonshme dhe kemi marrë vendim për ndarjen e 70,000.00€ për ndarjen e pakove ushqimore për familjet në gjendje të rëndë ekonomike dhe sociale mirëpo ende nuk kemi marrë ndonjë përgjigje pozitive nga ana e ministrisë përkatëse.

Ne mund të marrim ndonjë vendim që nuk është në përputhje me ligjin dhe nga MAPL-ja do të marrim vlerësim negativ të ligjshmërisë kështu që nuk është e nevojshme të shkelim ndonjë procedurë ligjore prandaj kjo është arsyeja sepse neve asgjë nuk na pengon miratimi i rregullores për organizimin dhe bashkëpunimin e komunës me fshatra, vendbanime dhe lagje urbane në territorin e Komunës së Podujevës por vetëm duhet t'i përfillim procedurat ligjore.

z.Naim Çunaku, theksoi, e kam potencuar edhe në mbledhjen e KPF-së se është një praktikë që po vazhdon në kuvendin tonë kur dihet se kush e bënë rendin e ditës në bashkëpunim me kë dhe nuk janë larg zyrat mes katit të dytë dhe katit të tretë dhe ka qenë mirë para se të vije rendi i ditës të shqyrtohen gjitha kërkesat dhe nevojat për ta pasuruar ose për të qenë pjesë e rendit të ditës.

Kjo forma që është kah na ndodh ne pasi që ta marrim materialin të na vijë edhe ka 5-6 ose 7-8 pika në një formë po bëjmë një anashkalim apo ndonjë shkelje, unë e di që ka momente të caktuara që puna apo urgjenca e një projekti e krijon një situatë që të bëhen lëshime këso fare mirëpo të thuhet sot po të përgjigjem unë ty për diçka që e ke në plan të punës së kuvendit, ne këtu nuk jemi për të bërë pyetje ty i nderuari kryesues e as me marrë përgjigje nga ti, kuptojë që ju jeni kryesues i seancës, kuptojë që propozimet tona dhe propozimet për çdo njërin që vijë nga ne dhe për të gjitha këto vendos kuvendi.

Ju si kryesues në foltore mund të dilni dhe të flisni në cilësinë e këshilltarit por nuk mund të na jepni përgjigje për gjërat që nuk janë në domenin e juaj, më bëri përshtypje rregullorja për organizimin dhe bashkëpunimin e komunës me fshatra, vendbanime dhe lagje urbane në territorin e Komunës së Podujevës, është e vërtetë se ka qenë në planin e punës, ai plan i punës e dini qysh ka ardhë e qysh ka kaluar edhe atëherë është bërë shumë mirë që dikush me shumicë votash ka arritur që ta kalojë pa e ditur që mund të sjellë probleme siç po ne sjellë edhe sot.

Propozimin e kolegut z.Ragip Fetahu sa unë e kuptova ishte që sot të jetë pikë e rendit të ditës vendimmarrja për rregulloren për organizimin dhe bashkëpunimin e komunës me fshatra, vendbanime dhe lagje urbane në territorin e Komunës së Podujevës, me gjithë respektin drejtoresha e DA-së u lëshua në diçka që kemi propozime që nuk mund t'i inkorporojmë sepse nuk i lejon udhëzimi administrativ që ato propozime t'i integrojmë si pjesë integrale e asaj rregulloreje.

Drejtoreshë propozimet nuk e ndryshojnë udhëzimin administrativ, propozimet çka do që janë në kundërshtim me udhëzimin administrativ hedhen si të pa baza me një shpjegim që nuk i lejon udhëzimi administrativ, sa i përket propozimit të kryetarit që të fillojnë procedurat për shpalljen qytetar nderi z.Halil Kastrati, për kontributin e tij për mirëqenien e familjeve në nevojë edhe ky propozim ka mund të vijë në procedurë të rregullt por si do qoftë është diçka që s'kërkon material dhe procedurat mund të fillojnë dhe me këtë po e përmbylli.

Ne si grup i këshilltarëve të LDK-së i mbështesim dy propozimet edhe pse s'kisha dashur që kjo praktikë të vazhdojë sepse duhet të ndalet e mos të ngarkohet rendi i ditës pa materiale përcjellëse se edhe ashtu siç e përmendi kryesuesi se kemi pasur takime me agjendë të ngarkuar prandaj nuk na ndalon askush që brenda muajit të mbahen 2 ose 3 seanca dhe dihet kufiri ligjor qysh i kemi seancat dhe pagesat se as nuk shtohen e as nuk hiqen dhe nuk na ndalon askush mbajtjen e dy seancave brenda një muaji, plani i punës së kuvendit qysh prej ditës së parë ka mbetë vetëm diçka në letër se nuk i është përmbajtur asgjë askush askujt.

z.Bashkim Syla, theksoi, të gjithë e dimë se çdo asamblist ka të drejtë të propozoj pika të rendit të ditës, është mirë të shkohet sipas procedurave të rregullores dhe të marrim qëndrimin e partive politike përmes shëfave të grupeve të tyre dhe kështu ai propozim mund të kaloj ose jo si pikë e rendit të ditës.

Ne grupi i këshilltarëve të PDK-së, e përkrahim fillimin e procedurave për shpalljen qytetar nderi humanistin z.Halil Kastrati, kurse sa i përket këtyre dy pikave tjera ne nuk jemi kundër por kisha dashur të kemi material dhe të jemi më të përgatitur përndryshe propozimin e kryetarit e përkrahim kurse për këto dy propozimet tjera nuk kemi informacion.

z.Shpejtim Bulliqi, Kryetar i Komunës, theksoi, sa i përket propozimit tim që e ceku parafolësi im z.Naim Çunaku, për shpalljen e z.Halil Kastrati qytetar nderi të Komunës së Podujevës është e vërtetë se ky propozim ka mundur të kaloj përmes procedurës së rregullt mirëpo për këtë procedurë nuk ka ndonjë material të veçantë andaj besoj se mund t'i fillojmë procedurat për kompletimin e lëndës deri në mbajtjen e mbledhjes solemne për shpalljen z.Halil Kastrati qytetar nderi të Komunës së Podujevës.

Sa i përket Rregullores për organizimin dhe bashkëpunimin e komunës me fshatra, vendbanime dhe lagje urbane në territorin e Komunës së Podujevës, ju jeni dëshmitar që me të vërtetë në këtë drejtim kemi mbetur keq sepse kemi disa kryetar të fshatrave të cilëve bukur gjatë iu ka skaduar mandati dhe ata janë në një situatë jo të favorshme lidhur me punët të cilat duhet t'i përfundojnë dhe do të ishte shumë e rëndësishme që ky proces të përfundoj sa më shpejt, në vazhden e kësaj problematike unë dje kam zhvilluar një takim me zyrtarët e MAPL-së, dhe në atë takim kemi ardhë deri te disa përfundime për të cilat mendoj se është mirë të na jepet pak kohë që së bashku me Drejtorinë e Administratës t'i inkorporojmë disa gjëra të cilat janë të nevojshme t'i ndryshojmë.

Po u jap vetëm një shembull se si janë përfshi në një këshill lokal fshatrat që kanë numër të madh të banorëve me fshatra tjerë e që mendoj se kjo është një praktikë jo e duhur sepse fshatrat Gllamnik, Obrançë, Peran, Llapashticë e Epërme, Llapashticë e Poshtme, duhet me qenë fshatra që kanë një këshill lokal e faktikisht kjo është e pa mundur, se si ka ndodhur mos përfshirja e tyre në një këshill lokal unë nuk e di por kur ne kemi filluar ta përgatisim draft rregulloren për ta sjellë në kuvend kanë dalë disa gjëra që praktikisht janë të pa mundura të realizohen sepse është problem zgjedhja e një kryetari të këshillit lokal të fshatrave që kanë numër të madh të banorëve, gjatë bisedimeve me zyrtarët e MAPL-së kam paraqitur këtë problem dhe nga ana e tyre kam marrë disa instruksione se si duhet të veprohet prandaj besoj se në një mbledhje të radhës të kuvendit qoftë mbledhje e rregullt apo e jashtëzakonshme ne mund ta përgatisim materialin me gjitha propozimet, përmirësimet që mund të bëhen mirëpo gjithherë duke respektuar numrin e përcaktuar të këshillave lokale të fshatrave, vendbanimeve dhe lagjeve urbane të përcaktuar sipas rregullatives ligjore në fuqi.

Besoj se për seancën e radhës të gjithë mund të përgatitemi dhe t'i dërgojmë materialet me kohë në mënyrë që ta analizoni edhe ju dhe në fund të vini me sugjerime, në qoftë se sot ne e fusim këtë propozim si pikë të rendit të ditës kam frikë se nga MAPL-ja do të marrim vlerësim të ligjshmërisë me gabime pastaj do të duhet të kthehemi edhe njëherë mbrapa për përmirësimin e tyre prandaj unë mendoj se së pari ne duhet të pasqyrojmë një përfshirje sa më reale të këshillave lokale të fshatrave, vendbanimeve dhe lagjeve urbane pastaj ta procedojmë këtë draft rregullorë në kuvend për mbledhjen e radhës, nëse kuvendi mendon ndryshe atëherë mund ta procedojë draft rregulloren aktuale por ta dini se për themelimin e këshillave lokale të fshatrave, vendbanimeve dhe lagjeve urbane sipas kësaj draft rregulloreje do të paraqiten vështirësi në funksionimin praktik të tyre.

Kohë më parë ne organizimin e fshatrave e kemi pasë në bashkësi lokale dhe të gjitha ato fshatra që kanë qenë në një bashkësi lokale kanë pasë një shtrirje gjeografike mes veti por jo si në këtë formë të organizimit të këshillave lokale të fshatrave, vendbanimeve dhe lagjeve urbane, sipas kësaj draft rregulloreje ta marrim shembull kemi këshillin lokal të fshatit Dyz me disa fshatra tjerë që nuk kanë lidhje gjeografike mes veti atëherë praktikisht ky këshill lokal nuk funksionon prandaj për themelimin e çdo

këshilli lokal të fshatrave, vendbanimeve dhe lagjeve urbane ne duhet domosdoshmërisht ta përfillim shtrirjen gjeografike dhe lidhjen e tyre mes vete në mënyrë që me qenë pragmatikë dhe të kapshëm për qytetarin dhe që mund të zgjidhin probleme, por nëse ju mendojnë se duhet të kaloj kjo draft rregullore atëherë le të kaloj por unë mendoj se është një draft rregullore e pa përgatitur dhe pas votimit të saj në këtë kuvend do ta shohim se praktikisht zbatimi i saj në terren është i pa mundur, prandaj i nderuari i këshilltar z.Ragip Fetahu dhe ju asamble e nderuar është mirë që të na jepet edhe pak kohë që t'i bëjmë edhe disa ndryshime të vogla aty ku është e mundshme dhe ta kemi draft rregulloren e përgatitur për seancën e radhës, kurse sa i përket pikave të rendit të ditës sipas planit të punës së kuvendit ato nuk janë statike mund të lëvizin nga pak po thuajse po lëvizin pikat e rendit të ditës në të gjitha nivelet the thuajse është e pa mundur t'i harmonizosh gjitha nivelet me gjitha periudha kohore.

z.Ragip Fetahu, theksoi, me gjithë respektin për mendimin e kryetarit mendoj prapë se kjo pikë e rendit të ditës duhet të hyjë pa tjetër për shkak se kanë kaluar të gjitha fazat dhe kjo rregullore ka kaluar përmes ekzekutivit dhe të gjitha çështjet e inkuorporuar janë përmes ekzekutivit dhe kanë ardhë te ne .

Mendoj se është mirë kjo pikë të hyjë në rend dite dhe të diskutohet për të gjitha ato çështje të cilat po i potencon edhe kryetari me ndryshime të mundshme të kalohet kjo rregullore e mos të humbim kohë në mënyrë që në muajin shtator të fillojmë me procedura tjera.

z.Haki Rudari, theksoi, duke u bazuar në rregulloren e punës së kuvendit të datës 29.04.2010, neni 35 paragrafi 1 thotë grupet e këshilltarëve, këshilltarët dhe përfaqësuesit e trupave punuese të kuvendit përkatësisht komiteteve dhe komisioneve e kanë të drejtën të propozojnë ndryshimin apo plotësimin e rendit të ditës me arsyetim të shkurt të propozimit të paraqitur, pra e kanë të drejtën e propozimit me arsyetim, neni 36 paragrafi 2 thotë, kuvendi vendos veç e veç për çdo propozim për ndryshimin apo plotësimin e rendit të ditës, pastaj në paragrafin 3 të nenit 36 thuhet së pari sipas radhës së paraqitur shqyrtohen propozimet që ndonjë çështje e propozuar të hiqet nga rendi i ditës.

Fillimisht me rregullore nëse ka propozim duhet të votohet që të largohet nga rendi i ditës ndonjë pikë pastaj vjen propozimi për shtim të pikave të rendit të ditës, neni 37 paragrafi 1 thotë për propozimet lidhur me ndryshimin apo plotësimin e rendit të ditës nuk hapet debat por pas arsyetimeve të shkurta të propozuesit dhe sqarimeve të kryesuesit të kuvendit, përfaqësuesit të ekzekutivit apo propozuesit të çështjes konkrete kalohet në votim, unë në parim i mbështes propozimet e kolegut z.Ragip Fetahu por në të njëjtën kohë unë do të ndalem te formimi i komisioneve, është e paraparë me ligjin për vetëqeverisje lokale madje e kam të përgatitur edhe nenin, janë të parapara edhe me rregullore dhe udhëzimin e ri administrativ formimi i këtyre komiteteve.

Realisht jemi vonuar si kuvend komunal për formimin e këtyre komiteteve, duhet ta pranojmë se ne jemi në fund të muajit qershor, në të njëjtën kohë sa i përket rregullores për organizimin dhe bashkëpunimin e komunës me fshatra, vendbanime dhe lagje urbane në territorin e Komunës së Podujevës duhet të ndalemi pak më shumë dhe nuk duhet të ngutemi për arsye se në rregulloren që ne kemi pasur më herët kanë qenë 3-4 fshatra me një përfaqësues që realisht dhe praktikisht është problematikë që të zbatohet prandaj në këtë rast unë propozoj që të thirren përfaqësuesit apo shefat e grupeve të këshilltarëve të subjekteve politike që janë të përfaqësuara në kuvend në mënyrë që formimi i komiteteve të përhershme mos të neglizhohet por të kalon për miratim së paku të jetë i përgatitur për seancën e ardhshme, duhet të merremi vesh për numrin e komiteteve, pastaj duhet të merremi vesh për ndarjen e tyre në bazë të përfaqësimit dhe fuqisë politike, numrin e mbledhje brenda një viti e që numri maksimal është 6 dhe pagesa që rregullohet në bazë të rregullores dhe ligjit për financat.

z.Naim Çunaku, theksoi, te formimi i komiteteve të përhershme apo konsultative si trupa ndihmëse të kuvendit është e vërtetë se ne jemi vonuar më tepër se 6 muaj dhe është e vërtetë e madhe se ato trupa ndihmëse të kuvendit në rend të parë kishin me hy në punë dhe do ta lehtësonin punën e kuvendit.

Unë qysh në fillim kur e kemi pasë projekt buxhetin e kam tërheqë vërejtjen nga ajo foltore që ne as me kod buxhetor të kuvendit nuk kemi parapa mjete për formimin e atyre komiteteve, sot nga ajo që e potencoj kolegu z.Haki Rudari si të nevojshme dhe procedurat e formimit të komiteteve është një udhëzim administrativ që taksativisht e parasheh qysh formohen ato komitete, sot do të kishim mundur të marrim vetëm një vendim për themelimin e tyre ndërsa shefat e grupeve dhe ato procedurat tjera si të arrijmë deri te një bashkëpunim të të gjithë anëtarët e kuvendit mund të diskutohen me grupe të këshilltarëve në një takim të radhës, por vendimi duhet të merret paraprakisht për themelimin e atyre komiteteve.

z.Ragip Fetahu, theksoi, është një udhëzim administrativ nr.05/2020, i miratuar në fund të vitit 2020, në këtë udhëzim administrativ përcaktohen qartë detyrat dhe përgjegjësitë e komiteteve tjera dhe përcaktohet shumë qartë si të zgjidhen ato, aty ndër të tjera thuhet se një komitet tjetër duhet t'i ketë maksimumi 5 anëtar, duhet të zgjidhet kryesuesi i secilit komitet dhe të vazhdohet tutje, këtu nuk ka ndonjë arsye ligjore që kjo çështje të mbetet për seancat tjera.

z.Gazmend Islami, theksoi, unë nuk po marrë kohë shumë vetëm 30 sekonda, u kam sjellë nga një dhuratë këtyre qeveritarëve tanë që ta mbajnë në kornizë nga një fotografi të bukur, këto janë fotografitë që i kam bërë dhe te shkollat e mesme të komunës sonë, pra vetëm nga një fotografi po ua japë për kujtim duke filluar nga kryetari me koseret që i ka pasë ble shumë të shtrenjta.

Gjendje e mjerueshme dhe e turpshme të shkosh e të hysh në oborret e shkollave të mesme “Aleksandër Xhuvani” dhe “Fan S. Noli”, nuk po flas politikisht, por le të shkon kryetari vet le të bënë një ekip dhe le ta sheh atë gjendje, unë rastësisht kam shkuar dhe veç me shëtitë dhe çka kam parë aty, ndoshta jam i gatshëm një javë të shkojë e të punoj aty, kushdo le të vijë, qoftë edhe kryetari, unë pas tij do të shkoj vetëm mos me pa atë gjendje, sepse po të vijë ndokush në komunën tonë, ndonjë mik i imi apo kushdo qoftë dhe ta shohë atë gjendje vërtetë është e turpshme, kryetari duhet t'i di këto gjëra sepse kjo është pronë e jona dhe është e turpshme nëse shkon ndokush dhe e sheh atë gjendje.

z.Shpejtim Bulliqi, Kryetar i Komunës, duke i'u përgjigjur parafolësit e sugjeroj të mos e keqpërdor foltoren sepse është duke u diskutuar për rendin e ditës.

z.Gazmend Islami, vazhdoi duke i'u përgjigjur Kryetarit të Komunës, në rregull ti je në rend dite, mirëpo unë e kam fjalën për momentin.

z.Shpejtim Bulliqi, Kryetar i Komunës, kërkoj nga Kryesuesi të respektohet rregullorja e punës së kuvendit, dhe në këtë rast t'i ndërpritet fjala.

z.Gazmend Islami, duke i'u drejtuar Kryetarit vazhdoi, askush nuk mund të më ndaloj fjalën mua, ama bash hiç, nga ti dhe drejtori përkatës është poshtërsia më e madhe që mund t'ia bëni kësaj komune, mirëpo nëse ti vazhdon me sjellje të tilla duke i marr këto si personale, është punë e juaja.

Kryesuesi i Kuvendit, theksoi, i nderuari këshilltar z.Gazmend Islami nuk ke nevojë me keqpërdor foltoren se ne jemi duke diskutuar për rendin e ditës dhe për këtë është pika të ndryshme.

z.Bashkim Sylja, theksoi, i nderuari kryesues e ndal debatin rreth kësaj çështje dhe i hedh propozimet në votim dhe cili propozim të kalon le të kaloj s'ka debat këtu.

Kryesuesi i Kuvendit, theksoi, atëherë nëse nuk dëshiron askush ta marr fjalën e vë në votim propozimin e z.Ragip Fetahu për themelimin dhe përbërjen e Komiteteve tjera të Kuvendit të Komunës.

Pas votimit, Kryesuesi i Kuvendit konstatoi se nga 31 anëtar/e të Kuvendit sa ishin prezent në sallë, me 15 vota PËR, 14 vota KUNDËR dhe 1 votë e PËRMBAJTUR, mbështetet propozimi për përfshirje në kuadër të rendit të ditës themelimin dhe përbërjen e Komiteteve tjera të Kuvendit të Komunës.

Kryesuesi i Kuvendit, theksoi, edhe një sqarim kërkoj nga këshilltari z.Ragip Fetahu, sa i përket rregullores për organizimin dhe bashkëpunimin e komunës me fshatra, vendbanime dhe lagje urbane në territorin e Komunës së Podujevës.

z.Ragip Fetahu, theksoi, i nderuari kryesues propozimin e parë që e hedhe në votim është formimi i komiteteve tjera që u votua dhe kaloj, propozimi i dytë ishte për rregulloren për organizimin dhe bashkëpunimin e komunës me fshatra, vendbanime dhe lagje urbane në territorin e Komunës së Podujevës e cila nuk ka kaluar ende në votim, tani presim që të vihet në votim.

Kryesuesi i Kuvendit, theksoi, rregulloren për organizimin dhe bashkëpunimin e komunës me fshatra, vendbanime dhe lagje urbane në territorin e Komunës së Podujevës ne nuk mund ta hedhim në votim se ende procedura administrative nuk kanë përfunduar.

z.Ragip Fetahu, theksoi, unë nuk insistoj që pa tjetër të votohet kjo rregullore, me hyrjen e këtij propozimi në rend dite drejtoresha e Drejtorisë së Administratës duhet ta sjellë materialin, rregulloren, rekomandimet dhe me kalimin e saj ne do të diskutojmë për ndryshimet për të cilat propozon edhe kryetari dhe të gjithë ne dhe nuk po hyjmë domosdoshmërisht ne në votim.

z.Bahri Selimi, U.D. drejtor i Drejtorisë së Shërbimeve Publike Mbrojtjes dhe Shpëtimit-DSHPMSH, theksoi, i nderuari asamblist z.Ragip Fetahu sa i përket plotësim ndryshimeve të mundshme në këtë draft rregullore ne ato sot nuk mund t'i votojmë sepse kjo rregullore i ka kaluar të gjitha procedurat administrative që i takojnë një rregulloreje, ka dalë në dëgjim publik, dëgjimi publik është ai i cili i bënë ndryshimet dhe i sjellë propozimet pastaj merret një vendim tjetër dhe sot këtu duhet me qenë i qartë se çfarë po kërkon që të votohet, a po kërkon të votohet rregullorja në tërësi apo po kërkon vendim, s'ka vendim këtu, të gjitha procedurat janë të përfunduara vetëm rregullorja pritet të votohet me disa rekomandime që duhet të vijnë prej MAPL-së.

Fillimisht duhet të qartësohet ajo se çka po doni të votohet sot vendim të rregullores, rregullore, apo këshilla të fshatrave sepse janë procedurat për themelimin e këshillave të fshatrave vendbanimeve dhe lagjeve urbane prandaj këto nmuk mund të themelohen pa formimin e komisioneve shtesë, kur të merret vendimi përfundimtar për rregulloren atëherë bëhen komisionet që dalin prej kësaj trupe dhe ai komision merret pastaj me formimin e këshillave të fshatrave, vendbanimeve dhe lagjeve urbane, prandaj nga ta kemi të qartë se çka po votojmë e mandej të dalim shumë serioz para qytetarëve për punën që është duke u bërë për këtë rregullore.

z.Ragip Fetahu, theksoi, mendoj se jam shumë i qartë, thjeshtë ajo rregullore që ka ardhë prej ekzekutivit të hyjë sot si pikë e rendit të ditës dhe të gjitha rekomandimet e bëra gjatë gjitha fazave të inkorporohen në të nga drejtoresha e DA-së, unë nuk e di pse nuk është procedura më herët kjo rregullore në kuvend për votim.

Kryesuesi i Kuvendit, theksoi, prapë i nderuari këshilltar z.Ragip Fetahu nuk e keni qartësuar këtë çështje, ne s'kemi për çka të diskutojmë, çka doni të vihet në votim konkretisht.

z.Ragip Fetahu, theksoi, po e formuloj fjalinë edhe njëherë propozimi im ishte që rregullorja për organizimin dhe bashkëpunimin e komunës me fshatra, vendbanime dhe lagje urbane në territorin e Komunës së Podujevës të hyjë si pikë e rendit të ditës.

Pas votimit, Kryesuesi i Kuvendit konstatoi se nga 31 anëtar/e të Kuvendit sa ishin prezent në sallë, me 14 vota PËR, 11 vota KUNDËR dhe 3 vota të PËRMBAJTUR, mbështetet propozimi për përfshirje në kuadër të rendit të ditës draft Rregullorja për organizimin dhe bashkëpunimin e Komunës me fshatra, vendbanime dhe lagje urbane në territorin e Komunës së Podujevës, përkatësisht dokumenti dhe materiali tjetër shtesë sipas draftit të fundit që nga Kuvendi i Komunës më 29 prill 2021 është përkrahur për diskutim publik.

Kryesuesi i Kuvendit, theksoi, e kemi edhe propozimin e Kryetarit që të përfshihet në kuadër të rendit të ditës shpallja e z.Halil Kastrati “Qytetar Nderi” i Komunës së Podujevës.

Pas votimit, Kryesuesi i Kuvendit konstatoi se njëzëri, me 27 vota PËR, nga anëtarët e Kuvendit sa ishin prezent në sallë, mbështetet për përfshirje në kuadër të rendit të ditës propozimi i Kryetarit të Komunës për shpalljen e z.Halil Kastrati “Qytetar Nderi” i Komunës së Podujevës.

Kryesuesi i Kuvendit, vazhdoi, tani e vë në votim rendin e ditës që të miratohet në tërësi, sipas thirrjes dhe materialit përkatës të kësaj mbledhje, përfshirë edhe konstatimet e rekomanduara nga mbledhja e Komitetit për Politikë dhe Financa nga e cila janë rekomanduar edhe dy pika shtesë, dhe atë;

- Propozim Vendimi për caktimin e lokacionit për ndërtimin e Pishinës gjysmë Olimpikë në Podujevë.
- Propozimi i Drejtorisë së Arsimit për ndryshimin e Statusit të SHMLT “Fan S. Noli” dhe SHMLE “Isa Boletini”, nga Shkolla të Mesme të Larta Profesionale-SHMLP në Institucione të arsimit dhe Aftësimi Profesional-IAAP, duke përfshirë edhe dy pikat shtesë të mbështetura nga shumica e anëtarëve të kuvendit për përfshirje në kuadër të rendit të ditës, dhe atë; Propozimi për themelimin dhe përbërjen e Komiteteve tjera të Kuvendit të Komunës.(varësisht propozimeve që do të përkrahen gjatë shqyrtimit të kësaj pike). Draft Rregullorja për organizimin dhe bashkëpunimin e Komunës me fshatra, vendbanime dhe lagje urbane në territorin e Komunës së Podujevës.

Pas votimit, Kryesuesi i Kuvendit konstatoi se nga 27 anëtar/e të Kuvendit sa ishin prezent në sallë, me 24 vota PËR, asnjë votë kundër, dhe 3 vota të PËRMBAJTURA, miratohet në tërësi rendi i ditës, sipas thirrjes dhe materialit përkatës të kësaj mbledhje, përfshirë edhe konstatimet e rekomanduara nga mbledhja e Komitetit për Politikë dhe Financa nga e cila janë rekomanduar edhe dy pika shtesë, dhe atë;

- *Propozim Vendimi për caktimin e lokacionit për ndërtimin e Pishinës gjysmë Olimpikë në Podujevë.*
- *Propozimi i Drejtorisë së Arsimit për ndryshimin e Statusit të SHMLT “Fan S. Noli” dhe SHMLE “Isa Boletini” nga Shkolla të Mesme të Larta Profesionale-SHMLP në Institucione të arsimit dhe Aftësimi Profesional-IAAP.*

Si dhe duke përfshirë edhe dy pikat shtesë të mbështetura nga shumica e anëtarëve të Kuvendit për përfshirje në kuadër të rendit të ditës, dhe atë;

-Propozimi për themelimin dhe përbërjen e Komiteteve tjera të Kuvendit të Komunës.(varësisht propozimeve që do të përkrahen gjatë shqyrtimit të kësaj pike).

-Draft Rregullorja për organizimin dhe bashkëpunimin e Komunës me fshatra, vendbanime dhe lagje urbane në territorin e Komunës së Podujevës,(dokumenti dhe materiali tjetër shtesë sipas draftit të fundit që nga Kuvendi i Komunës më 29 prill 2021 është përkrahur për diskutim publik).

Rendi i ditës i miratuar në tërësi, si në vijim:

1. Korniza Afatmesme Buxhetore 2023/2025 e Komunës së Podujevës
2. Propozim vendimi për caktimin e lokacionit për ndërtimin e objektit - Çerdhe Publike në hapësirën e SHFMU “Xheladin Rekalu” në Podujevë
3. Propozim Vendimi për vënie në diskutim publik:
 - Arsyeshmëria profesionale për shpalljen e zonës “Ushton Lumi” në Popovë si zonë të mbrojtur të natyrës
 - Elaborati: Studimi për arsyeshmërinë profesionale për marrjen në mbrojtje të vlerës së natyrës “Trungu i Qarrit” (quercus cerris), në fshatin Lupç i Poshtëm
4. Formimi i Komisionit për hartimin e draft Rregullores për Orarin e Punës së Bizneseve që operojnë në territorin e Komunës së Podujevës.
5. Propozim Vendimi për caktimin e lokacionit për ndërtimin e Pishinës gjysmë Olimpikë në Podujevë
6. Propozimi i Drejtorisë së Arsimit për ndryshimin e Statusit të SHMLT “Fan S. Noli” dhe SHMLE “Isa Boletini” nga Shkolla të Mesme të Larta Profesionale-SHMLP në Institucione të arsimit dhe Aftësimi Profesional-IAAP.

7. Vendim për shpalljen e z.Halil Kastrati “Qytetar Nderi” i Komunës së Podujevës
8. Propozimi për themelimin dhe përbërjen e Komiteteve tjera të Kuvendit të Komunës.
9. Draft Rregullorja për organizmin dhe bashkëpunimin e Komunës me fshatra, vendbanime dhe lagje urbane në territorin e Komunës së Podujevës
10. Të Ndryshme

1. Korniza Afatmesme Buxhetore 2023/2025 e Komunës së Podujevës

z.Fatlum Osmani, U.D. drejtor i Drejtorisë së Buxhetit dhe Financave-DBF, duke paraqitur fjalën hyrëse rreth KAB 2023/2025, theksoi, KAB 2023/2025, është dokument strategjik i Komunës së Podujevës që paraqet të hyrat dhe shpenzimet e planifikuara për tri vitet e ardhshme duke përmbushur objektivat dhe synimet zhvillimore të cilat Komuna e Podujevës i ka në dokumentet tjera strategjike, KAB është e përpiluar në përputhje me procedurat buxhetore të dhëna nga Ministria e Financave përmes qarkores së parë buxhetore për komnat, me KAB shpjegohen dhe paraqiten prioritetet afatmesme të Komunës së Podujevës si dhe planifikimet buxhetore për arritjen e këtyre objektivave.

Objektivat strategjike të Komunës së Podujevës që kanë për synim zhvillimin social dhe ekonomik të komunës sonë janë; zhvillimi ekonomik, ngritja e nivelit të arsimit, zhvillimi i shëndetësisë duke u ofruar shërbime cilësore për qytetarët, zhvillimi urban i qytetit me infrastrukturë moderne, zhvillimi i kulturës dhe sportit, përmirësimi i mjedisit ambientel, zhvillimi i bujqësisë, zhvillimi i turizmit etj.

Për arritjen e këtyre objektivave është e domosdoshme mbështetja buxhetore, bazuar në qarkoren buxhetore për komuna për vitet 2023-2025, Komuna e Podujevës i ka këto limite buxhetore për vitin 2023 buxheti me vlerë është 27,406,566.00€, për vitin 2024, buxheti me vlerë është 29,130,259.00€, dhe për vitin 2025, buxheti me vlerë është 30,293, 093.00€, pra në bazë të këtyre limiteve buxheti për vitin 2023, do të jetë 4,000,000.00€ më i lartë se buxheti i viti 2022, dhe buxheti i vitit 2025 do të jetë afër 7,000,000.00€, më i lartë nëse e krahasojmë me buxhetin aktual të viti 2022.

Buxheti për vitin 2023, do të jetë në bazë të kësaj strukture të planifikuar për paga do të jenë 12,969,636.00€, për mallra 3,088,899.00€, për shërbime komunale 468,000.00€, për subvencione 1,600,050.00€, dhe për kapitale 9,279,981.00€, nga kjo rritje buxhetore prej 4,000,000.00€, që është në total kemi rritje në të gjitha kategoritë ku ta zëmë te investimet kapitale kemi një rritje prej afër 2,000,000.00€, gjithashtu edhe në rritje të subvencioneve dhe të mallrave dhe shërbimeve.

Komuna e Podujevës dhe qeverisja e saj komunale për dallim nga periudhat e kaluara iu kanë jap prioritet lëtyre fushave; arsimit, ekonomisë, shëndetësisë, projekteve të mëdha zhvillimore të infrastrukturës urbane, bujqësisë, kulturës dhe sportit etj. Prioritetet e qeverisjes më së miri shpjegohen me krahasime numerike nga vlera buxhetore e ndarë për fusha të caktuara në krahasim me periudhat paraprake, në fushën e arsimit për investime kapitale në vitin 2023, është buxhet i planifikuar në vlerë 1,600,600.00€ për dallim nga viti 2021 ku ishin të planifikuara vetëm 97,582.00€, pra është një dallim prej 17 here që është buxhet më i madh për investime kapitale në fushën e arsimit, këto mjete do të jenë të mjaftueshme për renovimin e shkollave ekzistuese, ndërtimin e objekteve të reja shkollore, projektin e digjitalizimit të shkollave ku çdo klasë mësimore do të pajiset me tabelë të mençur digjitale.

Në kategorinë e mallrave në fushën e arsimit janë të planifikuara 1,077 067.00€, ku për dallim nga viti 2021 ku ishin vetëm 570,246.00€, pra thuhet kemi dyfishim të buxhetit në kategorinë e mallrave, mjete buxhetore këto që do të mundësojnë furnizim me material të nevojshëm për një zhvillim normal dhe modern të procesit mësimor, në kategorinë e subvencioneve kemi dyfishim të mjeteve buxhetore nga 50,000.00€, në 100,000.00€, pra kemi dyfishim të buxhetit për bursa.

Në fushën e shëndetësisë ka investime të projekteve të ndryshme siç është përfundimi i objektit QMF-III në bashkëfinancim me Chatar Charity, furnizim me pajisje mjekësore, inventarizim të objekteve mjekësore, renovim të objekteve shëndetësore, gjithashtu në kategorinë e subvencioneve të fusha e shëndetësisë kemi një rritje prej 2.14 herë nga 70,000.00€ në 150,000.00€.

Në fushën e ekonomisë janë planifikuar 450,000.00€ për investime kapitale për dallim nga 140,566.00€, të cilat ishin më herët pra kemi rritje 3.2 herë, ndërsa në kategorinë e subvencioneve në DPZHE janë të planifikuara 300,000.00€, për dallim nga vitet e kaluara ku nuk ka pasë fare mjete të planifikuara në kategorinë e subvencioneve në këtë program mjete këto të cilat do të përdoren për mbështetje të biznesit prodhues përkatësisht në mbështetje të kreditimit të biznesit prodhues në subvencionimin e normave të interesit, si dhe 100,000.00€ të planifikuara për start-up, pra për biznese të rinjve të cilat kanë ide dhe plane për inkuadrim në biznes.

Në fushën e bujqësisë janë të planifikuara 700,000.00€, për subvencione për dallim nga 460,000.00€, të cilat ishin në vitet paraprake, në fushën e kulturës rinisë dhe sportit janë të planifikuara 200,000.00€, për dallim nga vitet paraprake ta zëmë vitin 2021 kur ishin të planifikuara 40,000.00€, pra kemi 5 herë më shumë buxhet dhe subvencione për sport dhe kulturë, kjo analizë numerike tregon fushat dhe prioritetet të cilat i parasheh ky KAB, të cilat mendojmë se janë prioritetet të qëlluara për arsim, shëndetësi, kulturë, ekonomi, bujqësi dhe projektet infrastrukturore që janë kryesisht projekte të mëdha zhvillimore të komunës sonë.

Në këtë KAB janë planifikuar edhe projekte të mëdha të infrastrukturës të cilat i japin komunës sonë një dimension tjetër të zhvillimit si ndërtimi i Rr."Skenderbeu", që është vazhdim i projektit, ndërtimi i Rr."Xhemajl Mustafa", ndërtimi i rrugës përgjatë lumit Llap deri në magjistralen Podujevë-Prishtinë, ndërtimi i unazës së qytetit, ndërtimi i rrjeteve të kanalizimeve ku për tri vite janë të planifikuara 2,150,000.00€, ku do të përfundon ndërtimi i kolektorit të ujërave të zeza ku më herët është bërë nga qeveria Austriake, me këto mjete buxhetore planifikohet që problematika e trajtimit të ujërave të zeza në komunën tonë t'i jepet një zgjidhje përfundimtare.

Në ndërtimin e trotuareve përgjatë këtyre tri viteve do të investohen 1,600,000.000€, ndërtimin e hapësirave të reja publike për këto tri vite janë të planifikuara 2,600,000.00€, gjithashtu përgjatë këtyre tri viteve do të investohet në çdo lokalitet dhe fshat në infrastrukturë rrugore dhe investime të tjera të nevojshme, pra ka një shpërndarje të drejtë gjeografike të investimeve, të nderuar prioritetet të cilat janë të vendosura në KAB si ekonomia, arsimi, shëndetësia, projektet madhore infrastrukturore, kultura, sporti, bujqësia, e bëjnë këtë dokument strategjik garantues për zhvillim të qëndrueshëm ekonomik dhe shoqëror të komunës sonë, duke ju ftuar ta mbështetni këtë KAB, njëkohësisht i presim kritikën dhe sygjerimet në mënyrë që në procesin e hartimit të buxhetit nëse është e nevojshme t'i bëjmë ndryshimet e nevojshme dhe të kërkuara.

z.Qëndrim Softolli, në emër të Grupit të LDK-së, theksoi, së pari kisha kërkuar që problemet që i keni brenda grupit t'i sqaroni në zyrat e partisë dhe jo të ushtrohet dhunë dhe presion për votim apo mos votim për një çështje të caktuar, kur e njohim që kryetari dhunën e ka goxha specialitet dhe në seancën e radhës e ftoj ta merr me veti edhe bishtin e sakicës.

Korniza afatmesme buxhetore është dokumenti bazë mbi të cilin bëhet parashikimi i buxhetit të komunës për 3 vitet e ardhshme dhe llogaritet një ndër dokumentet më të rëndësishme që procedon kuvendi i komunës, në KAB planifikohen objektivat zhvillimore për periudhën 3 vjeçare të cilat kanë për qëllim përmirësimin dhe lehtësimin e jetës së qytetarëve të komunës së Podujevës.

Fatkeqësisht dokumenti i cili ndër vite kritikohet nga opozita e asaj kohe e që tani është në pushtet sot na ka ardhë në kuvend shumë herë më i dobët se atëherë, një dokument me një parashikim buxhetor tejet të centralizuar në vetëm disa drejtori ndërsa në shumë prej tyre nuk buxhet të ndarë në kategorinë mallra dhe shërbime, p.sh Zyra e Kryetarit, Kuvendi Komunal, DBF, DA, zjarrfikësit nuk kanë planifikim për mallra

dhe shërbime, ky kuvend me 35 asamblistë nuk e ka të planifikuar asnjë cent qoftë për trajnime apo aktivitete tjera, Zyra e Kryetarit me gjithë atë staf nuk ka të planifikuar buxhet, nëse në këto institucione duhet material harxhues duhet të shkojnë në DA, për të kërkuar inicimin e procedurave dhe mbulimin e shpenzimeve.

Kjo nuk e thjeshtëzon qeverisjen dhe aktivitetin por e komplikon dhe i jep mundësi për kamuflazhe e justifikime në raste të dështimeve siç ndodhi në vitin e kaluar ku zyrtari i gjendjes civile u detyrua ta blejë vetë tonerin, objektivat të cilat i keni paraqitur në këtë dokument qartë shihen që janë copy-paste, pasi që nuk paraqesin asgjë konkrete, nuk ndërliiden me aktivitete përmes të cilave synohet të përmbushen ato, nëse e shihni qeverisja e proklamuar si e ndryshimit nuk ka asgjë dalluese nga ato të më parshme është më konfuze dhe më e cekët në planifikime.

Lidhja e arsimit me ekonominë është një prej objektivave që kemi këtu, a ka mundësi të na tregoni se çfarë strategjie keni me ndjekë ose konkretisht çka keni plan ju si ekzekutiv me bë që të arrihet kjo, te zhvillimi i kulturës rinisë dhe sportit nuk kemi asnjë strategji zhvillimore për kundër faktit kemi stagnim të buxhetit në tri vitet e ardhshme dhe të gjithë e dimë se sa është interesimi për të ikur jashtë vendit dhe qasja e qeverisjes së ndryshimit ndaj tyre është e pa ndryshueshme, a ka drejtoria e rinisë strategji për fuqizimin e rinisë, a janë funksionale dhe sa po mbështeten institucionet rinore, çka po ndodhë me qendrën e kulturës dhe qendrën rinore si po ndahen subvencionet, çka po ndodh në teatrin e qytetit tema këto që ishin shumë aktuale gjatë kohës kur LVV ishte në opozitë.

Zhvillimi i bujqësisë është paraqitur një prej objektivave, kurse te DBPZHR asnjë ndryshim nuk është bë në këtë drejtori kur e dimë se është sektori më i madh socio ekonomik në Llap dhe e dimë që kërkesat dhe nevojat e fermerëve po ndryshojnë nga viti në vit, a po bëhet një plan konkret për t'i mbështetur fermerët që çdo vit po pësojnë nga fatkeqësitë natyrore e ju nuk e keni paraparë asnjë cent buxhet për këtë kompensim të dëmeve.

Te zhvillimi ekonomik nuk kemi asnjë plan konkret dhe prapë për të ndahet një buxhet tejet i ulët, po bëhet përpjekje që përmes donatorëve të krijohet mbështetje por çfarë po ndërmerret në aspektin e mbështetjes së të rinjve me biznese plane në mënyrë që të stimulohen e të punojnë dhe të veprojnë në Podujevë, apo prapë do ta lëmë këtë çështje në mëshirën e donatorëve, te planifikimi i të hyrave kemi një planifikim prej 60,000.00€, nga të hyrat nga Gjykata, ato i planifikon Ministria e Drejtësisë e jo komuna, ato mjete i kthehen komunës si të hyra indirekte sikur gjobat e trafikut ose agjencioni i pyjeve, me këto mund të dukeni mirë në letër por njerëzve duhet t'i tregohet realiteti.

Një pikë tjetër e cila merr vëmendje është kodi i shërbimeve kontraktuese afër gjysmë milioni për tre vitet e ardhshme, në secilën drejtori kemi ndarje të konsiderueshme buxhetore për këtë kod por nuk dimë se çka saktë përmban prandaj kisha kërkuar nga drejtori që për secilën drejtori të na tregoj se ku saktësisht do të shpenzohen këto mjete apo janë lënë të tilla për tu bërë rrush e kumbulla ku të kërkohet nga situata elektorale dhe partiake, si në modë i kemi aktualisht specialistët e fushave që janë specialistë të partisë, te infrastruktura dhe shërbimet publike kemi një buxhet të parashikuar prej 2.3 milion euro, për vitin 2023, kurse të gjitha këto mjete janë të koncentruara në vetëm 11 projekte me emërtime të përgjithshme ku mundësia për manipulime me futje të projekteve është shumë e madhe.

Si është e mundur që specifikimi ka qenë një ndër arsyt kryesore pse nuk janë votuar tradicionalisht kornizat afatmesme buxhetore nga LVV-ja, përderisa drejtori i DSHPMSH-së, i qeverisjes së kaluar kishte paraqitur 41 projekte konkrete ndërsa drejtori aktual i po të njëjtës drejtori i ka përkufizuar me 11 sosh, do të thotë ndryshimi po ndodh ama për të keq apo ndoshta kërkesat e komunës janë vetëm në ato 11 projekte, te DKA-ja, kemi kodin blerje të mallrave në shumë prej 200,000.00€, a keni mundësi të na tregoni saktë se çfarë mallrash keni planifikuar të blini me gjithë këto mjete apo për shkak të performancës së mirë në punësime pa konkurs dhe kontrollit të madh të shkollave deri te notimi i nxënësve këto mjete ia keni besuar t'ia bëjë drejtori i DKA-së, para se t'i investoni këto mjete ju lutem bëjeni një kontroll në

oborret e shkollave dhe shiheni mirëmbajtjen e tyre, shihni këndet e lojërave ku ditë më parë u futen mijëra euro e që janë të rrethuar me goma të skaduara, shiheni bazën ligjore kur dhe si lejohen të përdoren këto goma në të cilat tani çdo ditë lozin fëmijët tanë.

Krejt në fund të DKRS, kemi një buxhet prej 200,000.00€, për terrene sportive, a ka mundësi ta dimë sa janë funksionale terrenet aktuale, cila është mirëmbajtja e tyre dhe ku jemi me ato që kanë mbetur në gjysmë, do ishte mirë që para se të fillojnë projektet e reja të bëhet një raport për këto ekzistueset, mbi të gjitha pretendimet se me qeverisjen tuaj do të kalojmë nga projektet e asfaltit dhe zhavorrit në projektet zhvillimore e bashkëkohore kjo bie poshtë sepse kjo kornizë bazën e ka kryesisht në projekte në asfalt e në kode të pa caktuara dhe nuk përmban asgjë dalluese në aspekt pozitiv, për më tepër ka shkuar mbrapa duke u bërë më e ngurtë dhe shumë më e centralizuar prandaj ne Grupi i këshilltarëve të LDK-së nuk e përkrahim këtë kornizë.

znj. Adelinë Stublla, në emër të grupit të LVV-së, theksoi, KAB për periudhën kohore 2023-2025, është dokument bazik në nivel të lartë strategjik të nivelit komunal që paraqet caqet e përgjithshme të të hyrave dhe shpenzimeve buxhetore dhe për gjatë kësaj periudhe ka të bëjë me përmirësimin e infrastrukturës në qytet, infrastrukturës në fshat, ngritja e nivelit të arsimit, zhvillimit të shëndetësisë duke krijuar kushte dhe shërbime cilësore për pacientët, zhvillimin e kulturës rinisë dhe sportit pra vit pas vitesh ka ngritje buxhetore për realizimin e projekteve për të mirën e qytetarëve, andaj ne i grup i këshilltarëve të LVV-së e përkrahim dhe e mbështesim këtë dokument të rëndësishëm.

z. Bashkim Sylja, në emër të Grupit të PDK-së, theksoi, KAB për periudhën kohore 2023-2025, është dokumenti i cili i pasqyron të hyrat dhe shpenzimet buxhetore si dhe objektivat e qeverisjes komunale, është në linjë me qarkoren e Ministrisë së Financave, ne të gjithë e dimë se për vitin 2022, prioritet i është dhënë arsimit dhe shëndetësisë kurse për vitin 2023 prioritet përveç arsimit dhe shëndetësisë është edhe bujqësia, KAB është obligim ligjor që të miratohet nga kuvendi komunal dhe ne si grup i këshilltarëve të PDK-së e mbështesim andaj i mbetet ekzekutivit të punoj drejtë dhe mirë.

z. Arjant Topanica, theksoi, jemi sot këtu në mbledhjen në të cilën do të propozohet KAB që të gjithë u pajtuam se është njëri nga dokumentet më të rëndësishme që miraton kuvendi komunal, unë nuk do të ndalem në detaje të kësaj kornize pasi që për disa detaje foli parafolësi im z. Qendrim Softolli e për disa të tjera keni pasë mundësi edhe vet t'i shikoni sepse analiza e numrave nuk kërkon ndonjë ekspertizë të madhe mirëpo do të ndalem në analizën e përgjithshme të kësaj kornize në atë se çfarë rëndësie dhe kuptimi ka, në defektet që ajo ka në realizueshmërinë e sajë dhe në mungesën dhe sugjerimet që ne do t'i japim, te rëndësia dhe kuptimi i KAB-it, e dimë se buxheti dhe kjo kornizë janë një projekcion janë një plan në të cilin parashihen të hyrat në njërin anë dhe në anën tjetër janë shpenzimet dhe investimet kapitale dhe si e tillë kjo kornizë duhet të ketë një harmonizim me objektivat, me synimet dhe me planin zhvillimor të komunës sonë, gjithashtu duhet të jetë specifike e kësaj kornize dhe çdo kornize buxhetore se ajo duhet të hartohet nga ekspertë të fushës mirëpo duhet të jetë e thjeshtë dhe e kuptueshme për të gjithë qytetarët tanë dhe qytetarët për të cilët dedikohet ajo.

Korniza Afatmesme e Buxhetit është një orientim dhe një pasqyrim i asaj se kah do të shkoj komuna jonë dhe për këtë arsye është mjaftë e rëndësishme që ajo të jetë thjeshtë e qasshme e kuptueshme nga të gjithë qytetarët tanë, te defektet e KAB-it, unë do të ndalem te mos harmonizimi, mos specifikimi dhe mos detajizimi, te mos harmonizimi veç e thash më parë është një kornizë që duhet të mbështetet dhe të bazohet e të harmonizohet me synimin afatgjatë të komunës me misionin e saj me objektivat e saj dhe me planin zhvillimor të saj, te mos specifikimi disa nga pikat u përmenden nga parafolësi im z. Qendrim Softolli por edhe unë do t'i theksoi në parim si defekte të kësaj kornize që janë mos specifikimi i kodeve buxhetore të parapara në këtë kornizë siç janë asfaltimi i rrugëve, ndërtimi i trotuareve dhe ndriçimit publik, te mos detajizimi kisha me u ndal te pika që u theksua më herët në disa kode të këtij KAB-i, kemi, shembull, gjysmë milioni që janë paraparë për shërbime kontraktuale e që duhet të jenë të detajizuara se

për çfarë qëllimesh dhe arsyesh do të dedikohen këto mjete që nuk janë në një vlerë të vogël që brenda një viti kalendarik janë paraparë gjysmë milioni euro.

Sa i përket shërbimeve publike kemi 2.3 milion euro shpenzime dhe janë të grumbulluara të gjitha në 11 kode, ky është një mos specifikim, mos detajizim, që lë shumë për të dëshiruar dhe shumë për të diskutuar, te realizueshmëria, deri më tani janë realizuar vetëm 9% e të gjitha investimeve kapitale kur dihet se jemi në fund të 6 mujorit të parë dhe si praktikë nga e kaluara është që deri në 6 mujorin e parë zhvillohet pjesa më e madhe e aktiviteteve të punëve dhe kryhen afërsisht deri në 60% të projekteve apo të investimeve kapitale, po ashtu është e rëndësishme që të kemi edhe informata për qytetarët tanë se cilët tenderë janë realizuar deri më tani, cilët tender janë në OSHP dhe sa janë realizuar deri në 6 mujorin e parë të këtij viti, janë qytetarët ata që na kanë zgjedhë dhe duhet të jenë të informuar më detajisht për këto çështje të rëndësishme të komunës sonë.

Së fundmi pikë të cilën do ta diskutoj pa dashur të marrë kohë dhe të hyj në detaje janë mungesa të sugjerimeve, diçka që më ka ra në sy është uji i pijshëm që ka qenë një nga premtimet kryesore elektorale të partisë suaj dhe meqenëse nuk është në kompetencë direkt dhe duhet të merren parasysh mungesat e shumta të ujit në pjesët e qytetit dhe në shumicën e fshatrave, si pikë tjetër që është vrenjtur se ka mungesë të buxhetit në zyrën e kryetarit dhe zyrën e kuvendit komunal, si dhe shqetësim tjetër që do ta ngrisë është edhe subvencionimi i kompanive që ka qenë njëri nga premtimet elektorale dhe nuk kemi ndonjë pikë të veçantë nëse e zëmë subvencionimin e kompanive prodhuese apo kompanive të IT-ve, që janë kompani shumë me rëndësi për zhvillimin e ekonomisë qoftë asaj komunale apo asaj në nivel vendi.

Si përfundim kisha kërkuar që dokumentet dhe planet e tilla që janë esenciale shumë të rëndësishme që tregojnë orientim zhvillimor se kah po shkon komuna jonë për vitet e ardhshme të merren me më seriozitet dhe më afër, më detajisht, më specifikisht për çdo kod që përmbajnë këto dokumente për arsye se kemi të bëjmë me parane e taksa paguesve tanë dhe kemi të bëjmë me mirëqenien e tyre.

znj. Arnisa Sylejmani, theksoi, si pjestare e komunitetit të rinjve të cilët përbëjnë po thuajse gjysmën e popullsisë edhe adresimi im natyrisht prek këto fusha. Një ndër objektet më të rëndësishme për organizimin e jetës rinore dhe zhvillimin e aktiviteteve të ndryshme është qendra rinore edhe pse ky projekt në vitin 2020, pritej vetëm të fillonte ishte caktuar lokacioni dhe ishte përzgjedhur projekti. Sot ne jemi në muajin qershor të vitit 2022, dhe nuk është bërë as edhe një hap të paktën publik drejt fillimi të këtij projekti. Ndërsa dihet që objekti ekzistues i qendrës rinore për momentin është në gjendje shumë të rëndë, janë paraparë investime në infrastrukturë sportive pa adresë. A do të shikohet funksionaliteti i objekteve sportive ekzistuese, nevojat e komunitetit apo meqenëse janë pa adresë do të shkojnë sipas qejfit dhe preferencave tuaja.

z. Bahri Blakçori, theksoi, KAB i prezantuar para nesh nga drejtori i DBF-së, mendoj se është një buxhet i planifikuar mirë dhe mbi të gjitha gjithëpërfshirës duke marrë për bazë nevojat specifike të qytetarëve, është transparent sepse ka të bëjë me lejimin e qasjes së publikut në të gjitha fazat e buxhetimit duke përfshirë fazën e planifikimit por edhe të realizimit të buxhetit të komunës, gjithashtu propozim buxheti në fjalë është hartuar në atë mënyrë që t'i mbulojë kërkesat dhe prioritete të përcaktuara me planin zhvillimor. Me këtë buxhet siç u potencua kemi rritje të konsiderueshme të investimeve në arsim dhe kuptohet sa më shumë investime për shkollat tona e aq më shumë krijohen mjedise të shëndetshme, tërheqëse dhe miqësore për një mësimdhënie dhe një mësimnxënie sa më cilësore dhe bashkohore, rritje të konsiderueshme të investimeve përveç arsimit kemi edhe në shëndetësi dhe bujqësi kategori këto të domosdoshme për një mirëqenie më të mirë për qytetarët tanë andaj edhe ne e përkrahim një propozim të tillë duke siguruar që me vëmendje do e përcjellim realizimin e projekteve me interes për qytetarët tanë.

z. Adnan Zymeri, theksoi, KAB është dokument i rëndësishëm së veçantë për qytetarët dhe duhet të vijë nga qytetarët për fat të keq për kundër që për kohë relativisht të gjatë është trumbetuar nga LVV që po mbahen pak takime dhe po organizohet keq hartimi i KAB-it, sa ata ishin në opozitë kur tani janë në pushtet ndodh

e njëjta gjë, mos më keq, komuna më e madhe me territor në Republikën e Kosovës mban vetëm katër takime të lodhëta me qytetarët për KAB-in duke mos harruar premtimin publik të disa anëtarëve të kuvendit nga partia në pushtet që do të marrin pjesë në takime për hartimin e KAB-it, prapë s'ka lidhje e rëndësishme është me përfundim të obligim procedural, pjesëmarrja e qytetarëve ka rëndësi vetëm në zgjedhje e për konsistencë mos të flasim, vetëvendosja dhe konsistenca janë hidhëruar mes veti që një kohë relativisht të gjatë.

Kur shfletojmë KAB-in dhe shohim objektivat e Komunes së Podujevës, njëra ndër to përmirësimi i infrastrukturës në qytet dhe fshatra të kujton kohën sa e lërgjik kanë qenë në asfalt e kanalizim, kisha dashur të dëgjoj edhe prej drejtorit të DSHMS-së, se si do ta përmbushë objektivin e rritjes së mirëqenies sociale në kohën kur ajo po cenohet më së shumti, përkrahja e bizneseve që të ulët papunësia është një tjetër objektiv që me siguri drejtori i DPZHE do ta arrijë pasi pikërisht për këtë besoj e ka ndryshuar dikasterin që e drejton dhe në fund thuhet se këto objektiva përputhen me ato të qeverisë së Kosovës, unë nuk besoj që ne duhet ta lejojmë t'i ndodh Podujevës ajo çka është duke i ndodh Kosovës, duhet përshëndetur projekti i DSHPMSh, për furnizim me drunjë dekorativ, mirëpo po ashtu konsideroj që është shumë e nevojshme të rritet shuma për largimin e deponive ilegale nga 40,000.00€, sa parashihen tani.

Te investimet kapitale të DKA-së, është shumë e nevojshme para së gjithash të bëhet një studim fizibiliteti lidhur me ndërtimin e shkollave të reja, duke marrë para sysh nivelin e migrimit rrezikojmë që brenda pak viteve këto shkolla t'i kthejmë në muze, DPZHE ka të parapara 250,000.00€ për ndërtimin e parkut industrial mirëpo sa kam informacion me një njoftim për kontratë të llojit të shërbimeve të datës 28.02.2022, komuna ka hapur tender për studim të fizibilitetit të këtij parku të cilin pas një jave e ka anuluar me arsyetimin se nuk ka pasur të interesuar, dua ta di nga drejtori se deri ku ka shkuar ky proces sepse besoj që komuna ka hapësirë ku t'i orientoj këto mjete nëse për park nuk jemi gati, meqë korniza është dokumenti fillestar orientues dhe deri në miratimin e buxhetit ka hapësirë të mjaftueshme unë dhe LDK do t'i japim imputet tona që të inkorporojmë projektet e realizueshme dhe të arsyeshme financiarisht që lehtësojnë jetën e qytetarit dhe ndajnë buxhetin e përbashkët që kemi.

znj. Sebastina Vokri, theksoi, një bujqësi e aftë për të siguruar në vazhdimësi ushqim dhe resurse të tjera për një popullsi gjithnjë në rritje është thelbësore për ekzistencën e njerëzimit dhe për çdo veprimtari humane por përmbushja e këtyre nevojave të sotme dhe të ardhshme po komprometohet gjithnjë e më shumë nga një sër praktikash dhe faktorësh si; intensifikimi bujqësor, punimi jo i përshtatshëm i tokës, përdorimi abuziv i lëndëve ushqyese, ndotja etj.

Ekzistojnë një sër praktikash që mund të aplikohen në bujqësinë e qëndrueshme dhe në sistemet e qëndrueshme të ushqimit siç janë, fermerët mund të përdorin metoda që mbrojnë shëndetin e tokës reduktojnë përdorimin e ujit dhe ulin nivelin e ndotjes në fermë, konsumatorët dhe tregtarët mund të përzgjedhin ushqime të prodhuara ndërmjet metodave që mbrojnë shëndetin që janë miqësore me mjedisin apo që fuqizojnë ekonominë lokale, kërkuesit shkencor në fushën e bujqësisë së qëndrueshme mund të kryqëzojnë linjat e tyre disiplinore duke ndërthurur biologjinë, ekonominë, inxhinierinë, kiminë, zhvillimin e komunitetit dhe shumë të tjera.

Aktualisht bujqësia përfshin pyjet qumështin, kultivimin e frutave, shpezëve, bletarinë, kërpudha etj, sot përpunimi i marketingut dhe shpërndarja e të mbjellave dhe produkteve blegtorale të gjitha njihen si pjesë e bujqësisë aktuale, kështu bujqësia mund të quhet prodhim, përpunim, promovim dhe shpërndarje e produkteve bujqësore, bujqësia luan një rol kritik në gjithë jetën e një ekonomie të caktuar, bujqësia është shtylla kurrizore e një sistemi ekonomik të një vendi të caktuar përveç sigurimit të ushqimit dhe lëndës së parë bujqësia gjithashtu ofron mundësi punësimi për një numër të popullsisë.

Fusha e Llapit shtrihet në dy anët e lumit Llap dhe ka një reliev të rrafshët me pjerrtësi të vogël në drejtim të lumit Llap dhe fushës së Kosovës pjesa më e madhe e saj është midis 500 deri 615 metra lartësi mbi

nivelin e detit, fusha e Llapit është një krahinë bujqësore në të cilën lavërtaria, blegtoria e më pak pylltaria përbëjnë veprimtaritë kryesore ekonomike të saj.

Qeverisja komunale e LVV-së duke e ditur rëndësinë që e ka bujqësia në përgjithësi për vitin 2022, krahasuar me vitin 2021, ka rritur buxhetin për 300,000.00€, në vitin 2022, është realizuar projekti për ndarjen e nga një mëshqerre të racës simental për 108 fermer, këto kafshë të kuqe me të bardhë janë shumë të kërkuara për shkak të zhvillimit dhe rritjes së shpejtë të tyre, prodhim dhe cilësi të shkëlqyer të qumështit nga i cili prodhohet gjalpë dhe djathë i cilësisë së lartë si dhe sasisë së madhe të mishit me cilësi shumë të lartë.

Pritet të ndahen 50 sera me nga 96m² dhe 152 sera me nga 50m², moto kultivatorë me frezë shpërndarëse plehu, spërkatëse me kardan, kositëse bari, frezë dheu, mbledhëse bari lule dielli, makina mjelëse dhe lakto frizë, projektet në vazhdim që do të realizohen në këtë vit do të jenë ndarje e 1400 fidane të mjedrave për 40 fermer dhe nga 5 copë bletë për 140 kultivues të bletëve.

Në kornizën buxhetore për vitin 2023-2025, qeverisja komunale e udhëhequr nga LVV, i ka kushtuar një rëndësi të madhe zhvillimit të mëtutjeshëm të bujqësisë duke planifikuar që ta rrisë buxhetin për subvencionim të bujqve në këtë periudhë afatmesme ku për vitin 2023, është planifikuar të ndahen 700,000.000€, për vitin 2024 janë planifikuar të ndahen 7000,000.000€, kurse për vitin 2025 është planifikuar që të ndahen 8000,000.00€, krahasuar me vitet paraprake për vitin 2023-2024, kemi rritje prej 300,000.00€, për vit kurse për vitin 2025, kemi rritje prej 400,000.00€ për vit.

Unë mendoj se në planifikimin e strategjive të ardhshme duhet të investohet më së shumti në kooperimin e bujqve në komunën tonë në mënyrë që të kemi një prodhim të qëndrueshëm të produkteve bujqësore e sidomos të prodhimit të grurit për të siguruar bukën për popullatën dhe mos të jemi të varur nga tregjet e huaja, sa është e rëndësishme t'i kushtohet kujdes si nga qeverisja lokale dhe ajo qendrore bujqësisë e kemi mësuar nga pasojat e pandemisë ku erdh deri te mbyllja e tërësishme e kufijve ndërmjet shteteve dhe bllokimi i importit dhe transportit të të gjitha produkteve, ende më shumë rëndësinë e bujqësisë dhe sigurimin e bukës e vuri në pah pushtimi i Ukrainës nga Rusia që ishte njëra ndër eksportueset më të mëdha të grurit në botë e që me bllokimin e porteve nga ku eksportohej gruri po vihet në pikëpyetje sigurimi i bukës për shumë vende të botës.

Në këtë pranverë në Kosovë në përgjithësi por edhe në Podujevë pati dëme shumë të mëdha nga fatkeqësitë natyrore konkretisht nga breshëri në produktet bujqësore, mendimi im për vitet në vazhdim është shumë e rëndësishme që në zonat e caktuara të subvencionohet sistemi kundër breshëritë, gjithashtu është e nevojshme të ngritën pendat dhe kanalet për ujitjen e tokave për një prodhim sa më cilësor dhe sasiore të produkteve bujqësore për zhvillimin e ekonomisë bujqësore në vend por edhe në eksport.

z.Xhevdet Maloku, theksoi, unë isha pjesë e dëgjimit publik në fshatin Lluzhan më datë 13.06.2022, pavarësisht për dallim nga viti 2022, për vitin 2023 është pa që janë të përfshira disa investime në rajonin e fshatit Lluzhan por unë kam një pyetje për drejtorinë DPUMM-së, z. Leutrim Krasniqi se ky sigurisht e din se ku gjendet fshati Sallabajë se është shumë afër, mua më intereson pse për vitin 2023, nuk është paraparë asnjë investim për fshatin Sallabajë sikurse ka ndodhur edhe në vitin 2022, pra për dy vite radhazi nuk kemi asnjë investim në këtë fshat.

Një pyetje po ashtu kam për drejtorin e DKA-së, se a është paraparë dhe kur do të bëhet ndërtimi i shkollës së re në fshatin Lluzhan pasi që e dimë se me zgjerimin e rrugës magjistrale Podujevë-Prishtinë, kjo rrugë do t'i afrohet shkollës aktuale dhe paraqet rrezik për nxënësit, deri sa të rregullohet shkolla e re a është paraparë të ndërtohet parketi i sallës së edukatës fizike në shkollën e Lluzhanit që është në gjendje të mjerueshme, një pyetje për fund e kam edhe për drejtorin e DKRS-së, më intereson ta di se a është paraparë rregullimi i një fushe sportive për rajonin e Lluzhanit të paktën një i tillë si ai i fshatit Kërpimëh.

z.Ardi Hasani, theskoi, më lejoni që fjalimin tim të parë t'ia nis me një fakt shumë domethënës për qytetin tonë qeveria Kurti për vitin e ardhshëm për Komunën e Podujevës i ka nda hiç më pak se 4,000,000.00€, më shumë se vitet e kaluara prej tyre 2,000,000.00€ do të jenë buxhet për investime kapitale më shumë se sa vitet që po i lëmë pas.

Kjo rritje e buxhetit jep mundësi që dora e komunës dhe e shtetit përmes projekteve kapitale dhe zhvillimore të shtrihet në çdo cep të qytetit të Podujevës, si banor i Podujevës, si një i ri Llapjan më bën të ndihem mirë krahas faktit që rritja e buxhetit dhe investimeve në DKRS dërgon sinjal të qartë se si në nivelin lokal dhe atë qendror rinia është prioritet dhe se të rinjtë gjejnë mbështetje nga institucionet lokale dhe qendrore, ndërsa 689,000.00€, do të jetë buxheti për vitin 2023, në DKRS, nga të cilat 200,000.00€ do të jenë subvencione për t'i mbështetur të rinjtë e Podujevës për projektet dhe aktivitetet kulturore e sportive që aq shumë i kanë munguar qytetit tonë.

Fokus për rininë llapjane përveç nga ana e nivelit lokal vërehet edhe nga ai qendror, Ministria e Kulturës Rinisë dhe Sportit do të realizoj projekte të mëdha në Komunën e Podujevës të cilat do të ndikojnë dukshëm në shtimin e aktiviteteve të rinisë në komunën tonë siç janë ato ndërtimi i pishinës gjysmë olimpike, qendra rinore, ndërtimi i palestrës sportive, ndërtimi i fushave të hapura dhe të tjera do të jenë disa nga projektet e qeverisë Kurti dhe Bulliq që po realizohen në Komunën tonë, me qeverisje e LVV-së, si në nivelin lokal dhe atë qendror rinia do të jetë prioritet për të mbështetur e shtyllë për ta zhvilluar komunën dhe shtetin e Kosovës.

z.Gazmend Islami, theksoi, po mendojnë opozita që ne shohim gjithë vetëm zi e nuk shohim edhe bardh por ne mendojmë se ka drejtori që janë duke shkëlqyer në këtë qeverisje. Duhet ta cekim se gjatë kohë së aplikimi për subvencione çka më ka ra në sy te DBPZHR, se ka një punë të stërngarkuar andaj mendoj se duhet të gjinden forma se si t'iu lehtësohet puna kur bëhet aplikimi për ndarje të subvencioneve sepse unë për dy javë rresht e kam përcjellë ardhjen e bujqve dhe fermerëve për aplikim dhe punëtorët që ishin aty është dashur që fermerët t'i ulin afër kompjuterit dhe t'i gjejnë parcelat e tyre e këtë punë shumë lehtë me dy monitor të mëdhenj mund t'ua lehtësojmë punën punëtorëve, prandaj unë e përgëzoj DBPZHR-së, për punën që është duke e bërë, gjithashtu edhe te DSHMS, kam pa një impuls pozitiv që është për tu përshëndetur ka edhe anë pozitive nuk do të thotë se shohim gjithçka zi por atë që është e keqe duhet ta themi.

Unë kam lexuar për projekt buxhetin dhe kam pa se ka mungesë te DKRS-ja, kisha propozuar i nderuari drejtor që të paramendoni ndërtimin e së paku 10 fushave të vogla sportive që nuk kushtojnë më shumë se 20,000.00€, gjitha kalkulimet që i kam bërë ku me këtë rast mund të mblidhet rinia dhe t'i largojmë rinin thjeshtë nga kafe baret e shumta në mënyrë që atyre t'ju mundësojmë që të angazhohen në sport, një kalkulim i thjeshtë prej 200,000.00€ nëse për 3 vite radhazi e bëjmë një ndarje, klasifikim, kam kontaktuar kompani që mund ta bëjnë këtë pra është diçka e mundshme që lejohet nga buxheti.

Sa i përket DHMS-së dhe DBPZHR-së mendoj se këtyre drejtorive duhet t'iu shtohet buxheti se kanë shumë punë dhe është mirë që pozita se këtu kur po i dëgjoj duke folur jo qeverisja qendrore jo lokale po ma humbin dispononim andaj thjeshtë njerëzit më të mirë që i kemi në këtë kuvend qofshin nga LVV-ja, PDK-ja, LDK-ja, AAK-ja, t'i japin mendimet e tyre dhe pozita është mirë që t'i merr mendimet e ekspertëve që vijnë nga opozita se qyteti është i joni.

Sa më shumë që punohet është në të mirën tonë pra të qytetarëve dhe nuk qëndron ajo se tani pozita duhet të ndihet superiore por duhet të marrë ekspert edhe nga LDK-ja, dhe t'i merr mendimet e tyre, e jo të vazhdohet me kryeneçësi, me idiotizëm, me nënçmim duke e fyer njëri tjetrin, mirëpo më herët nuk e pata asnjë qëllim politik ose një ndjenjë ose diçka që desha ta fyej pozitën por unë u ndjeva keq për një punë që e pash të keqe, kështu që unë thash se jam i gatshëm të vij e të punoj një javë pa pagesë dhe s'ka kurrfarë problemi por qytetin tim e dua më shumë se Kryetarin Bulliqi dhe se të gjithë, atdheu im, Dumnica, Podujeva janë vendlindja ime dhe dua t'i shohë mirë prandaj drejtori i DBF-së duhet që çdo cent ta

kalkuloj dhe ta merr parasysh faktin që te sporti, bujqësia dhe shëndetësia dhe arsimi e sidomos te bujqësia të ketë më shumë buxhet se po shohim tani që patëm dëme nga vërshimet dhe nuk kemi asnjë fond që t'ju ndihmojmë bujqve.

Në fshatin Përpellac nuk ka rrymë, ka fermer që kanë filluar punën atje por nuk ka rrymë prandaj të gjendet një modalitet dhe t'ju mundësojmë fermerëve që të kenë rrymë në fshatin Përpellac.

Kryesuesi i Kuvendit, theksoi, pasi që këshilltari z.Gazmend Islami vjen prej fshatit Dumnicë dua t'ia them një thënie të një bashkë vendasi të tij të z.Sali Hoxha, që patë thënë se ne shqiptarët nuk duhet të nisemi nga ai parimi të munda më munde por të ndihmova më ndihmove edhe nga ju nuk kisha dashur çdo herë të dëgjojë fjalë se të munda e më munde se nuk jemi këtu veç të shtyhem e ta mundim njëri tjetrin.

z.Ekrem Rrahmani, theksoi, po filloj fjalimin tim me një kërkesë direkte që për faktin e keq nuk e gjeta askund në këtë dokument andaj kërkoj që në këtë kornizë investimi me vlerë 100,000.00€, në stadiumin “Zahir Pajaziti”, për klubin e Llapit për sukseset e tij që na ka bërë krenar të gjithëve të bëhet investimi në stadium. Po ashtu sportistë Llapjan sot po transferohen në liga të Evropës andaj kjo skuadër meriton që komuna të investoj në stadiumin e tyre për t'i përmirësuar kushtet, për të vazhduar në këtë fushë po i'a potencoj drejtorit të DKRS-së z.Pajtim Balaj, se ka 3 vite që në kuvend është marrë vendim për vendosjen e shtatores së legjendës së futbollit “Fadil Vokrri”, dhe nuk e di ku ka mbete puna pse nuk është vendosur shtatorja dhe një gjë të tillë a e kanë paraparë ose jo, këto ishin kërkesat e mia për drejtorin e DKRS-së z.Pajtim Balaj ndoshta e marrë përgjigjen.

z.Pajtim Balaj, U.D. drejtor i DKRS, theksoi, po e nisi prej pyetje të fundit që i bërë këshilltari z.Ekrem Rrahmani, para vetës kam kërkesën që e kam bërë dy ditë më parë drejtuar Ministrisë së Kulturës Rinisë dhe Sportit, kërkesë të cilës ia kam bashkangjitur edhe vendimin e datë 09.09.2020, kur kuvendi voton për caktimin e lokacionit për ndërtimin e shtatores së “Fadil Vokrri”, në kërkesën që ne e kemi dorëzuar ne marrim përsipër mbulimin e bazamentit të shtatores për shkak se shtatorja ka kosto më të lartë dhe Ministria i ka mundësitë më të mëdha buxhetore, unë besoj, shpresoj, që shumë shpejt do ta kryejmë këtë punë dhe parku i qytetit në lokacionin ku është votuar do ta ketë shtatoren e legjendës së futbollit “Fadil Vokrri”, për punën e stadiumit po ashtu kam përgatitur një kërkesë drejtuar Ministrisë së Kulturës Rinisë dhe Sportit që të financohen mbujotat e stadiumit mirëpo jemi në një fazë ku po diskutojmë me KF Llapin sepse së pari duhet të jetë projekti për mbujotën pastaj së bashku me projektin besoj se do ta dërgojmë edhe kërkesën të gjitha këto janë në proces.

Sa i përket fushave të vogla dhe terreneve të ndryshme sportive këtë vit nuk kemi mundur të bëjmë ndonjë investim për shkak se kemi implikime buxhetore prej projekteve paraprake, kompania që ka qenë e kontraktuar vitet e kaluara për ndërtimin e fushave të vogla sportive një ndër to ka qenë për fshatin Sibofc, besoj se kolegu z.Ekrem Rrahmani ka mundur të shkojë e ta shikojë se në çfarë gjendje kanë mbetur punimet aty, është ndërprerë kontrata vitin e kaluar dhe e kemi hapur tenderin sivjet për kryerjen e pjesës së mbetur të punëve mirëpo ka dështuar ritenderimi i parë, zyra e prokurimit është në procedurë të ritenderimit për kryerjen e pjesëve të mbetura të punëve që këto fusha sportive në fshatin Sibofc dhe Gllamnik si dhe në lokalitetet tjera të kryhen sa më shpejt.

Sa i përket qendrës rinore jo qendër rinore por qendër multifunksionale, ditëve në vijim do të nënshkruajmë memorandumin për bashkëfinancim me Ministrinë e Kulturës Rinisë dhe Sportit, memorandum i cili përafërsisht ka vlerën e 1,000,000.00€.

z.Xhevdet Maloku, theksoi, i nderuar drejtor po më duket se ke harruar, fjalën e kam për KAB për vitet e ardhshme.

z.Pajtim Balaj, U.D. drejtor i DKRS, theksoi, i nderuar këshilltar z. Xhevdet Maloku pak a shumë e more përgjigjen, nuk kemi mundësi buxhetore për shkak se duhet t'i kryejmë punët që kanë mbetur gjysmë të gjitha ato fusha sportive që kanë mbetur në gjysmë pa u funksionalizuar në fshatra duhet të përfundojnë sivjet, buxheti i vitit të kaluar ka shkuar në suficid, buxhetin që e kemi sivjet nuk mund të iniciojmë

projekte të reja për shkak se është duke u ndërtuar edhe fusha në fshatin Peran mirëpo për vitin tjetër besoj që banorët, komuniteti duhet ta kryejnë pjesën e tyre ta paraqesin kërkesën pastaj besoj se ne kemi buxhet dhe mundësi të zhvillojmë diçka.

z.Ekrem Rrahmani, theksoi, kam një plotësim të pyetjes për drejtorin e DBF-së se po kemi problem kur po e lexojmë KAB-in, se nuk ka emërtime të rrugëve p.sh, shkruan se do të asfaltohen disa rrugë në fshatrat Gllamnik dhe Sibofc, të gjitha ato rrugë janë të emërtuara pse nuk i cekni me emra projektet e rrugëve që do të asfaltohen, sa herë të kaloj andej më ndalin qytetarët dhe më pyesin se cilat rrugë do të asfaltohen dhe nuk e di se cilat rrugë janë ato andaj pyetja ime pse nuk e specifikon emrin e rrugëve që do të asfaltohen dhe gjatësinë e tyre në mënyrë që ta dimë se cilat rrugë do të asfaltohen, sepse mund të jenë dy apo dhjetë rrugë që do të asfaltohen e ne nuk e dimë, këto kisha pasë qejf të jenë më të detajuara dhe ta dimë rregullimin e rrugëve sipas emërtimeve të tyre.

z.Demokrat Hodolli, theksoi, kam pas një pyetje për kryetarin por pasi që kryetari nuk është prezent këtu prapë të njëjtën pyetje po e bëj, janë nda mjetet për krerë lopësh dhe këtu e kam pa një gabim apo vërejtje por pikë së pari ju përgëzoj për iniciativën për subvencionimin me krerë lopësh për fermerët Llapjan.

Kam disa pyetje njëkohësisht dhe disa vërejtje konkrete lidhur me subvencionet për krerë lope, fakt është se keni shpërndarë 108 lopë dhe dhe çdo fermer është dashur të participoj me 570€ për krerë lope e kjo i bie të jetë një vlerë goxha e madhe, pyetjet e mia janë këto çfarë race janë lopët, çfarë moshe kanë, çfarë destinimi kanë a janë për qumësht apo për mish, cila është mosha më e përshtatshme për fermerin, a janë bartëse, nëse po në cilën fazë të bartësisë janë, a janë lopët e shëndosha, unë besoj se ju nuk mundeni me ju përgjigj këtyre pyetjeve asnjëherë sepse ju as vet nuk jeni profesionistë të fushës dhe të komisionit vlerësues, sepse edhe në komisionin vlerësues nuk e keni caktuar profesionistin që duhet, kjo i bie që ju keni blerë lopë pa e njohtë racën, moshën, destinacionin dhe pa e ditur gjendjen e tyre shëndetësore dhe fazën e bartësisë së tyre.

Fermeri Llapjan ka participuar në vlerë prej 570€, pa pedigere ju mund të thoni që lopët janë me dokumentacion përcjellës por kush është ai që mund të përcakton se a mund të përputhen të dhënat me kafshën, kjo përcaktohet vetëm nga ekspertët e fushës përkatëse veterinarë në këtë rast nga mjeku veterinar, ndërsa ju në komisionin për blerje dhe vlerësim keni caktuar personat që janë jo kompetent për këtë domen, kjo besoj se është shkelje dhe totalisht e pa pranueshme, pyetja ime kryesore është pse në komisionin vlerësues nuk ka pasur veterinar apo ndoshta nuk keni menduar të bëni pazare siç keni dashur, shpresoj që mos të përsëriten më këto veprime.

Kryesuesi i Kuvendit, theksoi, nëse dikush nga ju ka diçka për të diskutuar rreth rendit të ditës urdhëroni nëse jo atëherë mos të dalim jashtë pikave të rendit të ditës.

z.Fatmir Rudari, U.D. drejtor i Drejtorisë së Bujqësisë Pylltarisë dhe Zhvillimit Rural-DBPZHR, theksoi, unë do t'i përgjigjem këshilltarit z.Demokrat Hodolli, nuk mundesh me ble diçka apo të kontraktosh diçka nëse nuk i ke specifikat, të gjitha ato që i ceke janë specifika, po më duket pak e pa arsyeshme me i cekë të gjitha këto me moshë e të gjitha po të gjitha ato mëshqerra janë me dokumentacion me pedigree, raca është simental, është e përzier e dedikuar për qumësht dhe për rritjen e viçave.

Specifikat tjera të gjitha mund të vish e ti shikosh në dokumentacion sepse secilit fermer i jepet një kontratë i jepet dokumentacioni i mëshqerrës dhe të gjitha ato janë cek në specifika kur janë kërkuar sa për çmim është e vërtetë se ndoshta çmimi është pak i lartë, ka qenë vetëm një ofertues dhe ai ka qenë përfitues i atyre mëshqerrave por duke u bazuar edhe në çmimin aktual që është në treg do të thotë se është në përputhje me çmimin aktual që është në treg.

z.Demokrat Hodolli, theksoi, a ka mundësi të na tregoni emrat se cilët kanë qenë ata ekspert që i kanë jap këto të dhëna, kush ka qenë ekspert se ju mund të thoni se ka dokumentacion por ekspert nuk ke.

z.Fatmir Rudari, U.D. drejtor i DBPZHR, theksoi, i nderuar z.Demokrat Hodolli ata që ta kanë shkruar fjalimin duhet t'i pyesësh më mirë ti, ekspert i ka drejtorja e Bujqësisë Pylltarisë dhe Zhvillimit Rural gjithë zyrtarët sepse të gjithë e kanë të përfunduar fakultetin e bujqësisë, çka duhet me pas më shumë për ekspert adekuatë kur i gjithë stafi i drejtorisë është me fakultet përkatës e këtë staf unë e kam gjet aty dhe është staf i rekrutuar, ata kanë qenë në komision dhe vetëm i përputhim specifikat të cilat i kanë kërkuar dhe specifikat të cilat kanë ardhë dhe s'ke çka të diskutosh më tepër, këtë punë mund ta bëj secili por edhe ti mund ta bësh.

z.Demokrat Hodolli, theksoi, vitin e kaluar kur janë ndarë mëshqerrat prej tyre kanë qëlluar dy lopë të sëmura.

Kryesuesi i Kuvendit, theksoi, kërkoj nga parafolësi të mos zgjatet më shumë ky debat.

z.Haki Rudari, theksoi, korniza afatmesme buxhetore e Komunës së Podujevës është një dokument i nivelit të lartë strategjik në bazë të cilit janë synimet apo caqet e zhvillimit të përgjithshëm si dhe shpenzimeve qoftë nga të hyrat vetanake ose nëse e marrim në përgjithësi paraqet një dokument përmes të cilit komuna e ka afatin apo kohën e zhvillimit brenda tri viteve, në kuadër të kësaj kornize kemi edhe objektivat të cilat po i lexoj si në vijim; përmirësimi i infrastrukturës së qytetit, përmirësimi i infrastrukturës në fshatra, krijimin e një qyteti të zhvilluar me planin urbanistik, ngritje të nivelit të arsimit duke krijuar kushte të mira për zhvillimin e arsimit dhe duke e lidhur me ekonominë, zhvillim i shëndetësisë duke krijuar shërbime cilësore për qytetarët, rritja e mirëqenies sociale, zhvillimi i kulturës rinisë dhe sportit, përkrahja e bizneseve në mënyrë që të ulet papunësia, zhvillimi i turizmit, zhvillimi i bujqësisë etj.

Të gjitha këto që unë i citova janë në KAB dhe mbi të gjitha në bazë të KAB-it, kemi edhe këto; shtim i efikasitetit, rritje e të hyrave vetanake, kontroll reduktim i shpenzimeve, ngritje të kapaciteteve njerëzore dhe sigurim i disiplinës financiare që është një element shumë i rëndësishëm për ata të cilët e kanë lexuar materialin e që shpresoj të jenë shumë e nuk e di sa janë, e kemi një rritje të grandit të përgjithshme nga vitin 2022 prej 9,160,666.00€, për vitin 2023, kemi rritje prej 12,119,450.00€, për të kaluar në vitin 2024 që kemi rritje 13,000,657.00€, dhe për të arritur në vitin 2025 që kemi rritje 13,000,862.67€, marrë pra në përgjithësi kemi më shumë se 4,000,000.00€ investime e mendoj se nuk është mirë të anashkalohen.

Sa i përket të hyrave nëpër dikasteret dhe kodet tjera unë kam një propozim për buxhet të zyrës së kuvendit komunal se është e vërtetë që për kategorinë mallra dhe shërbime nuk ka mjete të ndara, jemi 35 anëtar/e të kuvendit dhe duhet ta kemi një buxhet andaj unë propozoj një shumë së paku prej 5,000.00€, sepse mund të ketë vizita të delegacioneve nëpër komuna apo shtete tjera të ndryshme dhe është mirë që këtu të fokusohet kjo çështje dhe ta kemi një kod buxhetor në shumë prej 5,000.00€.

Një çështje nëse e analizojmë më tutje kemi disa kode të specifikuara kisha dashur të them vetëm një gjë sa i përket investimeve në terren këtë e kam thënë edhe kur ka qenë në pushtet LDK-ja, po e them edhe tash që të bëhet shpërndarje e investimeve pra mos të bëhet koncentrim të investimeve apo grumbullim të investimeve por të kemi shtrirje dhe investime nëpër lokalitete të ndryshme për arsye sepse këtë buxhet nuk e mirëmbajnë vetëm ato komuna apo ato fshatra që ka investime por për këtë buxhet kontribuojnë edhe banorët e lagjeve dhe fshatrave të tjerë prandaj është mirë që këtë ta ketë para sysh edhe ekzekutivi, marrë në përgjithësi kemi një KAB që në fund është në interes të qytetarëve.

z.Xhevdet Maloku, theksoi, para se të shkojmë në pauzë desha t'i marr dy përgjigjet e pyetje të mia nga drejtori i DPUMMS-së dhe nga ai i DKA-së, nëse ka mundësi para pauzës.

Kryesuesi i Kuvendit, theksoi, do ta përfundojmë këtë pikë të rendit të ditës pastaj do të vazhdojmë me pauzë dhe do të rikthehemi pas pauzës me vazhdimin e pikave të rendit të ditës.

z.Naim Çunaku, theksoi, pa dashur t'i përsërisë të gjitha ato që u folën për KAB-in dhe rëndësinë e këtij dokumenti strategjik që përcakton vijat e zhvillimit të komunës për tri vitet e ardhshme, unë do t'i qasem këtij dokumenti nga një anë tjetër dhe do t'i flas disa fjalë rreth përgatitjes së këtij KAB-i, kornizë kjo

cilat faza do të duhej t'i kalonte deri në momentin kur do të vinte në kuvend për aprovim dhe të finalizohet si një dokument zhvillimor siç e përcaktojnë demokracitë në nivel të lartë zhvillimor e në vendin tonë e kemi një udhëzim administrativ nr.02/2018 të MAPL-së që përcakton standardet minimale të një konsultimi publik siç e kemi kornizën afatmesme buxhetore.

Ky udhëzim administrativ ka për qëllim nxitjen dhe sigurinë nga ana e autoriteteve lokale, pjesëmarrjen e qytetarëve dhe palëve tjera të interesuara gjatë procesit të politikë bërjes dhe vendim marrjes në nivel lokal të promovoj transparencë komunale si dhe të ndikoj në zhvillimin e politikave të qëndrueshme në interes të përgjithshëm, pse e thash këtë se e dimë fazën nëpër të cilën kemi kaluar ne por sa jemi të kënaqur me diskutimet publike që i kemi bërë kolegu nga rajoni ku vijë unë z. Xhevdet Maloku e që të dytë ishim prezent në takimin me qytetarë që u organizua në fshatin Lluzhan dhe në një komunë me territorin më të madh në nivel vendi të paraqiten vetëm 4 diskutime publike për KAB-in, është nën nivelin e përcaktimit të minimumit që e përcakton udhëzimi administrativ ose interesin për ta sjellë qytetarin në vendimmarrje gjegjësisht ta dëgjojmë atë nga taksat e të cilit ne funksionojmë.

Diçka tjetër që më bëri përshtypje e që e kam dëgjuar vazhdimisht si refren, se di a është prezent drejtori i DBF-së këtu ndoshta është mirë me pritë deri sa ai të vijë këtu se për atë po flasë se ai është zyrtari kryesor, komuna është e obliguar të shpallë rezultatet e procesit të konsultimit publik raportin si dhe sqarimet e nevojshme lidhur me arsyet e refuzimit të kërkesave që janë bërë në dëgjimet publike, refrenin për të cilin s'desha të flasë para se të vijë drejtori i DBF-së e që e dëgjova edhe prej një kolegu këtu, ky propozim buxhet është më i madh në vlerë nominale 4,000,000.00€ dhe e dëgjova me vëmendje kolegun kur i paraqiti ato objektiva që i parasheh korniza afatmesme buxhetore që të gjithë i kemi pa se janë menjëherë pas preambulës dhe s'ka si mos ta tërheq vëmendjen ngritja e mirëqenies qytetare.

Është e vërtetë e madhe se pa fajin e askujt se s'dua ta adresoj fajin askund por gjendja e krijuar pandemike në Kosovë pastaj gjendja e konflikteve në arenën ndërkombëtare ka ndikuar drejtpërdrejtë në rritjen rapide të çmimeve në shportën minimale ka bërë që është për të dëshiruar për të folur për mirëqenie mos të them që kemi ardhë në një situatë që të luftojmë për një status kohë për uljen e mirëqenies sociale se për ngritje të saj nuk janë kushtet njëherë, u përmend nga disa koleg këtu çështja e rinisë se më ka rastisë të dëgjoj dhe më ka dhimbtë që sukses i të rinjve tanë sot është se kush po përgatit dokumente gjegjësisht po përgatit një vizë për të migruar jashtë po të ishte kjo gjendje vetëm në komunën tonë do të ishte situatë e lehtë por kjo është gjendje e rënduar në nivel vendi, për mos me zgjatë më tepër po i citoj vetëm dy nene të udhëzimit administrativ që vlejnë për kryesuesin, neni 20 i këtij udhëzimi administrativ thotë kështu; mbikëqyrjen e procesit të konsultimit publik pika 1 kryetari i komunës siguron që projekt propozimet e dorëzuara në kuvend kanë përmbushur standardet minimale për procesin e konsultimit publik.

Kuvendi që u dëgjua në fillim të seancës nga kolegu im z.Qendrim Softolli, e që paraqiti qëndrimin e grupit të këshilltarëve të LDK-së se nuk mund ta votoj këtë dokument me arsyetimin se kuvendi duhet të refuzojë projekt propozimin në rast kur nuk janë përmbushur standardet minimale të konsultimit publik të përcaktuara me udhëzim administrativ dhe kjo na bënë që mos e përkrahim këtë kornizë afatmesme buxhetore, krejt në fund i nderuari kryesues nga ato që i kam dëgjuar bashkë me kolegun z.Xhevdet Maloku në takimin e KAB-t, në fshatin Lluzhan, më ka bërë përshtypje diskutimi i një qytetari që është interesuar për një projekt të tij dhe ndihem moralisht i obliguar që atë kërkesë të tij ta potencoj edhe këtu e këtë propozim u mundova ta gjejë në KAB por atë nuk e pashë as në vitin 2022- 2023 dhe as për vitin 2025, prezent kanë qenë drejtori i DPUMM-së dhe ai DBF-së dhe sigurisht këtyre ju kujtohet kur qytetari Zeçir Retkoceri e përmendi rrugën "Baza e Kështjellës", në gjatësi 2.2km dhe unë nuk mund të flas me përgjegjësi se atë rrugë nuk e kam frekuentuar andaj po i përsërisë fjalët e tij se nuk e di gjendjen faktike. Ai thotë se 17 shtëpi nuk kemi mundësi me lëvizë madje shkon aq larg e thotë se kur të dal deri te

autobusi më duhet t'i fus këpucët në qese ose t'i pastroj, kjo rrugë ishte me gjatësi 2.2km dhe të paktën kërkesë e tij ishte që kjo rrugë të shtrohej qoftë me zhavorr por këtë kërkesë nuk e pashë askund.

Mendoj se për këtë rast kisha dashur një shpjegim prej dy drejtorëve që e kanë dëgjuar këtë kërkesë dhe ai arsyetimi që e keni dhënë në diskutim publik se ne kemi të parapara mjete buxhetore për asfaltimin e rrugëve në gjatësi prej 50-200 e jo në gjatësi prej 2 km është arsyetim shqetësues për mua dhe atë shqetësim të tij po e ngrisë këtu, andaj dua një përgjigje se çka do të veprohet për atë rrugë, cila është gjendja e asaj rruge dhe kur parashihet rregullimi i sajë dhe pse nuk është paraparë rregullimi i sajë për tri vitet e ardhshme.

z.Fatlum Osmani, U.D. drejtor i DBF, theksoi, duke ju falënderuar për vërejtjet për sugjerimet më lejoni që të paraqes një rezymë të shkurtër të këtyre diskutimeve të cilat u bënë, korniza afatmeme buxhetore u cek nga të gjithë dhe nga unë që është një dokument strategjik ku përshkruhen objektivat dhe synimet të cilat i ka komuna e Podujevës përgjatë këtyre tri viteve, normalisht se këto synime dhe këto objektiva janë për brenda disa limiteve buxhetore të cilat i përcakton Ministria e Financave përkatësisht Qeveria e Republikës së Kosovës dhe ka një rritje të dukshme të buxhetit prej afër 4,000,000.00€, për vitin 2023, dhe vazhdon një rritje progresive dhe në qoftë se pastaj e krahasojmë vitin 2022 me vitin 2025, shkojmë te një rritje afër 7,000,000.00€.

Në këtë qarkoren e parë buxhetore nuk përcaktohen limitet e kategorive mirëpo komuna kur e ndërton kornizën afatmesme buxhetore limitet të cilat i përcakton janë edhe kërkesë për Ministrinë e Financave që të aprovohen ato limite të kategorive ekonomike për këtë kornizë buxhetore, normalisht kategoria e pagave është e kalkuluar më saktë, dihet se si kalkulohej pastaj edhe kategoria e mallrave, subvencioneve, komunalive dhe investimeve kapitale dhe e mira është se për secilën kategori ka rritje të buxhetit, për investime kapitale kemi rritje afërsisht prej 2,000,000.00€, krahasuar me vitin 2022, për subvencione prej 900,600.00€, kemi rritje në 1,650,000.00€ gjithashtu kemi edhe një rritje në kategorinë e mallrave për arsye se shumë sektor kanë nevojë më të shtuara në kategorinë e mallrave siç është arsimiti sepse ka një numër të madh të nxënësve në institucionet arsimore dhe për të gjitha këto problematika normalisht që nevojitet buxhet, gjithashtu edhe në DSHPMSH dhe në DSHMS, mirëpo në mënyrën më të theksuar buxheti është rritur te investimet kapitale dhe te subvencionet.

Është në përgjegjësinë e qeverisjes që t'i përcaktoj prioritetet andaj arsyeja pse jemi këtu është që t'i përcaktojmë prioritetet se gjithmonë mundësitë janë shumë më të vogla se sa nevojat dhe kjo qeverisje në këtë KAB i ka përcaktuar disa prioritate që prioritet është arsimiti, ekonomia, kultura, bujqësia, dhe përparësi kanë disa projekte infrastrukturore që janë projekte të mëdha dhe që janë projekte zhvillimore dhe ka një përqendrim më të vogël për projektet që janë më të vogla por normalisht pa i lënë anash as ato se kjo kornizë ka një gjithë përfshirje ashtu siç e cekëm më lartë ku në çdo fshat parashihen investime minimalisht në dy vite në qoftë se ndonjë fshat ka investime në vitin 2023 patjetër do të ketë investime edhe në vitin 2025, të pakta janë ato lokalitete që kanë investime në tri vite për arsye të kufizimeve buxhetore e jo për shkak të vullnetit tonë, ne e kemi për nder me pas prioritet dhe kemi synim se e kemi thënë edhe në premtimet tona edhe në këtë kornizë buxhetore arsimin dhe është shumë e thjeshtë me ditë se sa e kemi prioritet çështjen e arsimit.

Buxheti i Komunës së Podujevës ka një rritje prej 17%, por investimet kapitale në fushën e arsimit janë rritur 17 herë më shumë në rast se i krahasojmë me vitin 2021, kanë qenë 97,582.00€, janë të planifikuar për vitin 2023, 1,660,000.00€, pra kemi rritje të buxhetit prej 17%, kjo rritje e buxhetit është për ndërtim dhe renovim të objekteve të institucioneve arsimore dhe një projekt që e kemi synim dhe e kemi të buxhetuar që është digjitalizimi i institucioneve arsimore do të thotë me këtë buxhet që ka qenë në shumë 97,582.00€, kanë kundërmuar shkollat kurse me këtë buxhet që është do të shkojmë te shkollat e digjitalizuara, bëhet fjalë për një ndryshim radikal për një synim që besoj se çka të flitet rreth çështjes së arsimit pa fol për çështjen e arsimit minimumi mund të them është injorancë.

Te shëndetësia nuk po i ceki të gjitha projektet me emra por me mjetet buxhetore kemi një buxhet gjithëpërfshirës ku sigurohen mjete të mjaftueshme për barëra dhe reagime dhe me kategori tjera të mallrave dhe me shërbime kontraktuese dhe me projekte kapitale siç është bashkëfinancimi me organizatën Chatar Charity, që është një projekt në shumë afër 1,600,000.00€, që vazhdon deri në vitin 2023, në fushën e ekonomisë u cek që kemi pas premtim dhe nuk po e shohim në KAB që ne i kemi jep prioritet, në DPZHE edhe ky sektor për herë të parë hartohet në buxhetin e vitit 2022 dhe në këtë KAB të cilët e kem para vetës ku janë 450,000.00€, investime kapitale, pjesë e saj është projekti më madhor ku jemi në procedura të shpronësimit siç është zona industriale me një hapësirë 37.2 ha, ku janë procedurat e shpronësimit në bashkëpunim me AKP-në dhe Qeverinë e Republikës së Kosovës dhe për herë të parë ka mjete në kategorinë e subvencioneve që janë 300,000.000€, ku 200,000.00€ shkojnë për mbështetje të kredive prodhuese, subvencionimin e normave të interesit ku ka një sinkronizim edhe me politikat e qeverisë ku mbështeten me 20%, investimi si kryegjë edhe ne i mbështesim interesat dhe besoj se do të japim një impuls zhvillimit të prodhimit.

Në fushën e kulturës ka 5 fishim të buxhetit për subvencione nga 40,000.00€ në 200,000.00€, me të drejtë dikush mund të thotë pse nuk janë 2,000,000.00€ por tash 200,000.00€, nuk janë por ka 5 fishim të vlerës buxhetore nëse e marrim si prioritet se për të përcaktuar prioritetet jemi këtu, andaj si prioritet këto janë të përcaktuara shumë saktë dhe drejtë edhe në opozitë kur kemi qenë këto prioritetet i kemi paraqit në asamble komunale, tani jemi në qeverisje dhe këto prioritetet i kemi në kornizë, nuk i kemi rrugicat por e kemi arsimin, kemi projekte jashtëzakonisht të mëdha infrastrukturore siç është përfundimi i rr."Skenderbeu", rr."Xhemajl Mustafa", ku ka edhe bashkëfinancim me qeverinë rruga përgjatë lumit Llap, vlen të ceket edhe shuma prej 2,150,000.00€ që është shumë për ndërtimin e rrjetit të kanalizimeve dhe kolektorit të ujërave të zeza, vazhdimi i kolektorit të ujërave të zeza ka një kosto prej 1,500,000.00€, por më parë ky ka kushtuar 5,000,000.00€, tash këtu kemi një përlogaritje të thjeshtë për diferencën. Pjesa tjetër e mjeteve do të shpërndahet dhe shpresojmë se me këto mjete do të trajtohet e gjithë problematika e trajtimit të ujërave të zeza dhe për rregullimin e hapësirave publike janë 2.6 milion euro dhe për ndërtimin e trotuareve 1.6 milion euro, andaj besojmë se me këtë KAB do ti japim një drejtim të duhur zhvillimit të komunës së Podujevës, për prioritetet nuk ka asnjë dyshim dhe nuk mundesh ta kontestosh asnjërin prej tyre se këto prioritetet janë prioritetet të cilat i nevojiten Komunës së Podujevës, këtu me të drejtë pat kërkesa që të ketë më shumë buxhet mirëpo këto janë limitet buxhetore por krahasimet tregojnë dhe flasin shumë, kur flet numri duhet të heshtim të gjithë, kështu që unë ju ftoj ta votoni këtë KAB, për vërejtje, sugjerime dhe diskutime jam i hapur për të gjithë kur vjen çështja e buxhetit se normalisht ky është një dokument strategjik dhe nuk e merr formën ligjore për buxhet në muajin shtator dhe të gjitha përmirësimet që mund të bëhen dhe konsiderojmë se janë të nevojshme për tu bërë do të inkuadrohen në buxhet në muajin shtator.

z.Naim Çunaku, theksoi, i nderuari drejtor i DBF-së unë mendova që këtë pjesën ekspozenë për arsyetimin e kornizës e jepe që në fillim dhe të njëjtën e dëgjova edhe në fund dhe po ngjason si refren i njëjtë sigurisht se është ngulitë si në ato debatet që të gjitha i kam përcjellë dhe në të gjitha ka qenë i njëjti refren se ne e kemi ngritë buxhetin për 4,000,000.00€, është e vërtetë se është ngritë buxheti për 4,000,000.00€, por nuk mund t'i shitet kjo qytetarit apo dikujt tjetër që me këtë ngritje buxhetore kemi arrit të parashohim më shumë projekte, arsyeja pse gjithçka ka ndryshuar dhe ne këtu po jetojmë dhe e dimë se ka ndryshuar kostoja e çdo projekti, ka ndryshuar edhe inkasomi i të hyrave dhe rritja e buxhetit në nivel qendror, më trego drejtor a e keni ngritë përqindjen e ndarjes buxhetore për komunën e Podujevës se normalisht kur të rritet buxheti në nivel qendror rritet nominalisht edhe buxheti për komunat mirëpo edhe atëherë dhe tani e ke të njëjtën përqindje.

Të thuhet sot se kemi arrite me ngritë buxhetin e këtu jetojmë dhe e dimë se deri dje sa është një akcizë dhe një TVSH për një produkt elementar të nisemi nga nafta ose vaji atëherë është inkasuar një tvsh 17% e

tani fitohen 51cent prej saj ose një akcizë që fitohet më shumë se 80 cent, nuk më duket diçka që mund të numërohet si sukses përkundrazi këtë e thash edhe më parë se këtë gjendje nuk e ka krijuar një subjekt politik por është e krijuar në nivel global por mos të tentojmë ato që kanë ndodh si ndikim i ndryshimeve globale t'i adresojmë dhe t'ia faturojmë veti si sukses dhe kjo më bëri përshtypje i nderuar drejtor se kjo nuk mund të kaloj si qeverisjet e kaluara që kanë parapa rrugë e rrugica mos more drejtor se asgjë mangu se ke lënë as ti, këqyr sa ke nda mjete për zhavorr dhe në të njëjtën kohë lëvdohesh se kaq rrugë i kam shtruar në asfalt dhe në të njëjtën kohë i shtron rrugët në zhavorr, cila është logjika këtu nëse një rrugë është shtruar në asfalt, cila është logjika që të shtrohen rrugët në zhavorr, pyetja tjetër është se a ke pa dikund mjete për finalizimin e shtresës së dytë të asfaltit për rrugët e asfaltuara, e dini që s'jam ekspert i fushës por kam dëgjuar që çdo rrugë që është e shtruar me pjesën e parë për një afat shumë të shkurtër kohor duhet të shtrohet shtresa e dytë e asfaltit për finalizim të asaj rruge në mënyrë që mos të dëmtohet cila do rrugë qoftë ajo andaj sa mjete janë parapa për ato rrugë.

Sa mjete janë parapa për kulturë ku e kam përcjellë kulturën ndarjen e trashëgimisë dhe ndërtimin e fushave sportive sepse kolegu z.Haki Rudari e bëri një digresion por Hakiun e kuptoj se e kam koleg moti dhe e kuptoj se vjen nga sfera e arsimit dhe nuk na erdh aq mirë kur tha nuk e di se a keni lexuar se nuk jemi nxënës të shkollës dhe të na pyet se a kemi lexuar ose jo se së fundi është e drejtë e imja edhe me lexuar edhe mos me lexuar dhe nuk japë llogari, ti vendosma notën 1 pasi që je mësuar të notosh por këtu nuk i kemi ato dhe varësisht sa dikush dëshiron të jetë në nivel të detyrës e lexon apo lexon.

Drejtor kishim dashur të kuptojmë se këtu të paktën ekzekutivi nuk duhet të dal në rolin e komisarëve por është në rolin e menaxhimit të një takse të qytetarëve pa ngjyrimë partiake, unë ju pyeta se a kemi qenë së bashku në dëgjimin publik në fshatin Lluzhan ku aty në atë takim ka qenë edhe drejtori i DPUMM-së dhe më ka shqetësuar përgjigja juaj që keni thënë se kemi mjete financiare ta shtrojmë rrugë në gjatësi 1 km por rrugën e juaj në gjatësi 2 km jo, po cili është prioriteti rruga e atij që është në gjatësi 2 km apo e atij që është 50 metra, nuk mora përgjigje drejtor, të njëjtën ekspozë si të fillimit si të fundit e dëgjova.

Kryesuesi i Kuvendit, theksoi, në qoftë se nuk ka tjerë të interesuar për të marrë fjalën atëherë shkojmë në votim të KAB-it për vitet, 2023/2025, të Komunës së Podujevës, atëherë e kemi edhe një diskutues urdhëro merreni fjalën.

z.Xhevdet Maloku, theksoi, para se të kalojmë në votim ju rikujtoj se i kam parashtruar dy pyetje dhe ende s'kam marrë përgjigje.

z.Leutrim Krasniqi, U.D. drejtor i Drejtorisë së Planifikimit Urban dhe Mbrojtjes së Mjedisit-DPUMM, theksoi, sa i përket përgjigjes së Këshilltarit z. Xhevdet Maloku, përgjigjen e ka marrë në kornizën afatmesme buxhetore në debatin publik të mbajtur në fshatin Lluzhan, e përmendi edhe drejtori por për hir të transparencës edhe të qytetarëve po e përmendi edhe njëherë për ta sqaruar më konkretisht se cila është ndoshta arsyeja pse në këtë rast në fshatin Sallabajë nuk janë parapa investime për vitin 2023, duke marrë parasysh që buxheti është i limituar dhe i kufizuar dhe synimet, caqet për këtë buxhet janë të ndryshme në kuadër të DPUMM-së, atëherë kemi bërë një ndarje racionale në bazë të kërkesave të fshatrave të caktuara për këtë arsye jo vetëm fshati Sallabajë por edhe fshatrat e tjerë siç e përmendi drejtori janë të ndara në kuadër të dy viteve për të pas një ndarje racionale për gjithë territorin e Komunës së Podujevës kur e dimë se ka një sipërfaqe relativisht të madhe dhe mundësitë janë pak më të vogla që secilën kërkesë ndoshta të kemi mundësi ta realizojmë për një afat të shkurtër kohor, mirëpo këto do të realizohen për një afat më të gjatë kohor dhe besoj se eventualisht brenda dy ose tri viteve do të përfundojnë të gjitha kërkesat për asfaltim.

z.Avni Fetahu, U.D. drejtor i DKA, theksoi, lidhur me pyetjen e juaj për shkollën e fshatit Lluzhan sa i përket investimeve në përmirësim të infrastrukturës do të ketë, jemi në prag të lidhjes së kontratës edhe për hapësirën e sallës së sportit por edhe për hapësirën e gjithmbarshme të shkollës, ndërsa për ndërtimin e shkollës së re pa marrë parasysh se rruga kah do të lëvizë nuk kemi mundur të planifikojmë buxhet duke e

ditur gjendjes se disa shkolla në disa fshatra i kemi pas më me prioritet për shkak gjendjes së rëndë të tyre që kanë qenë.

z.Xhevdet Maloku, theksoi, faleminderit i nderuari kryesues, faleminderit për përgjigjen i nderuari drejtor i DKA-së, për keqardhje ju drejtor i DPUMM-së nuk më keni dhënë kurrfarë përgjigje në debat publik dhe mos kërko me i ikë përgjegjësisë.

Në debat publik nuk kam marrë kurrfarë përgjigje nga ana e juaj kur keni thënë se do të dal në diskutim publik në kuvend, sot të kam bërë pyetjen dhe po bie në kundërshtim me drejtorin e DBF-së i cili tha se çdo dy vite çdo lokalitet do të përfshihet, nëse jo në vitin 2022, në vitin 2024, fshati Sallabajë nuk është i përfshirë as në vitin 2022, e as në vitin 2023, që do të thotë se kemi më shumë se dy vite që nuk parashihen investime në këtë fshat.

Kryesuesi i Kuvendit, theksoi, nëse nuk ka tjerë të interesuar për të marrë fjalën atëherë e vë në votim Kornizën Afatmesme Buxhetore 2023/2025 të Komunës së Podujevës, sipas materialit përkatës të dërguar me thirrjen e mbledhjes.

Pas votimit, Kryesuesi i Kuvendit konstatoi se nga 30 anëtar/e të Kuvendit sa ishin prezent në sallë, me 17 vota PËR, 12 vota KUNDËR dhe 1 votë të PËRMBAJTUR, miratohet Korniza Afatmesme Buxhetore 2023/2025 e Komunës së Podujevës, sipas materialit përkatës të dërguar me thirrjen e mbledhjes.

Pas kërkesave të një numri të anëtarëve të Kuvendit dhe përkrahjes nga shumica e anëtarëve të Kuvendit, Kryesuesi i Kuvendit jep pauzë për 1 orë dhe atë nga ora 12:30.

Pas pauzës, mbledhja vazhdon duke filluar në ora 14:00, dhe konstatohet se për momentin të pranishëm në sallë janë 29 anëtar/e të Kuvendit, kështu që kuorum ka dhe mund të vazhdohet me punë.

2. Propozim Vendimi për caktimin e lokacionit për ndërtimin e objektit - Çerdhe Publike në hapësirën e SHFMU “Xheladin Rekaliu” në Podujevë

z.Avni Fetahu, U.D. drejtor i Drejtorisë së Arsimit - DKA, duke paraqitur fjalën hyrëse rreth këtij propozim vendimi, theksoi, para jush keni një propozim vendimi për caktimin e lokacionit për ndërtimin e objektit - çerdhe publike në hapësirën e SHFMU “Xheladin Rekaliu” në Podujevë, ky propozim vendim vjen si rezultat i kërkesës që kemi pas nga Ministria e Arsimit për të shfrytëzuar fondet e IPA-3 për të ndërtuar një çerdhe në atë lokalitet ku është më se e rëndësishme andaj kërkoj nga ju përkrahje për të vazhduar me procedurat tjera.

z.Qëndrim Softolli, në emër të Grupit të LDK-së, theksoi, ne përkrahim këtë propozim.

z.Artrit Mulliqi, në emër të Grupit të LVV-së, theksoi, e përkrahim propozim vendimin për ndërtimin e çerdes së re publike në lokacionin e caktuar duke i parë nevojat e atij lokaliteti për një çerdhe publike që janë shumë të mëdha, një numër i madh i hulumtimeve që kanë të bëjnë me zhvillimin e hershëm të fëmijëve konfirmojnë se përvoja me të cilën ballafaqohet fëmija në fëmijërinë e hershme paraqet mendim kritik për suksesin afatgjatë në përgjithësi në jetë e një ndër përvojat e para të fëmijës është ambienti në të cilin fëmija zhvillohet.

Ambienti stimulues për mësim të hershëm ua avancon zhvillimin e hershëm fëmijëve, nxitë shkathhtësitë për mendim kritik dhe kreativ të fëmijëve, ashtu fëmijët bëhen të vetëdijshëm për multikulturalizmin dhe ekzistimin e dallimeve ndërsa e fuqizon edhe procesin e gjithmbarshëm të mësimi dhe të zhvillimit fizik,

emocional, social në kognitivt ose të gjethësuar kështu që ne urojmë që ky objekt të shkojë mbarë e mirë dhe në shërbim të komunitetit dhe në shërbim të fëmijëve që do të hyjnë në të.

z.Gazmend Islami, në emër të subjektit OBKD, theksoi, si përfaqësues i OBDK, e përkrahi këtë propozim natyrisht që e inkurajoj drejtorin që mos të jetë vetëm kjo çerdhe por të vazhdojmë edhe me çerdhe tjera në fshatra në mënyrë që të kemi një jetë sa më të mirë për të rinjtë tanë.

znj.Mimoza Abdullahu, në emër të Grupit të PDK-së, e përkrahi këtë iniciativë për ndërtimin e çerdheve të reja.

Kryesuesi i Kuvendit, theksoi, siç po shihet nga diskutimet të gjitha grupet e këshilltarëve të subjekteve politike e përkrahin këtë propozim vendim edhe unë mendoj se kjo është në të mirë të qytetarëve andaj e vë në votim propozim vendimi për caktimin e lokacionit për ndërtimin e objektit - çerdhe publike në hapësirën e SHFMU “Xheladin Rekalii” në Podujevë, sipas materialit përkatës të dërguar me thirrjen e mbledhjes.

Pas votimit, Kryesuesi i Kuvendit konstatoi se njëzëri, me 29 vota PËR, nga anëtarët e Kuvendit sa ishin prezent në sallë, miratohet Propozim Vendimi për caktimin e lokacionit për ndërtimin e objektit - Çerdhe Publike në hapësirën e SHFMU “Xheladin Rekalii” në Podujevë, sipas materialit përkatës të dërguar me thirrjen e mbledhjes.

3. Propozim Vendimi për vënie në diskutim publik:

- *Arsyeshmëria profesionale për shpalljen e zonës “Ushton Lumi” në Popovë si zonë të mbrojtur të natyrës*
- *Elaborati: Studimi për arsyeshmërinë profesionale për marrjen në mbrojtje të vlerës së natyrës “Trungu i Qarrit” (quercus cerris), në fshatin Lupç i Poshtëm*

z.Hilmi Hoxha, Kryesuesi i Kuvendit, theksoi, sa i përket këtij propozim vendimi dhe arsyeshmërisë së tij fjalën ia kalojmë drejtorit të DPUMM-së.

z.Leutrim Krasniqi, U.D. drejtor i Drejtorisë së Planifikimit Urban dhe Mbrojtjes së Mjedisit-DPUMM, duke paraqitur propozimin në fjalë, theksoi, për këtë mbledhje kuvendit i propozoj dy pika për vënie në diskutim publik e para është Arsyeshmëria profesionale për shpalljen e zonës “Ushton Lumi” në Popovë si zonë të mbrojtur të natyrës dhe e dyta është - Elaborati: Studimi për arsyeshmërinë profesionale për marrjen në mbrojtje të vlerës së natyrës “Trungu i Qarrit” (quercus cerris), në fshatin Lupç i Poshtëm, që të hyjnë në kuadër të mbrojtjes së monumenteve të natyrës.

Për pikën e parë “Ushton Lumi” në Popovë si zonë të mbrojtur të natyrës që është e pasur me vlera të larta të natyrës të karakterit hidrologjik, gjeomorfologjik, peizashor, edukativo arsimor, kulturor turistik, gjithashtu pjesa përreth lumit është e pasur me biodiversitet me lloje të ndryshme të florës dhe faunës dhe të ujërave të ëmbla, kjo zonë po ashtu paraqet vlera të larta të natyrës estetike të veçanta me rëndësi shumë dimensionale prandaj është një zonë shumë e rëndësishme për mbrojtje për shkak të vlerave natyrore, formës, pamjes së bukur që ka propozohet që të shpallet si zonë e mbrojtur në kuadër të kriterëve të IUCN-së, që hyn në kategorinë e 5 si peizazh i mbrojtur.

Sa i përket propozimit të dytë që është - Elaborati: Studimi për arsyeshmërinë profesionale për marrjen në mbrojtje të vlerës së natyrës “Trungu i Qarrit” (quercus cerris), në fshatin Lupç i Poshtëm, ky është një monument që është propozuar të hyj në kuadër të mbrojtjes së monumenteve të natyrës që sipas kornizës së klasifikimit të zonave të mbrojtura tokësore dhe detare që është në kuadër të IUCN-së, “Trungu i

Qarrit” (quercus cerris),përndryshe sipas vlerësimeve të bëra ka një moshë afërsisht 400-450 vite i vjetër andaj ftoj që të votohet në kuadër të hapjes së diskutimeve publike këto dy propozime.

z.Ekrem Rrahmani, në emër të Grupit të LDK-së, theksoi, e përkrahim propozim vendimin e drejtorit të DPUMM-së për shpalljen e zonave të mbrojtura për Arsyeshmëria profesionale për shpalljen e zonës “Ushton Lumi” në Popovë si zonë të mbrojtur të natyrës dhe Elaborati: Studimi për arsyeshmërinë profesionale për marrjen në mbrojtje të vlerës së natyrës “Trungu i Qarrit” (quercus cerris), në fshatin Lupç i Poshtëm të Komunës së Podujevës.

znj.Drita Pajaziti, në emër të Grupit të LVV-së, theksoi, edhe ne si grup i LVV-së i përkrahim propozimet në fjalë dhe mendoj se në Komunën e Podujevës ka edhe shumë hapësira që duhet të jenë në mbrojtje ligjore.

z.Bahskim Sylja, në emër të Grupit të PDK-së, theksoi, edhe ne e përkrahim këtë propozim vendim.

z.Florent Hasani, theksoi, meqenëse jemi te kjo pikë kam një pyetje për drejtorin e DPUMM_së, objektet që po ndërtohen në malet rreth liqenit të Batllavës ku nga to duken se janë 5-6 katëshe a janë të pajisura me leje.

z.Leutrim Krasniqi, U.D. drejtor i DPUMM, duke i’u përgjigjur parafolësit, theksoi, duke pasur parasysh se zonat përreth liqenit të Batllavës janë të shpallura si zona të mbrojtura prej vitit 2013, pastaj edhe në kuadër të udhëzimit administrativ për mirëmbajtjen e pellgjeve lumore të liqeneve ndryshme në zonën e liqenit të Batllavës ka pasë kërkesa mjaftë të mëdha duke filluar prej kohës që kam ardhur deri më sot mirëpo jo të gjithë i fitojnë kushtet, kjo për shkak të përcaktimeve dhe arsyeve që është shpallur si zonë e mbrojtur, kështu që në gjithë zonën përreth liqenit të Batllavës eventualisht mund të them se janë 2 ose 3 leje që janë lëshuar kurse pjesa tjetër mund të them se janë bërë me procedura të shpejta.

z.Florent Hasani, theksoi, në bazë të hartës zonale që e kemi votuar në këtë kuvend ndërtimi i objekteve 5-6 kat në ato male rreth liqenit dihet se është e ndaluar dhe një i tillë duke në pjesën mes liqenit dhe cilët janë hapat që ndërmerren më tutje për ta ndaluar ndërtimin, çfarë hapash keni menduar që duhet ndërmarr.

z.Leutrim Krasniqi, U.D. drejtor i DPUMM, sërish përgjigje parafolësit, theksoi, tash për hapat e më tutjeshëm saktësisht ndoshta do të fliste drejtori i drejtorisë së inspeksionit por meqenëse drejtori nuk është prezent këtu nuk kam kompetencë që të përgjigjem, e kuptueshme është po kjo është situata.

Sa i përket të gjitha ndërtimeve të bëra i nderuari këshilltar z.Florent Hasani po thuhet së bashku me drejtorin e DI-së, kemi pasur takime të shumta me Ministrinë e Mjedisit dhe Planifikimit Hapësinor dhe me Agjencionin Pyjor të Kosovës me të vetmen arsye me ndal këtë progres me ndërtime të shumta të cilat edhe ju i keni pa që e kanë degraduar mjaft shumë edhe mjedisin në hapësirën e Batllavës, sigurisht që ndërtimet në një aspekt duhet lejuar mirëpo në kuadër të kushteve të cilat i cakton DPUMM dhe jo ndërtime të cilat bëhen në formë vetanake dhe pa leje.

Kryesuesi i Kuvendit, theksoi, vetëm ju lus që mos të kalojmë në një pikë tjetër të rendit të ditës.

z.Florent Hasani, theksoi, pika e rendit të ditës ishte në kuadër të zonave të mbrojtura dhe dihet se zona e liqenit të Batllavës është zonë e mbrojtur.

z.Ragip Fetahu, theksoi, unë jam pro që secila pasuri natyrore e komunës tonë të jetë në mbrojtje mirëpo jam kundër lokalizmave, në këtë rast kemi dy monumente të mbrojtjes së natyrës që u propozuan nga drejtori i drejtorisë përkatëse mirëpo që të dyja janë në një lokacion shumë të afërt mes veti do të ishte mirë që në të njëjtën kohë të vihej në mbrojtje lumi i fshatit Kaçandoll, Shala e Bajgores, burimi i rrjedhës së lumit Llap në fshatin Murgull dhe të sillen si pako këtu dhe si të tilla do ti sjellin perspektivë turizmit në komunën tonë e jo të ndalemi në çështje të tilla lokale, unë mendoj se kjo është e natyrës lokale edhe pse unë e respektoj si vendim, nuk është se sjellë ndonjë dobi shumë të madhe për komunën tonë.

Kryesuesi i Kuvendit, theksoi, i nderuar këshilltar z. Ragip Fetahu, kjo është vetëm një nismë dhe nuk do të thotë se ka përfunduar dhe është për dy monumente të caktuara, në një legjislaturë tjetër ku kam qenë unë këshilltar i kuvendit janë fut nën mbrojtje ligjore edhe shumë monumente tjera por është mirë që edhe monumentet tjera të futen nën mbrojtjen ligjore.

z.Leutrim Krasniqi, U.D. drejtor i DPUMM, theksoi, sigurisht që këto dy pika nuk do të jenë të parat dhe të fundit por se do të jenë veç se të parat, kështu që ne do të vazhdojmë me procedurat tjera për mbrojtjen e zonave të cilat me të vërtetë e meritojnë për zonat të cilat kanë vlera të larta të natyrës të biodiversitetit por edhe vlera që me të vërtetë janë të nevojshme që të ruhen për të ardhmen.

z.Pajtim Balaj, U.D. drejtor i DKRS-së, theksoi, lidhur me njërin prej burimeve të lumit Llap që është kroi i konakut për këtë sa isha drejtor i DPZHE së bashku me shoqatën e bjeshkatarëve Llapi dhe me klubin alpinistëve Prishtina dhe Agjencionin për Mbrojtjen e Natyrës e kemi vizituar atë vend dhe janë bërë matjet dhe sa mbaj në mend ka qenë në proces përgatitja e dokumentacionit për futjen në mbrojtje ligjore mirëpo kemi mbet në pritje për me i sjellë dokumentacionet agjencioni.

Kryesuesi i Kuvendit, theksoi, në qoftë se s'ka tjerë të interesuar për ta marrë fjalën atëherë e vë në votim Propozim Vendimi për vënie në diskutim publik: - Arsyeshmëria profesionale për shpalljen e zonës "Ushton Lumi" në Popovë si zonë të mbrojtur të natyrës, si dhe - Elaborati: Studimi për arsyeshmërinë profesionale për marrjen në mbrojtje të vlerës së natyrës "Trungu i Qarrit" (quercus cerris), në fshatin Lupç i Poshtëm, sipas materialit përkatës të dërguar me thirrjen e mbledhjes.

Pas votimit, Kryesuesi i Kuvendit konstatoi se njëzëri, me 29 vota PËR, nga anëtarët e Kuvendit sa ishin prezent në sallë, miratohet Propozim Vendimi për vënie në diskutim publik: - Arsyeshmëria profesionale për shpalljen e zonës "Ushton Lumi" në Popovë si zonë të mbrojtur të natyrës, si dhe - Elaborati: Studimi për arsyeshmërinë profesionale për marrjen në mbrojtje të vlerës së natyrës "Trungu i Qarrit" (quercus cerris), në fshatin Lupç i Poshtëm, sipas materialit përkatës të dërguar me thirrjen e mbledhjes.

4. Formimi i Komisionit për hartimin e draft Rregullores për Orarin e Punës së Bizneseve që operojnë në territorin e Komunës së Podujevës.

z.Hilmi Hoxha, Kryesuesi i Kuvendit, theksoi, ne në një mbledhje kemi ndërhy në këtë rregullore i kemi bërë disa ndryshime tani ka ardhë propozimi nga DPZHE për formimin e një komisioni prej 9 anëtarësh prej tyre 5 anëtarë të jenë nga kuvendi dhe 4 anëtarë nga ekzekutivi.

z.Vigan Salihu, U.D. drejtor i Drejtorisë së Planifikimit dhe Zhvillimit Ekonomik-DPZHE, theksoi, duke paraqitur fjalën hyrëse rreth këtij propozimi, theksoi, ashtu siç jemi dakorduar në mbledhjen e fundit tani është propozim vendimi për formimin e komisionit lidhur me hartimin e draft rregullores për Orarin e Punës së Bizneseve që operojnë në territorin e Komunës së Podujevës, Nga ekzekutivi i propozoj këta emraz z.Bahri Selim, znj.Antoneta Ejupi, z.Besnik Mulliqi, dhe unë Vigan Salihu nga DDPZHE, ndërsa nga subjektet politike mbetet t'i propozojnë anëtarët e tyre nga shefat e grupeve të tyre.

z.Valon Demolli, në emër të Grupit të LDK-së e propozoi z.Ekrem Rrahmanin.

znj.Adelinë Stublla, në emër të Grupit të LVV-së e propozoi z.Ardi Hasanin.

znj.Mimoza Abdullahu, në emër të Grupit të PDK-së e propozoi z.Bashkim Sylën.

z.Ragip Fetahu, theksoi, propozoj që për anëtar në këtë komision të jetë z.Arbnor Fazliu nga radhët e AAK-së.

Kryesuesi i Kuvendit, theksoi, nga OBKD unë e propozoj z.Gazmend Islami, vetëm pak mos të ngutemi sepse në të gjitha komisionet duhet ta kemi të përfshirë edhe strukturën gjinore e në këtë rast po na del një komision me strukturë gjinore 100% të përfaqësuar nga gjinia mashkullore, andaj mos të ngutemi për votim.

z.Naim Çunaku, theksoi, në njërin nga seancat e kaluara ka qenë propozim i këtij kuvendi për pezullim të dispozitave të caktuara të rregullores për orarin e punës së bizneseve që operojnë në territorin e Komunës së Podujevës dhe nga kuvendi ka dalë një propozim për formimin e një komisioni të cilin sot po e bëjmë, krejt çka kisha apeluar te ekzekutivi në këtë rast te drejtori i DPZHE, nuk e di se sa jemi në përputhje me një rregullore të MAPL-së, nr.02/2021, që parasheh procedurat e hartimit dhe publikimit të akteve normative të komunës, që në një formë me këtë komision miks s'di si ka menduar të funksionoj në çfarë forme se një zyrtar i ekzekutivit e bënë këtë draftin fillestar pastaj ai draft del në diskutim publik. Ndërsa në këtë formën qysh ka ardhë ky draft nuk po e vë në faj drejtorin se ka ardhë një propozim kësio fare nga kuvendi dhe ky është gjendur mes dy zgjidhjeve, të shkoj sipas procedurës që e ka miratuar ky kuvend dhe formës që është e përcaktuar ndryshe, ndërsa ai shqetësimi i juaj gjinor edhe ai e ka vendin e vet dhe nuk di dhe nuk dua t'i japë më shumë veti të drejtë të flasë më shumë për këtë mirëpo drejtori duhet ta ketë parasysh rregulloren për hartimin e akteve.

z.Gazmend Islami, theksoi, meqenëse kjo është një çështje shumë e ndjeshme për të cilën edhe z.Naim Çunaku diskutoj por kërkesa jonë atëherë ka qenë që të bëhet një komision ashtu siç u propozua tani, unë mendoj që nuk është ndesh me ligjin, është mirë që bashkarisht ta gjejmë gjuhën e përbashkët duke i mbrojtur interesat e qytetarëve tanë por edhe të bizneseve që ky komision të funksionoj dhe ta sjellë para kuvendit dhe të përkrahet nga të gjithë sepse është një temë e ndjeshme dhe besoj se don një diskutim të thellë për shkak se ne e dimë që dita e diele është ditë pushimi tash ditën e diele janë duke punuar bizneset dhe e dimë se me çfarë pagash janë duke punuar, në qoftë se nuk është e kundërligjshme unë jam për që të funksionoj kjo formë qysh është propozuar prej drejtorit.

znj.Adelinë Stublla, theksoi, i nderuari Kryesues ne e zëvendësojmë propozimin tonë z.Ardi Hasani me znj.Drita Pajaziti, për shkak të strukturës gjinore.

Kryesuesi i Kuvendit, theksoi, nëse s'ka pyetje dhe diskutime tjera atëherë e hedh në propozimi për formimin e Komisionit ad-hoc për hartimin e draft Rregullores për Orarin e Punës së Bizneseve që operojnë në territorin e Komunës së Podujevës, në këtë përbërje:

1. Bahri Selimi, anëtar nga radhët e Ekzekutivit
2. Antoneta Ejupi, anëtare nga radhët e Ekzekutivit
3. Besnik Mulliqi, anëtar nga radhët e Ekzekutivit
4. Vigan Salihu, anëtar nga radhët e Ekzekutivit
5. Ekrem Rrahmani, anëtar nga radhët e Kuvendit
6. Drita Pajaziti, anëtare nga radhët e Kuvendit
7. Bashkim Sylja, anëtar nga radhët e Kuvendit
8. Arbnor Fazliu, anëtar nga radhët e Kuvendit
9. Gazmend Islami, anëtar nga radhët e Kuvendit

Pas votimit, Kryesuesi i Kuvendit konstatoi se nga 29 anëtar/e të Kuvendit sa i shin prezent në sallë, me 27 vota PËR, 1 votë KUNDËR dhe 1 votë të PËRMBAJTUR, me vendim miratohet propozimi për formimin e Komisionit ad-hoc për hartimin e draft Rregullores për Orarin e Punës së Bizneseve që operojnë në territorin e Komunës së Podujevës, në këtë përbërje:

- 1. Bahri Selimi, anëtar nga radhët e Ekzekutivit*
- 2. Antoneta Ejupi, anëtare nga radhët e Ekzekutivit*
- 3. Besnik Mulliqi, anëtar nga radhët e Ekzekutivit*
- 4. Vigan Salihu, anëtar nga radhët e Ekzekutivit*
- 5. Ekrem Rrahmani, anëtar nga radhët e Kuvendit*
- 6. Drita Pajaziti, anëtare nga radhët e Kuvendit*
- 7. Bashkim Sylja, anëtar nga radhët e Kuvendit*
- 8. Arbnor Fazliu, anëtar nga radhët e Kuvendit*
- 9. Gazmend Islami, anëtar nga radhët e Kuvendit*

5. Propozim Vendimi për caktimin e lokacionit për ndërtimin e Pishinës gjysmë Olimpikë në Podujevë

z.Pajtim Balaj, U.D. drejtor i Drejtorisë së Kulturës Rinisë dhe Sportit-DKRS-së, duke e paraqitur fjalën hyrëse rreth kësaj pike, theksoi, siç e dini Komuna e Podujevës qëndron më mirë në aspektin infrastrukturor se sa shumë komuna tjera, megjithatë nevojat e sportistëve tanë janë të mëdha e ndër nevojat më të mëdha është edhe krijimi i infrastrukturës për sportet e ujit për notuesit tanë, klubet e zhytësve po erdhe për shkollat, andaj bazuar në këtë dhe në planifikimin e Ministrisë së Kulturës Rinisë dhe Sportit për ndërtimin e 7 pishinave gjysmë olimpikë, unë besoj se Komuna e Podujevës si Komuna me territorin më të madh në nivel të Republikës së Kosovës dhe që renditet komuna e 7 të sa i përket numrit të banorëve e meriton ta ketë njëren pishinë prej tyre.

Në emër të Kryetarit të Komunës propozoj propozim vendimin për caktimin e lokacionit për ndërtimin e pishinës gjysmë olimpikë në Podujevë, me këtë vendim caktohet lokacioni me destinim për ndërtimin e pishinës gjysmë olimpikë në Podujevë si në vijim; paluajtshëritë e evidentuara, certifikata pronësore me nr.08-942-06-0039319/22, në njësinë kadastrale parcelë P-71712062-02153-2, pronë komunale me sipërfaqe 30 ari, lloji i shfrytëzimit të parcelës bujqësore arë e klasës së parë, shfrytëzimi aktual i parcelës arë, zona kadastrale Podujevë sipas certifikatës pronësore, kopjes së planit dhe skicës ortofoto si dhe parcela afër saj me sipërfaqe prej 22 ari lloji i shfrytëzimit i njëjtë për të cilën paraprakisht jemi konsultuar edhe me DPUMM-në, nëse mund të ndërtohet në këtë pjesë dhe kemi marrë një konfirmim që mund të vazhdojmë tutje. Bazuar në këto propozoj që ky kuvend ta aprovojë propozimin e DKRS-së, për caktimin e lokacionit, pas kësaj vjen faza projektimit dhe kërkesa jonë në ministri për ndërtimin e sajë e që jam optimist se ne mund të jemi një nga përfituesit.

z.Valon Demolli, në emër të Grupit të LDK-së, theksoi, në lidhje me piken e rendit të ditës për propozim vendimin e DKRS-së, për ndërtimin e pishinës gjysmë olimpikë në Podujevë, si grup i asamblistëve të LDK-së, japim mbështetje për realizimin e këtij projekti sepse është nevojë e sidomos për gjeneratat e reja të komunës sonë, ajo që jemi kundër është lokacioni i saj që për mendimin tonë nuk është i planifikuar mirë, sepse mendojmë se lokacioni te rrethi i shqiponjës nuk i plotëson kushtet elementare për realizimin e një projekti të tillë për shkak të hapësirës së pa mjaftueshme, pastaj në këtë pjesë është rruga magjistrale që e lidhë Kosovën me Evropë dhe paraqet rrezik sidomos për gjeneratat më të reja që mund të frekuentojnë, një tjetër problem është edhe mundësia sepse atje veprojnë biznese që shërbimet e tyre mund të ndërliken me punën e kësaj pishine.

Një aspekt i veçantë e sidomos për vendin tonë që do ta bëjë këtë pishinë të çuditshme është fakti se shtrihet në mes të varrezave xhamisë dhe qendrës emergjente përveç që shtrihet në një lokacion të pa favorshëm në komunikacion zhurma e saj do të sillet me reagim të qytetarëve në këtë komunitet dhe të objekteve publike që i përmenda më lartë andaj duke i marrë parasysh të gjitha këto kërkoj nga DKRS-ja, që të rishikohet edhe njëherë lokacioni sepse ky lokacion nuk i plotëson kushtet për funksionimin dhe realizimin e saj, ndërsa nëse mendohet se kemi vetëm një godinë atëherë ju i keni numrat ju vazhdojeni dhe miratojeni.

z.Bahri Blakçori, në emër të Grupit të LVV-së, theksoi, e përkrahim këtë propozim vendim të DKRS-së, për caktimin e lokacionit për ndërtimin e pishinës gjysmë olimpike në Podujevë, shpresoj dhe besoj shumë që kjo do të realizohet sa më shpejt që është e mundur, vërtetë rajonit të Llapit i ka munguar një pishinë e tillë.

z.Bashkim Sylja, në emër të Grupit të PDK-së, theksoi, e përkrahim këtë propozim vendim të DKRS-së, për caktimin e lokacionit për ndërtimin e pishinës gjysmë olimpike në Podujevë.

z.Gazmend Islami, në emër të subjektit OBKD, theksoi, e përkrahim këtë propozim vendim të DKRS-së, për caktimin e lokacionit për ndërtimin e pishinës gjysmë olimpike në Podujevë, natyrisht e inkurajojmë që të punojë më shumë se e ka mbështetjen tonë, gjithçka që është në të mirë të qytetarëve është edhe në të mirën tonë prandaj vetëm mundem ta përgëzoj e t'i them vazhdo.

z.Pajtim Balaj, U.D. drejtor i DKRS-së, theksoi, lidhur me diskutimin e këshilltarit nga grupi i LDK-së, pajtohem se nuk është hapësira ideale për ndërtimin e saj mirëpo e dini se Komuna e Podujevës ka problem me tokat, ka mungesë të madhe të hapësirave që janë pronë e Komunës së Podujevës, në lidhje me hapësirën se sa ka hapësirë dhe a është e mjaftueshme ajo për ndërtimin e objektit dhe parkingut është e mjaftueshme.

Unë nuk kam bërë asgjë pa i konsultuar profesionistët, ideja fillestare për hir të korrektësisë është e notuesve të Llapit dhe trajnerëve të këtij sporti të cilët kanë kërkuar 50 ari prej kmomunës së Podujevës as më shumë e as më pak kurse në këtë hapësirë janë 52 ari, ata kanë kërkuar 50 ari për ndërtimin e pishinës së bashku me parkingjet, nuk është lokacioni ideal po të kisha mundësi e kisha bërë dikund tjetër por nuk kam mundësi, kam hulumtuar me DPKGJ-në, por nuk kemi gjetur lokacion tjetër të përshtatshëm.

Është fakt se lokacioni është afër rrugës dhe mund të jetë rrezik, mirëpo ne duhet ta projektojmë në atë mënyrë që me pas hyrjen nga rruga mbrapa që mos të ketë rrezik për fëmijët, notuesit dhe këdo tjetër, s'është lokacioni ideal por Komuna e Podujevës nuk ka prona, në të ardhmen ndoshta do të na duhet të shpronësojmë prona private në mënyrë që të realizojmë projekte tjera si për rrugë dhe infrastrukturë sportive apo diçka tjetër.

z.Qëndrim Softolli, theksoi, ne si grup i këshilltarëve të LDK-së e kontestuar vetëm lokacionin jo projektin prandaj ju përgëzoj për donacionin, kundërthëniet i patëm se mendojmë se lokacioni nuk është i qëlluar.

Kryesuesi i Kuvendit, theksoi, atëherë nëse s'ka tjerë të interesuar për të marrë fjalën e hedhim në votim Propozim Vendimi për caktimin e lokacionit për ndërtimin e Pishinës gjysmë Olimpike në Podujevë, sipas materialit përkatës të paraqitur në mbledhjen e KPF-së dhe shpërndarë me konstatimet e rekomanduara nga mbledhja e KPF-së.

Pas votimit, Kryesuesi i Kuvendit konstatoi se nga 28 anëtar/e të Kuvendit sa ishin prezent në sallë, me 24 vota PËR, (të tjerët nuk morën pjesë në votim), miratohet Propozim Vendimi për caktimin e lokacionit për ndërtimin e Pishinës gjysmë Olimpike në Podujevë, sipas materialit përkatës të paraqitur në mbledhjen e KPF-së dhe shpërndarë me konstatimet e rekomanduara nga mbledhja e KPF-së.

6. Propozimi i Drejtorisë së Arsimit për ndryshimin e Statusit të SHMLT “Fan S. Noli” dhe SHMLE “Isa Boletini” nga Shkolla të Mesme të Larta Profesionale-SHMLP në Institucione të Arsimit dhe Aftësimit Profesional – IAAP

z.Avni Fetahu, U.D. drejtor i Drejtorisë së Arsimit-DKA, duke paraqitur fjalën hyrëse rreth kësaj pike të rendit të ditës, theksoi, një korrigjim të vogël se bëhet fjalë për një propozim vendim për ndryshim vetëm të emërimit andaj kërkoj edhe mirëkuptimin e juaj edhe për dje në mbledhjen e KPF-së se nuk bëhet fjalë për ndryshim të statusit por vetëm për ndryshim të emërimit.

Ky propozim vendim bazohet në ligjin për vetëqeverisje lokale n. 03/L-040, në vendimin e Ministrisë së Arsimit dhe në një varg ligjesh të ndërlidhura me të pra me këtë vendim SHMLT “Fan S. Noli” dhe SHMLE “Isa Boletini” nga Shkolla të Mesme të Larta Profesionale-SHMLP emërohen në Institucione të Arsimit dhe Aftësimit Profesional – IAAP.

Ndryshimi i emërtimeve të dy institucioneve arsimore sipas nenit 1 të këtij vendimi bëhet me qëllim të rregullimit, strukturimit, organizimit dhe menaxhimit të institucioneve përkatëse të cilat ofrojnë arsim dhe aftësim profesional duke marrë për bazë ligjin nr.04L-138, për arsimin dhe aftësimin profesional. Gjithashtu duke u bazuar edhe në vendimin nr.2-3726, të datës 28.08.2019, për institucionet e arsimit dhe aftësimit profesional nga MASHT, si dhe akteve tjera ligjore dhe nënligjore përkatëse në fuqi, pra është vetëm një kërkesë për ta bërë ndryshimin e emërimit të këtyre dy shkollave që në vitin e ardhshëm të krijojnë hapësirë që kërkon tregu i punës.

znj.Qëndresë Hajrizi, në emër të Grupit të LVV-së, theksoi, e përkrahim këtë iniciativë e cila buron nga këshilli i shkollave dhe nevojave të reja të tregut për ndryshimin e emërimit të shkollave në fjalë, kërkesa është e bazuar në nevojat dhe në kërkesat e tregut të punës, me ndryshimin e emërimit të shkollës nga Shkolla të Mesme të Larta Profesionale-SHMLP emërohen në Institucione të Arsimit dhe Aftësimit Profesional – IAAP na u mundësohet edhe hapja e fushave dhe profileve tjera duke u bazuar në kërkesat e tregut të punës.

z.Arjant Topanica, në emër të Grupit të LDK-së, theksoi, edhe ne e përkrahim këtë nismë për të ndryshuar emërtimin e SHMLT “Fan S. Noli” dhe SHMLE “Isa Boletini” nga Shkolla të Mesme të Larta Profesionale-SHMLP në Institucione të Arsimit dhe Aftësimit Profesional – IAAP.

z.Naim Çunaku, theksoi, desha ta marrë fjalën që ta shpreh përkrahjen e grupit të këshilltarëve të LDK-së, mirëpo përkrahjen tonë e theksoi parafolësi im.

z.Gazmend Islami, theksoi, e përshëndes këtë iniciativë të drejtorit dhe e përgëzoj sepse gradualisht është duke e parë që tregu i punës dhe aftësimi profesional ndryshojnë me shkollat e mesme profesionale por kisha kërkuar nga drejtori që për çdo gjë që ka mundësi ne si opozitë ta japim kontributin tonë sa herë ai ka nevojë meqenëse shkollat e mesme profesionale unë i njohë bukur mirë por ka edhe të tjerë që i njohin. Andaj për gjithçka ne jemi të hapur për bashkëpunim kështu vetëm ju uroj suksese dhe punë të mbarë.

z.Haki Rudari, theksoi, i dëgjova edhe kolegët paraprakisht në parim e përkrahi këtë kërkesë por me gjithat kam një shqetësim ose rezervë për arsye se ndoshta mund të ketë probleme për drejtimet që janë aktualisht prandaj propozoj që DKA-ja dhe drejtori të ketë për bazë dhe parasysh shumë bazën ekzistuese të profileve aktuale.

Në të dy shkollat kemi bazat e profileve dhe është mirë që të ruhen këto por njëkohësisht të hapen edhe drejtime të reja, këtë shqetësim ma kanë thënë edhe kolegët që vijnë nga fusha e arsimit dhe është mirë që ta kemi parasysh për arsye se nuk është mirë të krijojmë paralele të reja e t'i mbyllim ato që janë, kështu që është mirë që të jemi më serioz në këtë çështje.

z.Avni Fetahu, U.D. drejtor i DKA-së, theksoi, pajtohem plotësisht i nderuari asamblist qëllimi i këtij emërtimi nuk është për t'i shuar ato drejtime por nganjëherë krijohet nevoja dhe në rastin konkret ka një kohë të gjatë që është drejtimi shpediton dhe logjistikë, mund të bëhet një drejtim që e kërkon tregu i punës tani dhe ajo nuk ndikon në rënien e numrit të normave të mësimdhënësve, mirëpo vetëm krijon mundësi me u lidhë me tregun e punës siç e potencoi me të drejtë asamblisti z.Gazmend Islami.

Kryesuesi i Kuvendit, theksoi, meqenëse s'ka tjerë të interesuar për të marrë fjalën e vë në votim Propozim Vendimi për ndryshimin e emërimit të dy shkollave të mesme profesionale SHMLT “Fan S. Noli” dhe SHMLE “Isa Boletini” nga Shkolla të Mesme të Larta Profesionale, në Institucione të Arsimit dhe Aftësimit Profesional – IAAP, sipas materialit përkatës të paraqitur nga drejtori i DKA-së me ndryshimin e vetëm që shprehja në propozimin përkatës “.....Ndryshimin e statusit të.....”, fshihet dhe zëvendësohet me shprehjen “.....Ndryshimin e emërimit të dy shkollave.....”

Pas votimit, Kryesuesi i Kuvendit konstatoi se njëzëri, me 29 vota PËR nga anëtarët e Kuvendit sa ishin prezent në sallë, miratohet Propozim Vendimi për ndryshimin e emërimit të dy shkollave të mesme profesionale SHMLT “Fan S. Noli” dhe SHMLE “Isa Boletini” nga Shkolla të Mesme të Larta Profesionale, në Institucione të Arsimit dhe Aftësimit Profesional – IAAP, sipas materialit përkatës të paraqitur nga drejtori i DKA-së me ndryshimin e vetëm që shprehja në propozimin përkatës “.....Ndryshimin e statusit të.....”, fshihet dhe zëvendësohet me shprehjen “.....Ndryshimin e emërimit të dy shkollave.....”

7. Propozim Vendim për shpalljen e z.Halil Kastrati “Qytetar Nderi” i Komunës së Podujevës

znj.Marigona Lahu, Nënkryetare e Komunës, e paraqiti propozim vendimin në fjalë, ndër të tjera theksoi, para jush po e lexoj propozimin e Kryetarit të Komunës për shpalljen e z.Halil Kastrati “Qytetar Nderi” i Komunës së Podujevës.

Titulli qytetar nderi i Komunës së Podujevës për z.Halil Kastrati themelues dhe përfaqësues i shoqatës bamirëse “Jetimat e Ballkanit” jepet në shenjë mirënjohje për kontributin e dhënë në fushën e humanizmit në Komunën e Podujevës, titulli qytetar nderi i Komunës së Podujevës sipas këtij vendimi do të ndahet nga Kryetari i Komunës i cili autorizohet që të përcaktojë formën e dekoratës, mënyrën e dhënies si dhe çështjet tjera që i përkasin organizimit dhe solemnitetit të titullit në fjalë për z.Halil Kastrati.

Kryesuesi i Kuvendit, theksoi, nëse dikush dëshiron ta marrë fjalën rreth kësaj pike të rendit të ditës urdhëroni nëse jo atëherë e hedh në votim këtë Propozim Vendimi për shpalljen e z.Halil Kastrati “Qytetar Nderi” i Komunës së Podujevës.

Pas votimit, Kryesuesi i Kuvendit konstatoi se njëzëri, me 28 vota PËR nga anëtarët e Kuvendit sa ishin prezent në sallë, miratohet Propozim Vendimi për shpalljen e z.Halil Kastrati “Qytetar Nderi” i Komunës së Podujevës, sipas prezantimit të paraqitur nga Kryetari i Komunës fillimisht dhe Nënkryetarja e Komunës në fjalën hyrëse.

8. Propozimi për themelimin dhe përbërjen e Komiteteve tjera të Kuvendit të Komunës

z.Hilmi Hoxha, Kryesues i Kuvendit, theksoi, dihet se ne i kemi formuar dy komitete, komitetin për politikë dhe financa dhe komitetin për komunitete mirëpo për të funksionuar kuvendi duhet të formohen edhe disa komitete tjera mirëpo këto komitete nuk janë formuar në mbledhjet e kaluara të kuvendit për shkak se rendi i ditës ka qenë i stërngarkuar me pika të rendit të ditës, kurse sot me propozimin e këshilltarit z. Ragip Fetahu do ta diskutojmë këtë temë.

z.Ragip Fetahu, theksoi, themelimi i komiteteve tjera në kuvendin e komunal të komunës tonë përveç se është obligim ligjor është edhe për shkak të efikasitetit dhe të angazhimeve të të gjithë kolegëve tanë asamblistë në punën që ata e bëjnë.

Qëllimi im me këtë propozim është që të angazhohen të gjithë kolegët tanë asamblistë e që fatkeqësisht ka kolegë që 4 vite në kuvend ju përfundon mandati dhe nuk flasin asnjëherë dhe nuk e bëjnë asnjë angazhim të vetëm për qytetarët, mos të themi se “vjen këtu flen dhe e merr atë pagë prej 208€, e që ajo pagë është haram nëse e quajmë me gjuhën fetare”.

Komitetet duhet të themelohen bazuar në rregulloren e MAPL-së, nr.05/2020, në të cilin ceken shumë qartë detyrat dhe përgjegjësitë e komiteteve tjera si dhe detyrat dhe përgjegjësitë e asamblistëve në këto komitete dhe obligimet e këtyre komiteteve po ashtu edhe shpërblimi për punën e tyre, mendoj se kjo është domosdoshmëri duke e pasur parasysh që komuna jonë ka shumë probleme, ka shumë sfida, ka shumë telashe të cilat mund të trajtohen nga kolegët dhe mund të analizohen dhe të dërgohen me rekomandim te ekzekutivi për zgjidhjen e mëtejshme të problemeve.

Unë për fillim kam propozuar që në kuadër të këtyre propozimeve të kemi themelimin e tri komiteteve, komitete për të cilat kemi telashet më të mëdha për momentin, është komiteti për zhvillim ekonomik, komiteti për barazi gjinore dhe komiteti për shëndetësi dhe mirëqenie sociale, në këto komitete duhet të ketë gjithë përfshirje nga të gjitha subjektet politike duke u bazuar në numrin e anëtarëve të tyre në kuvend.

z.Gazmend Islami, theksoi, komiteti për komunitete është i themeluar dhe meqenëse i kam vizituar komunitetet këto ditë dhe kam lëvizur kah shtëpitë e tyre dhe e kam parë gjendjen e tyre të rëndë më mirë mund të themi se është një komitet për komunitete vetëm sa për sy e faqe, mendoj se është nën ndershmërinë e shqiptarëve që për komunitetet të cilat jetojnë këtu të punohet shumë më shumë, ne vetë kemi qenë të përndjekur, vetë kemi punuar nëpër botë punë të ndryshme dhe kemi pasur të drejtat e barabarta si në shkollim si në punësim prandaj mendoj se është shumë e ndershme që të mendojmë për atë komunitet ata fëmijë që ishin mbete rrugëve pa shkollë p.sh, kish 10 vite dhe se kish përfunduar klasën e parë.

Mund të punohet shumë më shumë për krijimin e një komisioni ad-hoc, për shkollim për fëmijët të cilët nuk din shkrim lexim, t’ju ofrojmë mundësinë edhe të punësimit, t’ia ofrojmë gjitha mundësitë komunitetit që të jetë i barabartë me shqiptarët, ta marrim si shembull botën e qytetëruar se si i trajtojnë të gjitha komunitetet tjera, kisha kërkuar që këtë punë ta merrni seriozisht se ne vetë kemi qenë të shtypur dhe e dimë çka do të thotë të jesh i shtypur dhe mos ta ndiesh vetën mirë në një shoqëri kur të tjerët të përbuzin andaj është mirë që ne të mendojmë seriozisht për këtë sepse e krijojmë një shembull të mirë si shqiptar me gjithë ato komunitete që jetojnë brenda territorit të Republikës së Kosovës.

z.Adnan Zymeri, theksoi, unë e përsërisht iniciativën e kolegut z.Ragip fetahu për themelimin e komiteteve tjera të kuvendit, e përmendi më herët që është urgjencë themelimi i atyre 3 komiteteve po përveç tyre po ashtu është e rëndësishme që të themelohen edhe komitetet tjera të secilit dikaster udhëheqës qeverisës për shkak se sa është i rëndësishëm arsimi dhe shëndetësia duhet të jenë të rëndësishme edhe sporti dhe fushat tjera të jetës me të cilat merret ekzekutivi dhe kuvendi në të njëjtën kohë.

Kryesuesi i Kuvendit, theksoi, ne i kemi 3 propozime nga këshilltari z.Ragip Fetahu, mirëpo sipas statutit të komunës ne mund t'i themelojmë 7 komitete tjera tani ne nuk e dimë se cilën zgjedhje duhet ta bëjmë, komiteti për politikë dhe financa është i formuar dhe komiteti për komunitete ashtu siç e ceku kolegu z.Gazmend Islami se ai komitet ekziston dhe funksionon në të mirë të komuniteteve rom, ashkali dhe egjiptas, mirëpo komitetet tjera që duhet t'i themeloj kuvendi komunal i Podujevës janë komiteti për shëndetësi dhe mirëqenie sociale, komiteti për arsim, komiteti për zhvillim ekonomik, komiteti për planifikim urban dhe mbrojtje të mjedisit, komiteti për kulturë rini dhe sport, komiteti për pronë, komiteti për bujqësi pylltari dhe zhvillim rural.

Këto janë 7 komitetet tjera, asamblisti z.Ragip Fetahu propozoj komitetit për barazi gjinore që nuk bënë pjesë në këto komitete, mirëpo unë mendoj se ne këtu nuk kemi çka të diskutojmë për barazinë gjinore se ne nuk e kemi atë problem sa i përket barazisë gjinore.

z.Ragip Fetahu, theksoi, një komitet i tillë sugjerohet të formohet në propozim rregulloren të MAPL-së nr.05/2020, e miratuar në Kuvendin e Republikës së Kosovës në fund të vitit 2020, pra ndër të tjera propozohet që të formohen edhe komitete tjera për barazi gjinore.

Kryesuesi i Kuvendit, theksoi, faleminderit i nderuari këshilltar z.Ragip Fetahu mirëpo ky Kuvend në përbërje prej 35 anëtarëve nuk ka kapacitet për t'i formuar 10 komitete tjera ashtu siç po dalin sepse secili komitet duhet t'i ketë 5 anëtar dhe kur i llogarisim 7 komitete nga 5 anëtarë atëherë kemi 35 anëtar që do të thotë se një anëtar/e e një komiteti s'ka të drejtë të jetë anëtar/e e dy komiteteve.

z.Naim Çunaku, theksoi, statuti i komunës tonë si akti më i lartë që duhet t'i përmbahemi në nenin 50 është përcaktuar që komitete tjera të përhershme të formohen të cilat i numërove taksativisht i nderuari z.Kryesues, shtoj kësaj 2 komitete tjera që po bëhen 9 komitete tjera dhe në bazë të statutit ne e kemi këtë mundësi formimin e 7 komiteteve tjera të përhershme.

Tani sa i përket komiteteve konsultative është krejt diçka tjetër sepse ato formohen në bazë të konkursit, mirëpo nuk mund të pajtohem me ty i nderuari z.Kryesues e të themi se nuk kemi kapacitete për formimin e këtyre komiteteve, kapacitete kemi, kuvendi ynë është ky që është në përbërje prej 35 anëtarëve në bazë të numrit të banorëve të Komunës tonë dhe sigurisht ligjvënësi i ka pas parasysh edhe këto, atë që e dëgjova se një anëtarë nuk ka të drejtë të jetë pjesë më shumë se e një komiteti nuk është ashtu sepse sipas rregullores një anëtarë mund të jetë pjesë më së shumti në dy komitete përjashtoj këtu anëtarët që janë pjesë e komitetit për politikë dhe financa dhe komitetit për komunitete sepse këta anëtar nuk e kanë të drejtën të jenë anëtar të komiteteve tjera kurse anëtarët tjerë të kuvendit e kanë të drejtën të marrin pjesë në dy komitete.

z.Haki Rudari, theksoi, këtu para veti kam rregulloren e MAPL-së nr.05.2020, për procedurat dhe themelimin përbërjen dhe kompetencat e komiteteve të përhershme dhe komiteteve tjera në komunë, për këtë arsye unë paraprakisht thash se nuk është punë e lehtë themelimi i këtyre komiteteve dhe për atë arsye unë desha që të kemi një konsensus mes përfaqësuesve të subjekteve politike në këtë kuvend megjithatë kemi ardhë deri në këtë pikë.

Në bazë të nenit 14 parashihet përbërja dhe organizimi i komiteteve tjera ku nuk guxojmë të shkojmë në pako për themelimin e komiteteve tjera, këtu është zyra ligjore dhe kam përcjellë praktikën e themelimit të komiteteve tjera në komunat tjera që mund t'i ceku, secili komitet duhet të jetë pikë e veçantë e rendi të ditës prandaj në këtë drejtim unë e pash se sot nuk jemi shumë të përgatitur për themelimin e këtyre komiteteve për kundër dëshirës këtë e thash edhe në foltore se jemi vonuar në themelimin e këtyre komiteteve.

Në këtë rregullore neni 14 paragrafi 1 thotë, komitetet tjera të cilat themelohen nga kuvendi i komunës në fusha të caktuara përbëhet nga anëtarët e kuvendit dhe përfaqësues jashtë kuvendit që janë ekspertë, shumica e anëtarëve të komiteteve tjera përbëhen nga anëtarët e kuvendit si dhe duhet të reflektojnë përbërjen e kuvendit të komunës, thjeshtë çdo komitet që formohet duhet të ketë për bazë edhe fuqinë

politike të subjekteve për arsye se nuk mund të barazohen subjektet politike sepse aty janë të përfaqësuar në bazë të vullnetit të qytetarëve. Anëtarët e komiteteve tjera nuk kanë të drejtë të jenë pjesë më shumë se e një komiteti do të thotë këtu kemi të bëjmë me këto komitete që veç nëse mund t'i themelojmë sot dhe nuk kemi të bëjmë me dy komitetet tjera të cilat janë të themeluara për ta qartësuar më shumë nuk ka të drejtë me qenë një anëtar i kuvendit anëtar i komitetit të arsimit dhe anëtar i komitetit të shëndetësisë kjo është sipas rregullores që unë e kam para veti, në fund numri i anëtarëve në një komitet duhet të jetë më së paku 5 e këtu duhet të kemi parasysh edhe aspektin e barazisë gjinore dhe përfaqësimit të shoqërisë civile apo ekspertë nga jashtë.

z.Ragip Fetahu, theksoi, propozoi një pauzë të shkurtër me qëllim që grupet e këshilltarëve të subjekteve politike të përfaqësuar në këtë kuvend të konsultohen dhe të nxjerrin një përfundim për këtë çështje.

Nga shumica e anëtarëve të Kuvendit mbështetet propozimi për një pauzë të shkurtër brenda hapësirës së objektit të Komunës, dhe atë duke filluar në ora 14:55.

Pas pauzës, mbledhja vazhdon në ora 15:15.

Kryesuesi i Kuvendit, fillimisht konstaton kuorumin ku prezent në sallë për momentin ishin 23 anëtar/e të Kuvendit të Komunës, në vazhdim theksoi, kemi mbetur te pika e rendit të ditës të cilën e propozoi këshilltari z.Ragip Fetahu për formimin e tri komiteteve tjera, komitetit për zhvillim ekonomik, komitetin për barazi gjinore dhe komitetin për shëndetësi dhe mirëqenie sociale.

Tani vazhdojmë me themelimin e komiteteve konkretisht me propozimet për themelimin e komitetit për zhvillim ekonomik, kërkojmë nga LDK-ja që të jap propozimin për anëtarët e këtij komiteti sepse sipas marrëveshjes LDK-ja e udhëheq këtë komitet.

z.Ekrem Rrahmani, në emër të grupit të këshilltarëve të LDK-së, theksoi, propozojmë që kryesues i komitetit për zhvillim ekonomik të jetë z.Arjant Topanica.

znj.Adalina Stublla, në emër të grupit të këshilltarëve të LVV-së, theksoi, propozojmë që anëtar i komitetit për zhvillim ekonomik të jetë z.Xhevdet Maloku.

znj.Mimoza Abdullahu, në emër të grupit të këshilltarëve të PDK-së, theksoi, propozojmë që anëtar i komitetit për zhvillim ekonomik të jetë znj Endritë Murati.

z.Arbnor Fazliu, në emër të grupit të këshilltarëve të AAK-së, theksoi, propozojmë që anëtar i komitetit për zhvillim ekonomik të jetë z.Burim Hasani.

z.Gazmend Islami, nga radhët e subjektit politik OBDK, theksoi, propozoj që anëtar i komitetit për zhvillim ekonomik të jetë miku im z.Haki Rudari nga subjekti politik i LVV-së.

z.Haki Rudari, theksoi, faleminderit për propozimin z.Gazmend Islami, me thënë të drejtën kjo bindje që është krijuar nuk qëndron se kjo që thuhet se s'ka të drejtë ndonjëri prej anëtarëve të jetë pjesë e dy komiteteve nuk qëndron sepse kjo ka të bëjë me këto komitetet që po themelohen e jo me ato komitete të cilat janë themeluar megjithatë faleminderit për propozim por nuk jam i gatshëm.

z.Gazmend Islami, nga radhët e subjektit politik OBDK, theksoi, propozoj që anëtar i komitetit për zhvillim ekonomik të jetë znj.Arjeta Fetahu jashtë kuvendit.

Pas votimit, Kryesuesi i Kuvendit konstatoi se njëzëri, me 23 vota PËR nga anëtarët e Kuvendit sa ishin prezent në sallë, me vendim themelohet Komiteti për Zhvillim Ekonomik, me këtë përbërje:

- 1. Arjant Topanica, anëtar, nga radhët Kuvendit të Komunës-LDK,*
- 2. Xhevdet Maloku, anëtar, nga radhët Kuvendit të Komunës-LVV,*
- 3. Endritë Murati, anëtare, nga radhët e Kuvendit të Komunës-PDK,*
- 4. Burim Hasani, anëtar, nga radhët e Kuvendit të Komunës-AAK,*
- 5. Arjeta Fetahu, anëtare, përfaqësuese nga jashtë Kuvendit, propozuar nga OBKD*

Kryesuesi i Kuvendit, theksoi, tani vazhdojmë me propozimet tjera për themelimin e komitetit për barazi gjinore që këtë komitet e udhëheq PDK-ja.

z.Bashkim Syla, theksoi, i nderuari Kryesues në fillim ne u dakordua se nuk kemi propozim për këtë komitet për arsye se ne nuk kemi të drejtë të marrim pjesë në dy komitete, kështu që kryesuesi i këtij komiteti të jetë nga LVV-ja.

znj.Adelina Stublla, në emër të grupit të këshilltarëve të LVV-së, theksoi, propozojmë që anëtar i komitetit për barazi gjinore të jetë z.Ragip Fetahu.

z.Ekrem Rrahmani, në emër të grupit të këshilltarëve të LDK-së, theksoi, propozojmë që anëtare e komitetit për barazi gjinore të jetë znj.Edona Shabani.

z.Arbnor Fazliu, në emër të grupit të këshilltarëve të AAK-së, theksoi, propozojmë që anëtar i komitetit për barazi gjinore të jetë znj.Gentiana Gashi jashtë kuvendit.

z.Gazmend Islami, nga radhët e subjektit politik OBDK, theksoi, propozoj që anëtare i komitetit për barazi gjinore të jetë znj.Fikrie Miftari jashtë kuvendit.

z.Bashkim Syla, në emër të grupit të këshilltarëve të PDK-së, theksoi, propozojmë që anëtare e komitetit për barazi gjinore të jetë znj.Dalina Gashi jashtë kuvendit.

Kryesuesi i Kuvendit, theksoi, këtu kemi tre anëtar të propozuar jashtë kuvendit komunal e në rastin konkret duhet të jenë 3 anëtar nga radhët e kuvendit e dy anëtar jashtë kuvendit.

z.Haki Rudari, theksoi, nuk barazohen subjektet që janë të përfaqësuara në kuvend me 2 ose 3 këshilltar me subjektet tjera që kanë të përfaqësuara në kuvend 12 ose 13 këshilltar, jo pse unë e them këtë por këtë e thotë rregullorja andaj është mirë që komitetet të themelohen nga subjektet që kanë numër më të madh të këshilltarëve në kuvend mirëpo këto komitete duhet të jenë të përfaqësuara edhe nga anëtarët e subjekteve tjerë e jo të shkojmë në këtë formë një nga një sepse rregullorja na e ndalon këtë.

Me gjithë respektin për të gjitha subjektet politike por subjektet që kanë numër më të madh të këshilltarëve në kuvend kanë të drejtë më shumë të jenë të përfaqësuara në komitete dhe gjithëherë shumica duhet të jetë nga kuvendi komunal.

z.Gazmend Islami, nga radhët e subjektit politik OBDK, theksoi, më së miri është që LVV-ja t'i themelon vetë të gjitha komitetet e ne nuk po përfaqësohemi por lëni këto gjëra se këtu jemi për të bërë diçka mirë për qytetarët dhe nuk ka rëndësi ajo punë se ne nuk përfitojmë por thjeshtë po mundohemi me dhënë kontributin tonë çdo subjekt politik me njerëzit më të mirë që i kemi për të mirën e qytetarëve.

z.Ragip Fetahu, theksoi, kam një lutje për kolegun z.Gazmend Islami që ta tërheq propozimin e tij pasi që është e paraparë edhe me rregullore që shumica e anëtarëve të komiteteve të jenë nga radhët e kuvendit dhe t'i ofrohet mundësia ndonjë kolegu prej asamblesë komunale nga subjektet e mëdha politike.

z.Bashkim Syla, theksoi, ne e tërheqim propozimin tonë dhe në vend të PDK-së të japë propozim LVV.

znj.Adelina Stublla, theksoi, edhe pse nuk është znj.Mrika Thaçi prezent besoj se ajo pranon të jetë anëtare e komitetit për barazi gjinore kështu që është mirë që ta propozojmë atë anëtare të këtij komiteti.

z.Ekrem Rrahmani, theksoi, i nderuari kryesues pasi që kolegu Ragip Fetahu është kryesues i Komitetit për barazi gjinore unë e propozoj znj.Donjetë Sheqiri që të jetë anëtare e komitetit për barazi gjinore.

Kryesuesi i Kuvendit, theksoi, sa i përket propozimit të znj.Adelina Stublla po e sqaroi se znj.Mrika Thaçi është anëtare e Komitetit për Politikë dhe Financa dhe ne nuk jemi konsultuar me të.

znj.Adelina Stublla, theksoi, atëherë propozoj që anëtare e këtij komiteti të jetë znj.Drita Pajaziti dhe të përmbyllet kjo temë.

z.Valon Demolli, theksoi, ne grupi i këshilltarëve të LDK-së, në vend të znj.Donjeta Sheqiri propozojmë që anëtar i komitetit për barazi gjinore të jetë z.Fahri Hasani.

Kryesuesi i Kuvendit, theksoi, atëherë nëse nuk ka propozime tjera shkojmë në votim që anëtarët/et e propozuara të jenë pjesë e komitetit për barazi gjinore.

Pas votimit, Kryesuesi i Kuvendit konstatoi se njëzëri, me 24 vota PËR nga anëtarët e Kuvendit sa ishin prezent në sallë, me vendim themelohet Komiteti për Barazi Gjinore, me këtë përbërje:

1. Ragip Fetahu, anëtar, nga radhët Kuvendit të Komunës-LVV,
2. Drita Pajaziti, anëtare, nga radhët e Kuvendit të Komunës-LVV,
3. Edona Shabani, anëtare, nga radhët Kuvendit të Komunës-LDK,
4. Fahri Hasani, anëtar, nga radhët e Kuvendit të Komunës-LDK,
5. Gentiana Gashi, anëtare, përfaqësuese nga jashtë Kuvendit, propozuar nga AAK

Kryesuesi i Kuvendit, theksoi, tani vazhdojmë me propozimet tjera për themelimin e komitetit për shëndetësi dhe mirëqenie sociale.

z.Bashkim Sylja, theksoi në emër të grupit të këshilltarëve të PDK-së, propozojmë që anëtare e komitetit për shëndetësi dhe mirëqenie sociale të jetë znj.Mimoza Stublla.

z.Ekrem Rrahmani, theksoi, në emër të grupit të këshilltarëve të LDK-së, propozojmë që anëtare e komitetit për shëndetësi dhe mirëqenie sociale të jetë znj.Tringa Sfishta.

znj.Adelina Stublla, theksoi, në emër të grupit të këshilltarëve të LVV-së, propozojmë që anëtare e komitetit për shëndetësi dhe mirëqenie sociale të jetë z. Kasib Bashota.

z.Arbnor Fazliu, në emër të grupit të këshilltarëve të AAK-së propozojmë që anëtare e komitetit për shëndetësi dhe mirëqenie sociale jashtë Kuvendi të jetë z.Kron Salihu.

z.Haki Rudari, theksoi, kam një propozim i nderuari Kryesues sepse në këtë komitet përbërja duhet të jetë 3 anëtar nga radhët e kuvendit dhe 2 anëtarë jashtë kuvendit andaj propozoj që anëtar i këtij komiteti jashtë kuvendi të jetë Dr.Arben Beçiri.

Kryesuesi i Kuvendit, theksoi, atëherë sipas propozimeve kemi këta anëtar/e të propozuar znj.Mimoza Abdullahu, Znj.Tringa Sfishta, z.Kasib bashota, z.Kron Salihu, z.Arben Beçiri, këta janë anëtarët/et e propozuara për këtë komision, nëse s'ka propozime tjera atëherë shkojmë në votim.

Pas votimit, Kryesuesi i Kuvendit konstatoi se nga 24 anëtar/e të Kuvendit sa ishin prezent në sallë, me 23 vota PËR, asnjë votë kundër dhe 1 votë të PËRMBAJTUR, me vendim themelohet Komiteti për Shëndetësi dhe Mirëqenie Sociale, me këtë përbërje:

1. Mimoza Abdullahu, anëtare, nga radhët Kuvendit të Komunës-PDK,
2. Tringa Sfishta, anëtare, nga radhët Kuvendit të Komunës-LDK,
3. Kasib Bashota, anëtar, nga radhët e Kuvendit të Komunës-LVV,
4. Arben Beçiri, anëtar, përfaqësues nga jashtë Kuvendit, propozuar nga LVV,
5. Kron Salihu, anëtar, përfaqësues nga jashtë Kuvendit, propozuar nga AAK

9. Draft Rregullorja për organizmin dhe bashkëpunimin e Komunës me fshatra, vendbanime dhe lagje urbane në territorin e Komunës së Podujevës.

z.Hilmi Hoxha, Kryesuesi i Kuvendit, theksoi, lidhur me propozim rregulloren në fjalë, fjalën ia kalojmë propozuesit të saj z.Ragip Fetahu.

z.Ragip Fetahu, theksoi, së pari më lejoni që t'i falënderoj gjithë kolegët e mi asamblist nga të gjitha subjektet politike të cilët i përkrahen këto pika të rendit të ditës të propozuara nga unë, pika të cilat nuk kanë të bëjnë me çështje politike apo i përkasin këtij apo atij subjekti politik, apo përkrahim këtë apo atë subjekt politik, qëllimi është interesi i përgjithshëm qytetar që t'i zgjedhim problemet me të cilat ballafaqohet qyteti ynë.

Unë nuk jam këtu për të ngritur polemika politike se jo ky me këtë ose ai me atë, unë jam përfaqësues i qytetarëve e kam dhënë një betim, betimi ndër të tjera është se do t'i kryej me nder dhe përgjegjësi detyrat të cilat më caktohen dhe kjo është një detyrë e cila më është dhënë nga qytetarët dhe asgjë më shumë, unë jam asamblist nga LVV-ja, mu desh ta bëjë këtë sqarim pa tjetër, çështja të cilën unë e kam ngritë si pikë të rendit të ditës ka të bëjë me Propozim Rregulloren për organizmin dhe bashkëpunimin e Komunës me fshatra, vendbanime dhe lagje urbane në territorin e Komunës së Podujevës.

Kjo propozim rregullore nëse nuk gaboj na ka ardhë në kuvend në muajin mars të vitit 2021 dhe kjo rregullore është stërzgatur duke u bazuar në atë se komunat tjera e kanë tejkaluar këtë fazë dhe kanë një rregullim institucional të hapësirave të saj pra sa i përket këshillit të fshatrave dhe lagjeve urbane, për komunën tonë kjo rregullore është e domosdoshme e kuptojmë që kornizat ligjore dhe rregullativa e përgjithshme ligjore e nivelit nacional na e kufizon numrin e caktuar të këshillave të fshatrave, është shumë e qartë që nuk mund të ketë në secilin fshat këshill për shkak se kornizat buxhetore nuk e lejojnë këtë çështje dhe kjo rregullore shumë qartë e sqaron se secili këshill i fshatrave duhet të përbëhet prej 5-6 anëtar e që kanë mundësi të gjitha fshatrat të përfaqësohen denjësisht dhe përveç kësaj procesverbalet i lexova me kujdes përveç fshatit Doberdol që kishte një pakënaqësi të qytetarëve gjatë dëgjimit publik nuk pash askund pakënaqësi të theksuar të qytetarëve me këtë rregullore.

Çështja tjetër të cilën dua ta theksoi të cilën e ka sjellë drejtoresha e DA-së para nesh një email përmes të cilës ka kërkuar sqarime nga ministria përkatëse për rregulloren se a është në përputhje me rregullativën e përgjithshme ligjore të nivelit nacional unë mund t'ju them se ky email është dërguar më datë 17qershor mirëpo nuk ka marrë përgjigje drejtorja dhe si e tillë kjo çështje duhet të mbyllet për shkak se brenda kornizave të afatit ligjor drejtorja nuk është përgjigjur drejtorisë përkatëse atëherë ne duhet të shkojmë me hapat e më tejshëm, po ashtu procesverbalet edhe pse na erdhën shumë vonë unë i lexova me shumë kujdes përndryshe nuk pash ndonjë propozim i cili do mundej të inkorporohet në rregullore, propozim i cili do të jetë efektiv në menaxhimin e ardhshëm të këshillave të fshatrave dhe lagjeve urbane.

Pasi që janë shter gjitha diskutimet kjo rregullore duhet të hidhet në votim për shkak se kjo rregullore po prolongon punën e këshillave të fshatrave, po prolongon bashkëpunimin institucione qytetar për ndërtimin dhe zgjedhjen e problemeve të thjeshta të qytetarëve me të cilat po ballafaqohen, kjo rregullore nuk ka të bëjë me çështje personale, kjo rregullore kërkohet në vazhdimësi me ngulm nga shoqëria civile në komunën tonë, si mendim shoqëria civile duhet të respektohet dhe për këtë kam marrë iniciativën që kjo rregullore të kalojë në fazat e mëtejshme, në qoftë se kjo rregullore nuk është në përputhje me rregullativën ligjore në fuqi MAPL-ja e jep mendimin e saj pasi t'i kalon procedurat dhe ne si argument për këtë çështje e kemi edhe emalin e dërguar nga drejtoresha e Drejtorisë së Administratës të cilës drejtorja e linjës nuk i është përgjigjur.

z.Haki Rudari, theksoi, unë e dëgjova kolegun parafolës por megjithatë disa çështje janë krejt ndryshe në procesverbal ngase në procesverbal ka pas vërejtje nga qytetarët lidhur me bashkimin e shumë fshatrave në një këshill disa nga këta i pash edhe unë se pat vërejtje nga përfaqësuesit e fshatrave Herticë, Shajkofc, Siboc, Gllamnik, dhe kjo nuk qëndron sepse ka pas vërejtje nga qytetarët.

Në bazë të rregullores në nenin 4 paragrafi 1 thuhet në territorin e Komunës së Podujevës themelohen këshillat lokale përkatësisht 6 këshilla lokale urbane në qytet dhe 24 këshilla lokale nëpër fshatra që nënkupton se në të gjitha fshatrat e Komunës së Podujevës janë vetën 24 këshilla lokale, në bazë të kësaj rregulloreje duhet të bashkohen shumë fshatra në një këshill kështu që vërejtjet e qytetarëve janë prandaj unë mendoj se ende duhet të përgatitet kjo rregullore, unë e respektoj shumë shoqërinë civile megjithatë votën time shoqëria civile nuk mund të ma imponoj, sistemin nervor e tha kryetari askush nuk mund ta imponon dhe koordinon, atë e bëj vet.

Duke u nisur nga kjo mendoj se interesi i të gjithëve është që të përgatitet sa më mirë kjo rregullore në të ardhmen në mënyrë që kur të dalim në terren të zbatohet sepse këtu parashihet formimin i një komisioni prej 5-9 anëtar andaj po e citoj nenin 5 paragrafi 1 ku thuhet se këshilli lokal mund të ketë 5- 9 anëtar, nëse ka diçka le të më përmirëson edhe drejtori mirëpo kështu thuhet në rregullore prandaj asgjë nuk është nëse këtë rregullore e lëmë për seancën e ardhshme në mënyrë që të jemi më të përgatitur edhe si subjekte politike por pse jo edhe shoqëria civile.

z.Gazmend Islami, theksoi, themelimi i këshillat të fshatrave është një problematik që ka kohë që mungon dhe është duke u shty kjo procedurë andaj është mirë që bashkarisht të koordinohemi dhe të dalim sa më mirë të gjithë por është koha që në fund të kryhet ky proces për shkak se dikush duhet me i përcjellë problemet e qytetarëve nëpër fshatra andaj ndryshe është kur nuk kemi përfaqësues të tyre për t'i adresuar problemet e tyre sepse mbushet drejtorja me 100 kërkesa të tyre por kur është përfaqësuesi i tyre lehtësohet puna nëm zyre të drejtorisë dhe duhet t'i japim prioritet kësaj pune.

Unë i përkrahi dy propozimet por duhet ta gjejmë mënyrën më të mirë të mundshme që të bëhet një zgjidhje dhe ta thërrasim një mbledhje sa më shpejt që të jetë e mundur që ta tejkalojmë këtë dhe të zgjidhet ky problem se ka kohë që na mundon të gjithëve.

z.Naim Çunaku, theksoi, sa i përket themelimit të këshillave të fshatrave dhe lagjeve urbane është e vërtetë se është e nevojshme që të formohen sa më parë sepse këtë më parë e dëgjova nga kryetari se këto këshilla nuk janë të themeluara dhe nuk funksionojnë sepse ju ka kaluar mandati, këshillat e fshatrave në Komunën e Podujevës janë të konstituara nëse nuk gaboj në bazë të një vendimi të Kuvendit të Komunës së Podujevës të vitit 2001 dhe atë si rezultat në bazë të rezulttit zgjedhor të zgjedhjeve lokale janë përcaktuar atëherë dhe tani quhen komitete të fshatrave dhe këshilla të fshatrave, që nga ajo kohë e deri pas shpalljes së pavarësisë kemi pasur udhëzimin e parë pastaj udhëzimin e dytë dhe sa kam njohuri ky është udhëzimi i tretë nga niveli qendror për organizimin e nën nivelit komunal. Në bazë të ligjit nr. 03/L-040, për vetëqeverisje lokale është kompetencë e komunës dhe duke parë se kemi pasë një laramani të organizimit të niveleve nën komunale duke filluar nga komuna fqinje e Prishtinës që ka funksionuar në sistemin e ish bashkësive lokale pastaj komuna të ndryshme kanë pasë shpërblimet për bartësit gjegjësisht për kryetarët e komiteteve dhe ne kemi mbete në atë fazë ku kemi mbete dhe e pranojmë ose jo jemi në një fazë ku komitetet e fshatrave dhe lagjeve urbane nuk mund t'i konsiderojmë se i kemi të organizuara aq mirë dhe që janë si adresë e parë e qytetarëve për shqetësimet dhe kompetencat e tyre, kompetencat e tyre varen nga ne se a dojmë të delegojmë kompetenca te ta dhe nuk them se kjo është forma më e mirë që vendosim por në një formë prapë i kthehem planit të punës që e kemi pasë në muajin prill ose muajin maj dhe jemi duke u vonuar kur më parë biseduam për kornizën afatmesme buxhetore që na ka shkaktuar telashe shkaku i organizimit të debateve publike, shkaku se nuk i kemi pasur funksionale këto komitete.

Unë mendoj se sa më shpejtë duhet të punojmë në ndërtimin e këshillave të fshatrave, sa i përket asaj se do të kemi probleme në riorganizimin e fshatrave se më parë kanë qenë bashkësi lokale pastaj çdo fshat e ka pas komitetin e tij e tani me këtë udhëzimin administrativ na bie t'i reduktojmë këshillat e fshatrave gjegjësisht bashkimin e dy apo më shumë fshatrave në një këshill por fundja ne duhet të veprojmë dhe veprimi është ky që po ndodh sot, ne duhet të marrim një vendim dhe të provojmë t'i funksionalizojmë ato këshilla të fshatrave dhe sigurisht që do të ketë shtyrje sa i përket zgjedhjes së kryetarit të këshillit të fshatrave se nga cili fshat do të jetë se ky është mentaliteti ynë, mirëpo nëse rrimë dhe s'na pëlqen ky udhëzim administrativ derisa të krijohet hapësirë për një udhëzim tjetër dhe për komunën tonë nuk bëhet një udhëzim tjetër sepse ky udhëzim vlen për tërë territorin e Republikës së Kosovës andaj ne deshëm apo jo duhet t'i përmbahemi këtij udhëzimi administrativ në përpjekjet tona për të pasur këshilla të fshatrave dhe lagjeve urbane sa më funksionale.

Në rend të parë kishin me qenë ndihmëse edhe për vetë funksionimin e pushtetit lokal do të caktoheshin adresa që edhe qytetari dhe ekzekutivi të këmbëjnë informacione të ndërsjella dhe për atë ne na bëri që ta votojmë dhe trajtojmë si pikë të rendit të ditës, sigurisht se do të ketë probleme por nuk besoj se do të ketë probleme të natyrës që nuk mund të zgjedhën edhe pse është përcaktuar numri maksimal ne në një punëtori që e kemi pasë sa di unë prezent ka qenë edhe tashmë drejtori i DSHPMShP që në atë kohë ishte drejtor i DA-së, aty kemi biseduar që ndoshta kishte qenë më mirë që të reduktohen numrat e këshillave të fshatrave, neve nuk na përkufizon askush që të zbresim më pak dhe si alternativë kemi organizimin e 19 këshillave të fshatrave dhe këshillat tjerë të lagjeve urbane, si do qoftë sot ne kemi një propozim të kolegut z.Ragip Fetahu që të merret vendim për funksionalizimin e këshillave të fshatrave dhe lagjeve urbane dhe të shohim se si do të dalin në terren deh çfarë mund të bëjmë.

z.Bashkim Sylja, theksoi, ne të gjithë e dimë këtu se asnjëri nuk jemi kundër formimit të këshillave të fshatrave dhe lagjeve urbane por problemi kryesor është se nga ana e ministrisë na është thënë se kjo nuk është në përputhje me hartën zonale dhe i gjithë problemi është këtu që mos të nxjerrim një vendim që është jo ligjor, kështu që unë propozoj që në mbledhjen e ardhshme Drejtoria e Administratës të na sjellë informacione plotësuese për këtë pikë të rendit të ditës dhe të vazhdojmë tutje se është bërë mund i madh këtu, ka 2 ose 3 vite që kjo draft rregullore është proceduar në kuvend kështu që mos ta çojmë huq gjithë atë mund por të marrim një vendim që është në zbatueshmëri të ligjit.

z.Naim Çunaku, theksoi, është e vërtetë se në materialin që kemi marrë nga drejtoria përmendet harta zonale por hartat zonale nuk përcaktojnë ndarjen apo administrimin e një nën niveli komunal, nuk do të thotë që hartat zonale e përcaktojnë atë, s'kanë të bëjnë asgjë me organizimin e këshillave të fshatrave dhe lagjeve urbane, hartat zonale nuk na e pakësojnë apo rrisin numrin e këshillave të fshatrave dhe lagjeve urbane.

z.Ragip Fetahu, theksoi, ndoshta po e teprojmë pak mirëpo kjo rregullore i ka kaluar të gjitha fazat edhe fazën e diskutimit publik dhe atë të fazë ku secili nga ne asamblistët ka pasë mundësi që t'i paraqes idetë e tij për ndryshime, rritje apo zvogëlim të këshillave të fshatrave dhe lagjeve urbane, pra ka pasë mundësi që ta heq apo shtoj një këshill, megjithatë këtë e potencoj edhe kryetari që ka një problematikë te fshati Gllamnik që është i përfshirë në një këshill me fshatrat Llapashticë e Epërme dhe Llapashticë e Poshtme unë propozoj që fshati Gllamnik të jetë në një këshill me fshatrat Siboc i Epërm dhe Siboc i Poshtëm dhe me këtë propozim ndryshim rregullorja të hidhet në votim.

znj.Antoneta Ejupi, U.D. drejtoreshë e Drejtorisë së Administratës-DA, theksoi, i nderuar këshilltar z.Ragip Fetahu, çuditërisht materialin e kemi përgatitur brenda ditës sot, sa për dijeninë e juaj përgatitja e materialit bëhet nga ana e zyrtarëve përkatës e jo nga ana jonë si ekzekutiv gjithsesi shpresoj se e keni pasë kohën e mjaftueshme për ta analizuar materialin dhe për të marrë vendimin më të mirë të mundshëm në interes të qytetarëve, sa i përket kësaj draft rregulloreje ne si ekzekutiv e kemi përgatitur

një grup punues i cili është munduar të bëjë më të mirën e mundshme lidhur me organizimin e këshillave të fshatrave dhe lagjeve urbane.

Komuna e Podujevës është njëra Komuna që ka numrin më të madh të fshatrave në territorin e Republikës së Kosovës dhe numri i këshillave të fshatrave përkufizohet me udhëzim administrativ që është maksimumi 30 këshilla të fshatrave vendbanimeve dhe lagjeve urbane, ky numër është i pamjaftueshëm për të organizuar fshatrat ashtu siç i kemi pranuar propozimet nga ana e qytetarëve në dëgjimet publike, propozimi juaj që fshati Gllamnik të përfshihet në një këshill lokal me fshatrat Siboc i Epërm dhe Siboc i Poshtëm, nuk mund të jetë si propozim sepse nuk është në përputhje me udhëzimin administrativ dhe propozimet e qytetarëve nuk mund të merren parasysh sepse udhëzimi administrativ në mënyrë imperative thekson që Komuna e Podujevës mund të organizoj vetëm 30 këshilla të fshatrave dhe lagjeve urbane.

Për këtë arsye unë propozoj që kjo draft rregullore të mos miratohet tani por të pritët derisa të marrim një mendim apo vendim nga ana e MAPL-së, për të na treguar në qoftë se ne duhet t'i fillojmë edhe njëherë procedurat nga fillimi, të mbahen dëgjimet publike, të bëhet një organizim më i mirë i këshillave lokale të fshatrave vendbanimeve dhe lagjeve urbane në mënyrë që të kemi implementimin e tyre në praktikë dhe të rregullohet ky organizim në mënyrën më të mirë të mundshme, gjithsesi vendimi është i juaji dhe presim vendimin nga ana e juaj.

Kryesuesi i Kuvendit, theksoi, këtu kemi dy propozime atë të z.Ragip Fetahu që të miratohet Rregullorja për organizimin dhe bashkëpunimin e Komunës me fshatra, vendbanime dhe lagje urbane në territorin e Komunës së Podujevës dhe kemi propozimin e drejtoreshës së Drejtorisë së Administratës znj.Antoneta Ejupi që sipas saj kjo rregullore nuk i ka kaluar ende gjitha procedurat dhe si e tillë nuk mund të vihet në votim kështu që kjo mbetet në dorën e juaj, mirëpo unë nuk e shohë këtë procedurë si të ngutshme sepse nuk është diçka urgjente prandaj besoj që në një periudhë kohore prej një ose dy muajsh e kemi mundësinë që ta miratojmë këtë rregullore.

z.Shpejtim Bulliqi, Kryetar i Komunës, theksoi, para jush e keni draft rregulloren dhe nga ajo që shihet ka lëshime por nëse ju si asamblastë mendoni se është në rregull gjithçka ne vazhdojmë tutje nuk kemi kurrfarë problemi, t'ju them të drejtën për ne nuk është punë e lehtë që të rikthehemi edhe një herë dhe të merremi me gjithë procesin e kësaj rregulloreje, unë nuk i di arsyet pse kanë ndodh këto por nëse e bëni vetëm një analizë të thjeshtë të nenit 4 paragrafit 1.8 të rregullores për organizimin dhe bashkëpunimin e komunës me fshatra, vendbanime dhe lagje urbane në territorin e Komunës së Podujevës kemi këshillin lokal të fshatrave Kërprimeh, Metehi, Repë, Sylevicë, nëse fshatrat Repë dhe Sylevicë i bëjmë në një këshill e kemi shumë problem por është problem të jenë në një këshill edhe fshatrat Repë dhe Metehi ose fshatrat Pakashticë e Epërme dhe Pakashticë e Poshtme të jenë në një këshill me fshatin Revuç, gjeografikisht lidhen këto fshatra mirëpo nga praktika ne e dimë se fshati Pakashticë gjithmonë ka pasur lidhje me fshatrat Kërprimeh dhe Metehi si bashkësi lokale këtë mund të na tregoj edhe asamblasti i nderuar që është më i moshuari këtu z.Fahri Hasani sepse e dinë këtë më së miri si ka funksionuar.

Mendoj se ndoshta më së miri është dashur të funksionoj ajo formë që ka qenë ose kemi shembuj tjerë që janë në një këshill fshatrat LLapashticë e Epërme dhe Llapashticë e Poshtme, mirëpo unë e kam pas një draft rregullore tjetër ku në këtë këshill ka qenë pjesë edhe fshati Gllamnik, mirëpo në një këshill lokal mendoj se mund të jenë fshatrat Gllamnik dhe Siboc ashtu siç kanë funksionalizuar gjithmonë, fakti që më brengos këtu është përbërja e këshillit të fshatrave Brainë, Kalaticë, Bërvenik, Metergofc, Billatë, Muhazob si dhe këshilli i fshatrave Orllan, Turuçicë, Rakinicë, Kushevicë, nëse e marrim në tërësi numrin e banorëve mendoj se fshati Orllan tërësisht do ta mbulonte atë zonë sepse nuk ka banorë dhe do të kishim mundësi ta bënim një këshill të një fshati tjetër që ka numër më të madh të banorëve dhe të krijojmë një komoditet që me pasë zgjidhje brenda për brenda.

Sa i përket këshillit të fshatrave Barainë, Batllavë, Radujevë, faktikisht fshati Radujevë s'ka banorë mirëpo fshati Barainë me fshatin Batllavë nuk kanë korresponduar asnjëherë sepse gjithëherë fshati Barainë ka korresponduar kah fshati Orllan, pastaj kemi këshillin e fshatrave Ballofc, Lladofc, Herticë, Surdull, në këtë rast fshatrat Ballofc dhe Lladofc t'i lëm në një këshill me fshatrat Herticë dhe Surdull nuk më duket se korrespondojnë shumë mes veti ose këshillin e fshatrave Godishnjak, Kunushefc, Buricë, Penuhë kur dihet se fshati Godishnjak asnjëherë nuk ka korresponduar kah fshati Penuhë përkundrazi fshati Penuhë ka korresponduar kah fshati Lluzhan si qendër lokale po nuk ka ndodhur e kundërta, si do që të jetë nëse ju si kuvend sot e votoni këtë draft rregullore besoni se neve na e lehtësoni shumë punën dhe do ta bënim një veprim të mirë por praktikisht sa do të jetë e mundshme zbatimi i saj ajo është një pikëpyetje dhe për këtë duhet të na ndihmojnë këta propozuesit e kësaj pike të rendit të ditës për ta zgjedhur problemin e këshillave të fshatrave, vendbanimeve dhe lagjeve urbane praktikisht.

Unë e di se një gjë e tillë praktikisht paraqet problem për tu zbatuar por si do qoftë po them për neve si ekzekutiv pavarësisht asaj që ne kemi diskutuar edhe me drejtoreshën e Drejtorisë së Administratës dhe në një farë forme edhe unë nuk pajtohem që të kaloj kjo draft rregullore por parimisht nëse sot ju e votoni këtë neve na e lehtësoni shumë punën dhe pastaj na mbetet të fillojmë me proceset tjera për formimin e këtyre këshillave të fshatrave, vendbanimeve dhe lagjeve urbane.

Se a është e nevojshme të ecim tutje me këtë proces, është shumë e nevojshme sepse shumë lokalitete i kemi pa përfaqësues tani për tani, ndoshta në mesin e dy propozimeve jo të mira mendoj se më mirë të kemi një propozim jo të mirë se sa mos të kemi kurrfarë propozimesh, kështu që për këtë rregullore mbetet që ju të vendosni, të merrni ose jo vendim si kuvend, nëse e shtyni përpara këtë si proces ne ecim tutje por tani unë mund t'i jap disa propozime të vogla të cilat mund t'i inkorporonim brenda seancës edhe pse jemi para publikut por nuk e di se sa do të jenë këto propozime të qëndrueshme për të përmirësuar diçka që nuk është në rregull.

Si do qoftë janë dy alternativa përpara nëse e votoni këtë draft rregullore neve na ndihmoni shumë nëse votoni kundër ne na shtoni punë shtesë por besoj se nxjerrim version më të mirë, tani mund të themi se kemi një situatë të ngjashme me atë të miratimit të hartës zonale të Komunës së Podujevës sepse kemi këtu dy mundësi të shkojmë me mundësinë e parë për ta votuar këtë draft rregullore dhe mundësia e dytë për t'iu kthyer procesit dhe për të punuar dy ose tre muaj deri në finalizimin e kësaj draft rregulloreje, të gjithë fshatrat kanë nevojë që të kenë një përfaqësues të mirëfilltë sepse edhe koordinatori i fshatrave në Komunën e Podujevës me një organizim do të mund të fillonte punën me përfaqësuesit e fshatrave.

z.Kasib Bashota, theksoi, për këtë çështje nëse drejtoresha e DA-së na e jep një afat kohor deri në seancën e radhës ndoshta do të kishim mundësi t'i harmonizonim qëndrimet dhe t'i eliminonim ato defekte për të cilat thuhet se janë dhe t'i ndërlikojmë fshatrat që kanë lidhje gjeografike sa i përket shtrirjes territoriale në mënyrë që të kemi sa më pak probleme.

z.Ekrem Rrahmani, theksoi, nga drejtoresha e DA-së, kërkoj një sqarim nëse shtyhet procesi i votimit të kësaj rregulloreje kush do t'i bëjë përmirësimet dhe në çfarë afati kohor sepse edhe unë kam vërejtur se këshilli lokal i fshatrave Obrançë, Peran, Bradash, Dobratin nuk është në rregull sepse janë fshatra të mëdha dhe nuk mund ta kenë vetëm një këshill, (pse po qesh i nderuar Kryetar kur po e përmendi fshatin Bradash, ti e kapërceve por në rend të parë paska qenë nuk e përmende, ti dhe ai keni dalë në Prishtinë tani s'keni punë me këto fshatra), sa i përket këshilli lokal i fshatrave Obrançë, Peran, Bradash, Dobratin dua ta di se a ka mundësi që të ndahen nga përbërja e këtij këshilli këto fshatra dhe në cilin afat kohor kur dihet se numri i këshillave të fshatrave dhe lagjeve urbane nuk mund të jetë më i madh se 30 prandaj pyes se a mund të bëhet ndonjë riorganizim ndryshe.

znj.Adelinë Stublla, theksoi, përderisa shohim se ka paqartësi rreth kësaj rregulloreje dhe shihet mos zoonimi i fshatrave unë mendoj se duhet të përmirësohet përbërja e këshillave të fshatrave dhe lagjeve urbane dhe të shtyhet kjo rregullore për një seancë tjetër dhe të na sjellët pak më e përgatitur.

z.Naim Çunaku, theksoi, po mundohem t'i jap disa sqarime, neve po na pengon organizimi që e kemi në këtë draft rregullore, ky nuk është një dokument i miratuar ky kuvend ka kompetencë dhe ne jemi ata që vendosim për këtë rregullore e jo drejtoresha e DA-së, nëse dikush mendon se duhet të bëhet një organizim tjetër më i përafërt dhe më i qëlluar i këshillave të fshatrave dhe lagjeve urbane le të bëjë propozimin në foltore, propozimi le të dal në votim dhe bëhet ndryshim plotësimi i kësaj draft rregulloreje dhe ky dokumet del si dokument final.

Nuk e di pse kemi shumë kundërthënie këtu se qenka shkruar në dokument kështu por ne mendojmë se duhet të jetë kështu sepse ne mund t'i bëjmë ndryshimet se ne në kuvend jemi vendimmarrësit që mund të bëjmë ndryshime kaq kisha për të thënë.

z.Kasib Bashota, theksoi, a është e mundur të bëhet një komision brenda kuvendit dhe t'i përafrojmë këto qëndrime dhe kundërthënie sa i përket rregullores në fjalë.

z.Shpejtim Bulliqi, Kryetar i Komunës, theksoi, a kemi vullnet nëse mundemi këtu drejtpërdrejtë me i bë disa ndryshime të vogla dhe të vazhdojmë tutje por së pari duhet të shikojmë se a kemi vullnet për këtë çështje si grupe të këshilltarëve të subjekteve politike të përfaqësuara në këtë kuvend.

z.Naim Çunaku, theksoi, ne tani jemi në këtë fazë ku kemi dy rrugë ose ta refuzojmë si dokument ose ta përpunojmë këtë dokument ashtu siç mendojmë ne që të bëjmë një draft rregullore më të favorshme ose ta shtyjmë për një seancë të radhës.

z.Shpejtim Bulliqi, Kryetar i Komunës, theksoi, këtu në foltore po i jap disa propozime si sugjerime por nuk është e thënë se ju duhet t'i pranoni por edhe ju i jepni mendimet e juaja dhe t'i bëjmë korrigjimet shpejtë e shpejtë dhe të vazhdojmë tutje, nëse pajtohemi, ta marrim shembull këshillin lokal të fshatrave Obrancë, Peran, Bradash, Dobratin, kemi numër të madh të banorëve, ne mund ta votojmë këtë draft rregullore si është tani dhe të shohim se a mund të realizohet një gjë e tillë praktikisht nëse jo atëherë pastaj e bëjmë plotësim ndryshimin e saj.

z.Ragip Fetahu, theksoi, është mirë që të marrim pauzë 15 minuta, pastaj të diskutohet për këtë çështje.

Kryesuesi i Kuvendit, theksoi, atëherë kërkesën e propozuesit e vë në votim.

Mbështetet kërkesa për një pauzë të shkurtër, dhe atë duke filluar nga ora 16:15, me qëllim të konsultimeve mes përfaqësuesve të subjekteve politike të përfaqësuara në Kuvend dhe Ekzekutivit të Komunës, lidhur me gjetjen e mundësive për rishqyrtimin e draftit aktual të Rregullores në fjalë, me qëllim të dhënies së një zgjidhje sa më të mirë të mundshme sa i përket organizmit të këshillave lokale.

Pas pauzës, mbledhja nis të vazhdoi në ora 16:35.

Kryesuesi i Kuvendit, duke konstatuar kuorumin, theksoi, në pamundësi për të vazhduar për shkak të mungesës së kuorumit ju njoftojmë për vazhdimin e kësaj seance, mirëpo e vlerësoj të arsyeshme t'ju njoftoj se në takimin që kishim mes shefave të Grupeve të subjekteve politike të përfaqësuara në Kuvend, Kryetarin e Komunës dhe drejtorëve të Drejtorive përkatëse, formuam një ekip që do ta shqyrtojë edhe njëherë këtë draft Rregullore para se e njëjta të sjellët sërish në Kuvend për miratim final. Ekipa në fjalë përbëhet nga; z.Kasib Bashota, z.Ragip Fetahu, z.Naim Çunaku, z.Valon Demolli, znj.Mimoza Abdullahu, z.Arbnor Fazliu, znj.Mrika Thaçi, z.Gazmend Islami, z.Bahri Selimi, z.Leutrim Krasniqi, znj.Antoneta Ejupi, z.Latif Mehmeti, z.Sabedin Namani dhe z.Enis Sheholli.

Meqë në sallë janë vetëm 15 anëtar/e të Kuvendit dhe nuk ka kuorum të mjaftueshëm për të vazhduar me mbledhjen e filluar sot, Kryesuesi i Kuvendit ndërprente mbledhjen dhe në dakordim me anëtarët e Kuvendit që janë të pranishëm konstatohet se për vazhdimin e kësaj mbledhje, datën, kohën, vendin dhe çështje tjera të nevojshme, do të njoftohen me shkrim gjithë anëtarët e Kuvendit, institucionet përkatëse dhe publiku i gjerë. Mbledhja ndërpritet në ora 17:45

Vazhdimi i mbledhjes, më 15 korrik 2022

Vazhdimi i mbledhjes filloi në orën 10:15 dhe u mbajt në sallën e mbledhjeve të Kuvendit në Komunës, në ndërtesën e re të Komunës së Podujevës.

Mbledhjen e vazhdoi z.Hilmi Hoxha, Kryesues i Kuvendit të Komunës.

Në vazhdimin e mbledhjes të pranishëm ishin 26 anëtarë/e të Kuvendit të Komunës së Podujevës, kurse 9 anëtar/e (z.Demokrat Hodolli, znj.Arnisa Sylejmani, znj.Donjetë Sheqiri, z.Illir Koprani, znj.Tringa Sfishta, znj.Endritë Murati, znj.Mimoza Abdullahu, z.Arbnor Fazliu, dhe z.Gazmend Islami), nuk ishin prezent.

Gjithashtu në mbledhje e pranishme ishte Nënkryetarja e Komunës znj.Marigona Lahu, U.D. drejtoresha e Drejtorisë së Administratës znj.Antoneta Ejupi, U.D. drejtori i Drejtorisë së Planifikimit Urban dhe Mbrotjtjes së Mjedisit-DPUMM z.Leutrim Krasniqi, U.D. drejtori i Drejtorisë së Arsimit-DKA z.Avni Fetahu, përfaqësues të OJQ-së SDK, media lokale dhe një numër i zyrtarëve komunal.

z.Hilmi Hoxha, Kryesues i Kuvendit, e hapi vazhdimin e mbledhjes së datës 30 qershor 2022 të ndërprerë në mungesë të kuorumit, për të vazhduar aty ku ka mbet, sot më 15 korrik 2022.

Para se të fillojmë konstatohet se në bazë të nënshkrimeve në listën e pjesëmarrjes dhe verifikimit nga ana e zyrës për punë të Kuvendit, prezent në sallë momentalisht janë 26 anëtar/e të Kuvendit, kurse për momentin mungojnë 9 anëtar/e.

Si proces kemi mbet në shqyrtimin e pikës së 9-të të rendit të ditës që është draft Rregullorja për organizmin dhe bashkëpunimin e komunës me fshatra, vendbanime dhe lagje urbane në territorin e Komunës së Podujevës, siç dihet në këtë pikë ne gjatë diskutimeve kemi kërkuar një pauzë 30 minuta për t'i harmonizuar qëndrimet e partive politike në lidhje me këshillat e fshatrave dhe lagjeve urbane, kështu që ka qenë një problem goxha i madh deri te realizimi i tyre për shkak se kemi 78 vendbanime në Komunën e Podujevës dhe ndarja e tyre në 30 këshilla nuk ka qenë e lehtë.

Gjatë diskutimeve jemi munduar që të gjejmë një zgjidhje sa më të mirë mirëpo kur jemi kthyer në sallë ka munguar kuorumi dhe mbledhja është shtyrë për një datë tjetër, kjo datë është caktuar për sot më 15.07.2022, prandaj sot prapë do të diskutohet për draft rregulloren që për të cilën është diskutuar edhe në seancën e kaluar mirëpo ndryshimet janë bërë kryesisht vetëm në nenin 4 të rregullores, prezent i kemi edhe drejtoreshën e DA-së dhe drejtorin e DPUMM-së, për sqarime tjera fjalën ia kaloj drejtoreshës së Drejtorisë së Administratës znj.Antoneta Ejupi.

znj.Antoneta Ejupi, U.D. drejtoresh e DA-së, theksoi, ashtu siç e theksoi edhe kryesuesi jemi në vazhdimin e mbledhjes së datës 30.06.2022, në të cilën ka mbetur pa u shqyrtuar pika e cila ka qenë si pikë shtesë e rendit të ditës që është draft rregullorja për organizimin dhe bashkëpunimin e Komunës me fshatra, vendbanime dhe lagjet urbane në territorin e Komunës së Podujevës, kjo draft rregullore i ka kaluar të gjitha fazat e nevojshme për hartimin e një akti siç është shqyrtimi fillestar pastaj miratimi për konsultim publik dhe çështjet e tjera procedurale.

Lidhur me këtë draft rregullore janë mbajtur dhe kanë përfunduar diskutimet publike me ç'rast janë përpiluar edhe raportet përkatëse të cilat në mbledhjen e fundit ju keni pasur mundësi që t'i shqyrtoni dhe t'i analizoni do të thotë ky dokument ka qenë si pikë shtesë e rendit të ditës dhe deri në një masë është shqyrtuar mirëpo me pajtimin e të gjitha grupeve të këshilltarëve të subjekteve politike të përfaqësuar në kuvendin e komunës si dhe në pajtim me ekzekutivin e komunës jemi dakorduar që të mbahet një pauzë me qëllim të organizimit më të mirë të këshillave lokale të fshatrave dhe lagjeve urbane, në këtë draft rregullore kanë qenë disa pjesë të tjera të cilat nuk kanë qenë të pa plotësuar, kanë qenë përshkrimi i këshillave urbane dhe hartat e këshillave të fshatrave.

Gjithsesi pas pauzës me rastin e kthimit në kuvend nuk ka qenë numri i mjaftueshëm i asamblistëve për të krijuar kuorumin dhe për këtë arsye kryesuesi e ka ndërprerë mbledhjen me qëllim që e njëjta të vazhdohet pas disa ditëve, me përfundimin e punimeve nga ana e ekipit punues ekip ky që ka qenë në përbërje prej anëtarëve nga radhët e ekzekutivit dhe përfaqësues nga të gjitha subjektet politike të Kuvendit të Komunës së Podujevës.

Pas këtij takimi ne si ekip punues kemi bërë ndërhyrje përkatësisht e kemi bërë harmonizimin e kësaj draft rregulloreje përkatësisht në nenin 4 ku kemi bërë një organizim ndryshe të këshillave të fshatrave dhe lagjeve urbane në mënyrë që të bëhet ndarja më e mirë e këtyre këshillave të fshatrave dhe lagjeve urbane pasi që me udhëzim administrativ përcaktohet se Komuna e Podujevës mund t'i ketë 30 këshilla të fshatrave dhe lagjeve urbane dhe për këtë arsye ne e kemi mbajtur këtë takim punues me që rast kemi bërë ndryshime në nenin 4 të kësaj rregulloreje.

Unë mund t'i lexoj ndryshimet e bëra sa i përket këshillave të fshatrave kurse për ndryshimet e bëra për këshillat e lagjeve urbane sqarimet para jush do t'i bëjë drejtori i DPUMM-së, gjithsesi nëse ju e shihni të arsyeshme pas këtij leximi propozoj që ta mbajmë një pauzë 15-20 minuta që të keni mundësi që të analizoni draft rregulloren dhe të keni mundësi që t'i paraqisni propozimet dhe sugjerimet e juaja. Atëherë ne kemi bërë ndarjen e fshatrave në 24 këshilla, po filloj me këshillin lokal të fshatrave Murgull, Tërnavicë, Reçicë, Sllatinë, Brecë, Dvorishtë, Pollatë, Potok, Zhiti, gjithsesi dua të theksoi që në bazë të udhëzimit administrativ një këshill nuk mundet t'i ketë në përbërje më shumë se 9 fshatra dhe për këtë arsye nuk kemi mundur që ta kalojmë këtë përbërje e ti kemi më shumë se 9 fshatra në një këshill dhe kjo ndarje e fshatrave është bërë duke marrë parasysh afërsinë dhe lidhjen e fshatrave mes tyre si dhe numrin e banorëve.

Në këshillin tjetër lokal bëjnë pjesë fshatrat Kërprimëh, Metehi, Repë, pastaj kemi këshillin lokal të fshatrave Sylevicë, Revuç, Pakashticë e Epërme dhe Pakashticë e Poshtme, këshilli lokal i fshatrave Dobërdol, Zakut, këshilli lokal i fshatrave Dobratin, Bajçinë, këshilli lokal i fshatrave Bradash, Peran, këshilli lokal i fshatrave Velikarekë, Obrancë, këshilli lokal i fshatrave Llapashticë e Epërme, Llapashticë e Poshtme, këshilli lokal i fshatrave Sallabajë, Shakovicë, Godishnjak, këshilli lokal i fshatrave Lluzhan, Llugë, këshilli lokal i fshatrave Buricë, Kunushefc, Penuhë, këshilli lokal i fshatrave Sibofc i Poshtëpm, Sibofc i Epërm, këshilli lokal i fshatrave Kaçybeg, Gërdofc, këshilli lokal i fshatrave Bellopojë, Tërnavë, Halabak, këshilli lokal i fshatrave Batllavë, Dyz, Barainë, Radujevë, këshilli lokal i fshatrave Orllan, Muhazob, Metërgofc, Bllatë, Bërvenik, Kalaticë, Brainë, Kushevicë, këshilli lokal i fshatrave Herticë, Turuçicë, Rakinicë, Surdull, këshilli lokal i fshatrave Ballofc, Lladofc, Shajkofc, këshilli lokal i fshatrave Shtedim, Mirofc, Livadicë, Merdar, këshilli lokal i fshatrave Surkish, Sfeçël, Dumosh, këshilli lokal i fshatrave Dumnicë e Poshtme, Dumnicë e Epërme, Llaushë, Përpellac, këshilli lokal i fshatit Letanc.

Para se të filloj drejtori i DPUMM-së të prezantoj ndarjen e lagjeve urbane dua të theksoi që ne si ekip jemi munduar që ta bëjmë më të mirën e mundshme për organizimin e këshillave të fshatrave dhe lagjeve urbane brenda mundësive dhe kornizave të lejuara ligjore. Gjithsesi miratimi i kësaj draft rregulloreje mbetet në dorën e juaj, të gjithë jemi në dijeni që kjo rregullore është stërzgatur shumë andaj mendoj se duhet t'i jepet një përfundim, konkretisht një epilog këtij dokumenti.

z.Leutrim Krasniqi, U.D. drejtor i DPUMM, theksoi, siç e ceku edhe drejtoresha e DA-së për ndarjen e këshillave të fshatrave dhe lagjeve urbane që janë gjithsej 30 sosh, unë nuk do të ndalem në pjesën e këshillave të fshatrave por do të mundohem që të elaboroj pjesën e shtrirjes dhe formimit të këshillave të lagjeve urbane. Ne kemi 24 këshillat të fshatrave dhe 6 këshilla të lagjeve urbane në ndarjen e këshillave të lagjeve urbane janë marrë për bazë elementet më të rëndësishme duke filuar prej rrugës magjistrale Podujevë – Prishtinë, konkretisht prej rrugës “Gryka e Llapit”, lumit Llap, hekurudhës si dhe të rrugëve regjionale.

Këshilli lokal urban qendra 1 është në pjesën perëndimore përgjatë lumit Llap ku gjendet rr.“Met Podujeva”, duke vazhduar te pjesa e urës që është rr. ”Vëllezrit Frashëri”, rr.”Besnik Restelica”, duke vazhduar pastaj në rr. “Ali Ajeti”, dhe në pjesën lindore kufizohet me hekurudhën, pastaj vazhdon në pjesën veriore në rr.”Ilir Kunushëfci”, deri te rrethrotullimi i rr.”Afrim Zhitia”, dhe përfundon në rr.”Xhemajl Mustafa”ku është ura nën të cilën kalon lumi Llap, këshilli lokal urban qendra 2 kufirin perëndimor e ka lumin Llap, kufi jugor rrugën magjistrale Podujevë – Prishtinë, kurse në pjesën lindore kufij është rruga regjionale që kalon nëpër qytet rr.”Ali Ajeti”, duke vazhduar në pjesën veriore që kufizohet me rr.”Besnik Restelica”, dhe rr.”vëllezërit Frashëri.

Këshilli lokal urban qendra 3 perëndim kufij lindor e ka lumin Llap pastaj në pjesën jugore kufij është rruga magjistrale Podujevë – Prishtinë, dhe përfundon në zonën kadastrale të fshatrave Llapashticë e Poshtme, Llapashticë e Epërme, Obrançe deri te rruga “Ismet Dërguti”, që i ndan rr.”Skenderbeu”, rr.”Xhemajl Mustafa”, rr. “28 Nëntori” që ndryshe njihet si pjesa e rrugëve te rreth rotullimi për fshatin Kërpimëh, këshilli lokal urban qendra 4 veri, kufirin verior e përbëjnë zonat kadastrale të fshatrave Obrançe, Letanc, Dumnicë e Poshtme, Livadicë, kurse kufirin jugor e përbën rr.”Ilir Kunushëfci”, duke vazhduar deri te rreth rotullimi i rr.”Afrim Zhitia”, dhe rr.”Xhemajl Mustafa”, që përfundon përsëri te rreth rotullimi i rrugëve “Skenderbeu”, rr.”Xhemajl Mustafa”, rr.“28 Nëntori”.

Këshilli lokal urban qendra 5 jug kufirin verior e ka rr.”Gryka e Llapit”, kufi jugor e ka zonat kadastrale të fshatrave Llapashticë e Poshtme, Gllamnik, Surkish, Ballofc, Shtedim, Këshilli lokal urban qendra 6 lindje në pjesën më perëndimore ka kufij hekurudhën pastaj vazhdon në rr.”Ali Ajeti”, në rrugën magjistrale Podujevë Prishtinë, zonat kadastrale të fshatrave Shtedim, Livadicë dhe në pjesën veriore është i kufizuar me rr.”Ilir Kunushëfci”, Kjo pak a shumë ishte elaborimi i ndarjes së këshillave urban që është bërë në bashkëpunim me komisionin.

z.Qëndrim Softolli, theksoi, së pari është e pa pranueshme dhe jo serioze nëse na e sillni materialin në seancë, së paku materialin është dashur ta pranojmë në momentin kur është thirrur seanca, nuk është material që përpunohet ose shtjellohet për çështje të minutave prandaj ne grupi i këshilltarëve të LDK-së nuk e përkrahim këtë, as anëtarëve që kanë marrë pjesë në komision nuk ua keni dërguar materialin. Qasje jo serioze nëse mund të themi për një pikë shumë të rëndësishme që ka marrë kohë 6-7 muaj derisa është sjellë kuvend.

Kryesuesi i Kuvendit, theksoi, në vazhdimësi të mbledhjeve në mënyrë ligjore nuk lejohet dërgimi i materialit një ditë më herët, kështu që besoj se asnjë ndryshim nuk është bërë nga ai takim që kanë qenë të pranishëm edhe përfaqësuesit e LDK-së, nuk kemi bërë ndryshime sepse ne ashtu jemi dakorduar me të gjithë përfaqësuesit e grupeve të këshilltarëve të subjekteve politike të përfaqësuar në kuvend dhe bashkërisht kemi ardhë në përfundim që materialin ta sjellim në mbledhje dhe këtu ta diskutojmë, kjo ishte marrëveshja jonë prandaj nuk kisha dashur të hap debat para se ta shqyrtoni materialin nëse keni vërejtje unë pajtohem me ju dhe nuk kam asgjë kundër.

z.Qëndrim Softolli, theksoi, i nderuar kryesues ju e potencuat se nuk ka ndryshime mirëpo unë këtu po shohë shumë ndryshime, unë nuk e di se çka është diskutuar në takim se s’kam qenë prezent për këtë arsye më parë thash se është dashur të na sillet materiali më herët.

Kryesuesi i Kuvendit, theksoi, në atë takim që kemi pasë kanë qenë të dy përfaqësues nga grupi i këshilltarëve të LDK-së.

z.Qëndrim Softolli, theksoi, ne këtu jemi duke diskutuar për emra të përveçëm nëse nuk gaboj.

Kryesuesi i Kuvendit, theksoi, sa i përket kësaj teme ju keni mundur ta formoni një grup dhe të konsultoheni mes veti andaj për mos ta zgjatur më shumë këtë diskutim fjalën ia kaloj z.Naim Çunaku.

z.Naim Çunaku, theksoi, kisha dashur që vazhdimi i kësaj seance të ishte në një formë tjetër sepse që në fillim kjo seancë mori rrugë që nuk është e dëshiruar drejt asaj që e kemi synimin.

Për rolin rëndësinë, vonesën e ndërtimit dhe funksionalizimit të këshillave lokale të fshatrave dhe lagjeve urbane nuk do të marrë kohë sepse rëndësinë e tyre e ceku edhe drejtoresha e DA-së dhe s'do koment këtu sepse këtë e ka përcaktuar edhe ligji për vetëqeverisje lokale dhe e ka autorizuar Kuvendin e Komunës si organ i cili e ka të drejtën të bëjë organizimin e nivelit nën komunal, e vërtetë e madhe është se prej vitit 2007 e kemi udhëzimin e parë dhe deri sot komuna jonë nuk ka arrit në masën e dëshiruar t'i realizoj këshillat lokal të fshatrave dhe lagjeve urbane.

Këshillat lokal të fshatrave dhe lagjeve urbane në një demokraci do të ndikojnë drejtpërdrejtë për një qeverisje më të mirë, për një investim më të qëndrueshëm dhe në një formë kur bisedohet për qytetarin ta ofrojmë sa më shumë qytetarin në vendimmarrje aty ku e sheh demokracia, arsyeja që më bëri të dal në foltore të flasë është se në mënyrë kronologjike e shpjegoi drejtoresha e DA-së rrjedhjen e seancës së datës 30.07.2022, pse jemi këtu, këtu jemi që të bëjmë zgjidhje dhe pajtohemi me atë që e tha drejtoresha e DA-së në fund të diskutimit se jemi këtu për t'i dhënë një epilog kësaj rregulloreje dhe duhet të dalim nga kjo situatë.

Si do të dalim nga kjo situatë, për të dalur nga kjo situatë në rend të parë na duhet një vullnet i të gjithëve që po bëjmë diçka të mirë për komunën tonë, për këshillat lokale të fshatrave dhe lagjeve urbane, këtu u potencua disa herë për një punëtor që ishte e organizuar dhe e dakorduar nga të gjitha grupet e këshilltarëve të subjekteve politike të përfaqësuar në këtë kuvend, sepse këshillat lokale të fshatrave dhe lagjeve urbane në atë moment që të marrin ngjyrimet politike nuk do të kemi mundësi t'i themelojmë.

Këshillat lokale të fshatrave dhe lagjeve urbane nuk janë organe politike por janë jo politike në një masë sa mund të bëhet dhe këtu që në fillim filluam debatin rreth asaj punëtorie dhe është e vërtetë se ai grup punues ishte i përbërë prej anëtarëve të ekzekutivit dhe nga të gjitha grupet e këshilltarëve të subjekteve politike të përfaqësuar në këtë kuvend, në një formë u munduam që të arrijmë më të mirën e mundshme dhe se a e kemi arritur këtë po ose jo jeni ju ata që vendosni, më bëri përshtypje deklarimi i kolegut tim z.Qendrim Softolli i cili me të drejtë tha se nuk na është dërguar materiali sepse i nderuari kryesues ne kemi pas një dakordim që s'ka qenë në formë të shkruar, nuk e kemi pasur as ne materialin deri tani, kjo ka ndodh dhe arsyeja që më bëri të flas është se dakordimi që kemi pasur, disa prej tyre janë avulluar rrugës e njëra ndër to është kjo z.Kryesues.

Në procesin e hartimit dhe organizimit të draft rregullores për organizimin dhe bashkëpunimin e Komunës me fshatra, vendbanime dhe lagje urbane në territorin e Komunës së Podujevës, nga punëtorja e organizuar të cilën e ceka më lartë jemi dakorduar që këshillat lokale të jenë më të avancuara dhe më përgjegjëse ndaj nevojave të qytetarëve dhe të jenë sa më funksionale dhe kemi shtuar te neni 8 pikën 4 në draft rregulloren për konsultime në mes të komunës dhe këshillave lokale, në këtë përshkrim pika 4, ka qenë ky propozim nëse unë nuk gaboja dhe ky propozim tani po heshtet pse Komuna përdor platformën elektronike për informimin dhe komunikimin, konsultimin, bashkëveprimin, në këshillat lokale.

Arsyetimi i nenit 8 do të thotë i shtohet pika 4 që ka qenë propozim e që është në përputhje me parimet e qeverisjes së mirë, në harmoni me politikat dhe rregullativën e fushës, transparencës dhe konsultimit publik si dhe në trend me praktikën dhe modelet më të avancuara në këtë fushë përkatësisht me udhëzimin administrativ të MAPL-së nr.06/2018, për standardet minimale të konsultimeve publike në komuna gjegjësisht neni 10 format dhe teknikat.

Siç e parasheh ai udhëzim administrativ taksativisht në nenin 10 format dhe teknikat e konsultimit publik pika 1.5 janë të obliguar të publikohen në platformën elektronike në ato komuna ku janë aktive dhe ky nuk e di a ishte një lëshim e nderuara znj. drejtoreshë e DA-së, apo mos gatisshmëri për përfshirje nuk e di, unë propozoj që kjo të jetë ashtu siç jemi dakorduar që pika 4 t'i shtohet nenit 8.

znj. Antoneta Ejupi, U.D. drejtoresh e DA-së, theksoi, faleminderit për pyetjen i nderuari z.Naim Çunaku, sa i përket pikës të cilës ju dëshironi që të jetë si klauzolë e veçantë në këtë draft rregullore dua të theksoi faktin që në mbledhjen e fundit ne të gjithë jemi dakorduar vetëm për ndryshimin dhe plotësimin e kësaj rregulloreje do të thotë ne në seancë këtu kemi thënë që kemi me mbajte një takim punues vetëm me qëllim të organizimit ndryshe të këshillave të fshatrave dhe lagjeve urbane përkatësisht plotësimit të rregullores që ka qenë për përshkrimin e pjesës urbane dhe krijimit të hartave nga ana e DPUMM-së, do të thotë ne nuk e kemi pasë një pajtim nga ana e juaj si asamblist që të ndryshohet edhe diçka tjetër në këtë draft rregullore. Gjithsesi është shumë e pranueshme kjo pjesa që ju e theksuat konkretisht një platformë e cila duhet të jetë me qëllim të komunikimit të komunës me këshillat lokale, gjithsesi kjo mund të paraqitet si klauzolë e veçantë pas miratimit të kësaj rregulloreje, me rasin e krijimit të kësaj platforme në mbledhjet e ardhshme ne mund ta vendosim si pikë të rendit të ditës që kjo rregullore të plotësohet edhe me këtë klauzolë.

z.Naim Çunaku, theksoi, drejtoreshë se jemi dakorduar s'ka diskutim, se sot e kemi pikë të rendit të ditës miratimin e draft rregullores dhe po më duket jo e logjikshme që sot kur mundemi me bë pjesë integrale të rregullores, tani një dakordim tonin ta shtyjme për një seancë tjetër për platformë elektronike po më duket e pa arsyeshme dhe propozimi im ishte decidiv që t'i shtohet kësaj rregulloreje nenit 8 pika 4 dhe kërkoj prej kuvendit të votohet ky propozim për ose kundër nuk ka asnjë arsytim këtu që në një të ardhme të afërm ose të largët ta fusim këtë klauzolë si pjesë të kësaj rregulloreje kur kemi mundësi që këtë ta bëjmë sot.

znj. Adelinë Stublla, theksoi, meqenëse po dihen këto paqartësi në lidhje me këtë draft rregullore ne kërkojmë një pauzë prej 30 minuta pastaj do të diskutojmë për këtë çështje.

z.Hilmi Hoxha, Kryesues i Kuvendit, theksoi, propozimin e znj. Adelina Stublla që të shkojmë në një pauzë për 30 minuta e vë në votim.

Nga shumica e anëtarëve, mbështet kërkesa për 30 minuta pauzë, dhe atë duke filluar nga ora 10:45.

Pas pauzës, mbledhja vazhdon duke filluar në ora 11:20, duke u konstatuar kuorumi ku prezent për momentin janë 26 anëtar/e të Kuvendit të Komunës.

z.Hilmi Hoxha, Kryesues i Kuvendit, theksoi, tani mund të vazhdojmë me punë aty ku kemi mbet.

z.Haki Rudari, theksoi, nxjerrja e një rregulloreje për organizimin dhe bashkëpunimin e Komunës me fshatra vendbanime dhe lagje urbane në territorin e Komunës së Podujevës është e një rëndësie të madhe dhe të jashtëzakonshme dhe në këtë drejtim mendoj se duhet të jemi shumë unik prandaj dua ta nxjerrim një konsensus për këtë çështje.

Unë edhe në seancën e rregullt pata propozuar që të shtyhet kjo pikë e rendit të ditës dhe tani po vërtetohet se kam pasur të drejtë për arsye se sot jemi më datë 15.07.2022, dhe ende kemi divergjenca lidhur me këtë, kam dy çështje për këtë rregullore paraprakisht te aspekti i përkufizimit juridik ku neni 2 te përkufizimet shkruhet kryetari i këshillit nënkupton personin më të votuar në tubimin zgjedhor në fshatra po e përsëris kryetari i këshillit nënkupton personin më të votuar në tubim zgjedhor në fshatra. Në nenin 5 paragrafi 11 thuhet kryetari i këshillit lokal zgjidhet nga anëtarët e këshillit lokal të një fshati vendbanimi apo lagjeje, në nenin 13 thuhet tubimet kanë legjitimitet nëse në një tubim marrin pjesë më shumë se 31 anëtar, neni 5 paragrafi 1 thotë se këshilli lokal duhet të ketë përbërjen prej 5-9 anëtar.

Tani cilës t'i referohemi pra kryetari i këshillit nga këshilli prej 5-9 anëtar që është neni 5 paragrafi 1 apo duhet të zgjidhet sipas përkufizimeve që për hir të transparencës po e citoj se thuhet Kryetari i këshillit nënkupton personin më të votuar në një tubim zgjedhor dhe këto të dyja nuk shkojnë së bashku sepse nuk janë të njëjta, nuk janë të njëjta një tubim zgjedhor dhe një këshill lokal i fshatit prandaj në këtë drejtim duhet të bëhen sqarime dhe ndryshime se një tubim zgjedhor quhet një tubim ku marrin pjesë 31 anëtar por këshilli lokal i fshatit nuk quhet tubim zgjedhor, ai është një këshill lokal që mund të përbëhet 5-9 anëtar që varet nga propozimet e qytetarëve nëpër fshatra.

Sa i përket renditjes kam vërejtje dhe të njëjtën kohë propozim të renditja sepse kam hartën e këshillave lokal të fshatrave andaj kam vërejtje të renditja e këshillit të fshatrave Ballofc, Lladofc, Shajkofc, që është një territor shumë i gjerë dhe mendoj se shumë më mirë do të ishte që Ballofci t'i takoj këshillit lokal të fshatit Herticë sepse lidhen gjeografikisht dhe të jetë një këshill lokal prej dy fshatrave Lladofc, Shajkofc sepse këto dy fshatra kanë një afërsi mes veti.

znj.Drita Pajaziti, theksoi, kam një propozim sa i përket ndarjes së këshillave lokale të fshatrave realisht shohë ndarjen e këshillit lokal të fshatrave Turuçicë, Rakinicë, Barainë, nga këshilli lokal i fshatit Orllan dhe të gjithë e dimë se këto fshatra kanë qenë pjesë e bashkësisë lokale të fshatit Orllan dhe kjo ndarje është kundërshtuar në diskutime publike gjë që u kundërshtua edhe tani pasi që u prononcua, jam e vetëdijshme që sipas ligjit nuk lejohen më shumë se 9 fshatra në një këshill lokal por të paktën fshati Turuçicë të jetë pjesë e këshillit lokal të fshatit Orllan, ose fshatrat Muhazob dhe Bllatë që s'kanë banor të zëvendësohen me këshillin lokal të fshatit Rakinicë, Barainë.

znj.Sebastina Vokrri, theksoi, kam një propozim sa i përket nenit 5 të rregullores ku bëhet zgjedhja e kryetarit të këshillit lokal të fshatrave, kisha propozuar që kryetari i këshillit lokal të fshatrave dhe lagjeve urbane të bëhet me rotacion.

z.Florent Hasani, theksoi, propozoj që të bëhet një ndarje më ndryshe të këshilli lokal i lagjes urbane qendra 6 në qytet në veri të shtrihet ky këshill deri të hekurudha ku bëhet ndarja e këshillit lokal urban qendra 4 me këshillin lokal të lagjes urbane qendra 6, ndarja të jetë hekurudha dhe në jugperëndim kufizimi me këshillin lokal të lagjes urbane qendra 2 hekurudhën ta keni si vijë kufiri e jo të ndahen lagjet në mes.

znj.Antoneta Ejupi, U.D. drejtoresh e DA-së, theksoi, sa i përket pyetjes së këshilltarit z.Haki Rudari të neni 2 i udhëzimit administrativ theksohet se kryetar i këshillit nënkupton personin më të votuar në tubim zgjedhor në fshatra vendbanime dhe lagje urbane, nuk e di se sa e kam të qartë pyetjen po gjithsesi po mundohem të japë një përgjigje në bazë të asaj që po e lexoj në këtë draft rregullore.

Te neni 5 paragrafi 1 theksohet se këshilli lokal mund të ketë 5-9 anëtar, numri i saktë i anëtarëve për secilin këshill lokal përcaktohet nga vetë banorët e fshatit, vendbanimit dhe lagjes urbane që janë të pranishëm në tubim zgjedhor.

Në nenin 5 paragrafi 13 thuhet tubimet kanë legjitimitet nëse në tubim janë të pranishëm së paku 31 pjesëmarrës ndërsa paragrafi 11 përcakton që kryetari i këshillit lokal zgjidhet nga radhët e anëtarëve të këshillit lokal të fshatrave, vendbanimeve dhe lagjeve urbane, kandidati i cili fiton shumicën e votave të pjesëmarrësve në tubim që nënkupton se kryetar i këshillit sipas nenit 2 është në përputhje me këtë përkufizim që bëhet në nenin 5 paragrafi 11, ndërsa paragrafi 1 i nenit 5 vetëm thekson që në një këshill lokal mund të jenë 5-9 anëtar ndërsa kryetari do të zgjidhet nga radhët e këtyre anëtarëve i cili ka shumicën e votave, këto këshilla do të zgjidhen në tubime që duhet të jenë së paku 31 pjesëmarrës.

Këtu nuk po shohë diçka që nuk është në përputhje neni 2 me nenin 5 të rregullores së lartcekur.

z.Haki Rudari, theksoi, e nderuara drejtoreshë e DA-së unë po e lexoj rregulloren që kam para vetës ku thuhet kryetari i këshillit nënkupton personin më të votuar në tubim zgjedhor në fshatra dhe tubimi zgjedhor në fshatra nënkupton një pjesëmarrje prej 31 e më shumë anëtarëve, sa i përket nenit 5 është krejt kontradiktore tani në paragrafin 11 të nenit 5 thuhet kryetari i këshillit lokal zgjidhet nga radhët e

anëtarëve të këshillit lokal, po kush është këshilli lokal, është përbërja prej 5-9 anëtar pra kryetarin e këshillit nuk e zgjedh një tubim i përbërë prej 31 anëtarëve por i zgjedh këshilli lokal prej 5-9 anëtar e përbërja e këshillit lokal prej 5-9 anëtar natyrisht vjen nga banorët sipas dëshirës së banorëve por megjithatë kjo është kontradiktore sepse në fillim të udhëzimit administrativ thuhet se kryetari i këshillit të fshatrave vendbanimeve dhe lagjeve urbane zgjidhet në një tubim kurse këtu thuhet se zgjidhet nga këshilli i fshatrave kjo ishte vërejtja ime.

z.Naim Çunaku, theksoi, në rend të parë desha të konkretizoj propozimin tim ku nenit 8 të kësaj rregulloreje i shtohet paragrafi 4 me këtë tekst, komuna përdor platforma elektronike për informim, komunikim, konsultim dhe bashkëpunim me këshillat lokale ky ishte propozimi im.

Sa i përket dilemave rreth zgjedhjes së kryetarit të këshillit të fshatrave vendbanimeve dhe lagjeve urbane nga ajo që u potencua nga kolegu z.Haki Rudari dhe nga ajo që kuptohet nga propozuesit e rregullores, kuptohet kështu tubimi në rend të parë e zgjedh këshillin pastaj kush mund të jetë kryetar i këshillit njëri prej atyre anëtarëve që është në këshill dhe këtë e shpjegon udhëzimi do të thotë cili do prej atyre anëtarëve të këshillit është anëtar i barabartë i këshillit, tubimi zgjedhor e zgjedh këshillin pasi që të zgjidhet këshilli hyjnë në votim anëtarët e këshillit që pretendojnë të jenë kandidat për kryetar dhe cili merr shumicën e të pranishmëve zgjidhet kryetar, unë kështu e kuptoj domethënien e kësaj rregulloreje znj.drejtorershtë DA-së.

z.Leutrim Krasniqi, U.D. drejtor i DPUMM, theksoi, sa i përket ndarjeve të cilat u propozuan përsëri në këtë aspekt nuk është që ka ndonjë problem mirëpo të jeni në koordinim me të gjithë për këto ndarje të reja që tashmë po propozohen, po filloj prej propozimit të këshilltarit z.Florent Hasani për pjesën e qytetit e që besoj se është më lehtë e realizueshme që hekurudha të merret si kufi ndarës mes qendrës 4, qendrës 6 dhe qendrës 2, kurse te pjesa rurale te pjesa e fshatit Orllan më konkretisht sipas rregullores çdo herë po flas sipas udhëzimit administrativ në një këshill mund të jenë maksimumi 9 fshatra.

Tani edhe pse disa fshatra nuk kanë banor dhe nëse ju e shihni si të arsyeshme mundemi fshatrat Turuçicë dhe Rakinicë t'i bashkojmë me këshillin e fshatit Orllan mirëpo tani po bëhen 10 fshatra në një këshill dhe në këtë rast e kemi kaluar numrin e fshatrave që mund të jenë në një këshill, sa i përket fshatit Ballofc që të jetë në një këshill me fshatin Herticë edhe kjo mund të bëhet mirëpo ne kemi bërë një ndarje racionale duke marrë për bazë territorin, numrin e popullsisë dhe lidhjet që kanë mes veti fshatrat mirëpo disa propozime që i jepni ju për mua është lehtë të realizohen dhe produkti vjen shumë shpejt.

z.Florent Hasani, theksoi, po e shohë një ndarje në mes fshatrave Revuç dhe Kërprimëh kur dihet se këto fshatra gjithherë tradicionalisht kanë qenë në një qendër, propozimi im është që fshatrat Kërprimëh, Pakashticë e Poshtme, Pakashticë e Epërme, Revuç të jenë në një këshill lokal kurse fshatrat Metehi, Repë, Sylevicë të jenë në një këshill lokal mendoj se kjo ndarje do të jetë më funksionale edhe për banorët atje sepse mes këtyre fshatrave bëhet edhe lidhja rrugore.

Kryesuesi i Kuvendit, theksoi, nëse nuk ka propozime tjera e vë në votim propozimi që në nenin 8 të draft Rregullores në fjalë të shtohet edhe një paragraf i ri (paragrafi 4) me tekstin si në vijim: Komuna përdorë platforma elektronike për informim, komunikim, konsultim dhe bashkëpunim me këshillat lokal.

*Pas votimit, Kryesuesi i Kuvendit konstatoi se njëzëri, me 26 vota PËR nga anëtarët e Kuvendit sa ishin prezent në sallë, mbështet propozimi që në nenin 8 të draft Rregullores në fjalë të shtohet edhe një paragraf i ri (paragrafi 4) me tekstin si në vijim: **Komuna përdorë platforma elektronike për informim, komunikim, konsultim dhe bashkëpunim me këshillat lokal.***

z.Leutrim Krasniqi, U.D. drejtor i DPUMM, theksoi, sa i përket propozimeve mundësisht të jenë më të qarta dhe para se të bëni propozimet llogaritni se mund të bëhen ndryshime në numrin e këshillave andaj llogaritni se në ato propozimet e juaja mos të kalojnë numrin prej 24 këshillave të fshatrave sepse ju po kërkonin një ndarje të re mirëpo kjo ndarje mund të na i rris numrat e këshillave të fshatrave, mundësisht mos e kaloni numrin prej 24 këshillave të fshatrave.

z.Haki Rudari, theksoi, numri i këshillave nuk ndryshon i nderuari drejtor i DPUMM-së, ai numër mbetet i njëjtë vetëm ndryshon renditja në aspektin gjeografik prandaj unë propozova që fshati Ballofc të kaloj në këshillin lokal të fshatrave; Herticë-Turuqicë-Rakinicë-Surdull, kurse fshatrat Lladofc, Shajkofc të mbesin në një këshill sepse e gjithë kjo po bëhet në të mirë të qytetarëve.

Kryesuesi i Kuvendit, theksoi, nëse nuk ka propozime tjera atëherë propozimin e këshilltarit z. Haki Rudari e vë në votim.

Pas votimit, Kryesuesi i Kuvendit konstatoi se nga 24 anëtar/e të Kuvendit sa ishin prezent në sallë, me 20 vota PËR, mbështet propozimi që fshati Ballofc të kaloj në këshillin lokal të fshatrave; Herticë-Turuqicë-Rakinicë-Surdull.

z.Leutrim Krasniqi, U.D. drejtor i DPUMM, theksoi, sa i përket këtyre dy propozimeve këto po bien ndesh mes veti sepse ju e votuat një propozim që fshatrat Ballofc, Herticë, Turuqicë, Rakinicë, Surdull, të jenë në një këshill lokal, tash propozimi tjetër është që fshati Turuqicë të kaloj në këshillin lokal të fshatit Orllan.

znj.Drita Pajaziti, theksoi, unë bëra propozimin që fshati Orllan të mbetet ashtu siç ka qenë në bashkësi lokale më herët, që do të thotë se fshatrat Rakinicë, Turuqicë, Barainë kanë qenë gjithmonë pjesë përbërëse e bashkësisë lokale të fshatit Orllan, jam e vetëdijshme se në një këshill lokal mund të jenë deri në 9 fshatra por të paktën meqenëse fshati Bllatë nuk ka banorë por nuk mund ta largojmë prandaj propozoj që fshati Rakinicë të kaloj në këshillin e fshatrave Ballofc, Herticë, Surdull, kurse fshati Turuqicë të kaloj në këshillin e fshatit Orllan.

z.Bashkim Syla, theksoi, ne të gjitha subjektet politike i kemi propozuar anëtarët për grupin punues për finalizimin e kësaj draft rregulloreje mirëpo këto ndryshime së paku të bëhen sipas renditjes e mos të bien ndesh njëra me tjetrën në mënyrë që mos të bëhet ndryshimi i propozimeve të miratuara.

z.Leutrim Krasniqi, U.D. drejtor i DPUMM, theksoi, veç se u miratua përbërja e këshillit të fshatrave Ballofc, Herticë, Surdull, Rakinicë, Turuqicë, tash nëse doni edhe njëherë miratojeni këtë për mos me qenë një këshill, nuk i di procedurat tjera saktësisht por ky këshill u miratua më parë.

Kryesuesi i Kuvendit, theksoi, mirëpo tani kemi një propozim nga këshilltarja znj.Drita Pajaziti që fshati Turuqicë të kaloj në këshillin lokal të fshatrave; Orllan-Muhazob-Metergoc-Bllatë-Bërvenik-Kalaticë-Brainë-Kushevicë.

z.Ekrem Rrahmani, theksoi, i nderuari Kryesues a po bindeni tani se keni gabuar që se keni dërguar materialin, nga grupi i këshilltarëve të LVV-së kanë qenë dy anëtar në komision ndërsa kanë qenë të ftuar 3 drejtor prej tyre njëri nuk ka marrë pjesë në grupin punues, këta është dashur të dakordohen dhe t'ia dërgojnë materialin anëtarëve të grupit punues asamblesë dhe grupeve të këshilltarëve të subjekteve politike të përfaqësuara në kuvend.

Ne mbajmë takime para fillimit të mbledhjes së Kuvendit dhe është dashur t'ju shpjegojmë kolegëve se si është bërë ndarja e këshillave lokale të fshatrave vendbanimeve dhe lagjeve urbane sepse tani kemi dy propozime për përfshirjen e fshatit Turuqicë në dy këshilla të fshatrave.

Kryesuesi i Kuvendit, theksoi, materiali ka ardhë si propozim këtu për këtë arsye ai mund të ndryshoj sepse këtu në kuvend vendoset për këtë çështje.

z.Naim Çunaku, theksoi, që në fillim thash se jemi duke i shkaktuar veti telash se ju i nderuari kryesues keni qenë ai që e keni potencuar disa herë që ta ndërtojmë një unitet mes grupeve të këshilltarëve subjekteve politike të përfaqësuar në këtë kuvend dhe mos të hapim debate rresht rreth këshillave të fshatrave vendbanimeve dhe lagjeve urbane se po humbim kohë me propozime të ndryshme pa dashur t'ia cungoj dikujt ndonjë të drejtë se të gjithë e kanë atë të drejtë por kur të bëhet një dakordim ai duhet të vlejë dhe ju i nderuari kryesues keni qenë zëri kryesor që ta kemi atë dakordim kurse tani ju po e hapni mundësinë për atë që e ceku parafolësi im z.Ekrem Rrahmani dhe parafolësi i tij z.Qendrim Softolli se kemi hy në një mbledhje të pa përgatitur prandaj mos të hapim debat më tutje por të vazhdojmë dhe ta arrijmë unitetin, ka ndodhur çfarë ka ndodhur për këtë seancë të pa përgatitur por ta kalojmë edhe këtë.

znj.Antoneta Ejupi, U.D. drejtoresh e DA-së, theksoi, sa i përket materialit edhe njëherë po e theksoi që është vetëm vazhdimi i seancës të datës 30.06.2022, nuk kemi bazë ligjore për ta përcjellë materialin paraprakisht sepse është vetëm vazhdim i seancës.

z.Naim Çunaku, theksoi, me gjithë respektin znj.drejtoreshë e DA-së, të gjithë ata që kanë marrë pjesë në atë punëtori, në fund të gjithë kemi dalë kemi vazhduar rrugën për në shtëpi dhe asnjëri nga ne nuk ka pasë dokumentacion të shkruar, keni mundur materialin mos me ia dërgua kuvendarëve nëse ju ashtu keni menduar por të paktën ne anëtarët e grupit punues është dashur të pajisemi me material për atë që jemi dakorduar. Për materialin shtesë po e marrë një shembull se si të gjithë ne e marrim materialin për seancë shkojmë në mbledhjen e KPF-së, dhe qëndrimet e mbledhjes së KPF-së prapë iu dërgohen anëtarëve të kuvendit kështu që e njëjta formë është dashur të përdoret edhe këtu, si do që të jetë kjo ka ndodhur dhe nuk dua të kthehem prapa dhe kjo formë të vazhdoj kështu.

z.Kasib Bashota, theksoi, ne ishim në atë takim dhe u dakorduam që këto propozime t'i harmonizojmë dhe t'i sjellim në kuvend për miratim tash dikush mund të mendoj për një çështje ndryshe mirëpo ne aty jemi munduar që ta bëjmë zgjidhjen më të mirë dhe është mirë që të votohet kjo si pako ashtu siç jemi dakorduar i nderuari kryesues dhe ju anëtar tjerë të kuvendit se kemi bërë zgjidhjen më të mirë dhe kemi diskutuar 4 ose 5 orë, secila çështje mund të ketë ndonjë paqartësi dhe të gjitha këto mund të nxjerrin telashe për ndonjë këshill të fshatrave vendbanimeve dhe lagjeve urbane mirëpo ne këto i harmonizuem dhe të gjitha propozimet prej të gjitha lokaliteteve i përafuam si gjeografikisht ashtu edhe sipas numrit të banorëve dhe për këtë ne jemi dakorduar njëherë andaj besoj se për këtë çështje duhet të shkojmë në votim.

z.Haki Rudari, theksoi, i nderuari z.kryesues dua të sqaroj diçka komisionet, grupet punëtorit nuk e kanë të drejtën për të marrë vendime, vendim ka të drejtë të marrë vetëm kuvendi komunal dhe këshilltarët këtu, atje mund të ketë propozime por çfarë propozimesh janë bërë ne se dimë se s'kemi qenë pjesë e atij grupi punues por mendoj se është plotësisht e drejtë legjitime që këshilltarët sipas ligjit dhe rregullores të bëjnë propozimet e tyre prandaj edhe këtu nuk pat shumë propozime.

Numrin e këshillave lokale të fshatrave vendbanimeve dhe lagjeve urbane askush nuk e kërkon që të rritet por kemi 3- 4 propozime që disa fshatra të kalojnë nga një këshill loakl i një fshate në një këshill lokal të një fshati tjetër krejt në rregull është kjo, ishte propozimi i koleges që një fshat të kalojë në këshillin e fshatrave të Orllanit, ishte propozimi që fshati Ballofc të kalojë në këshillin e fshatrave të Herticës kurse fshati Lladof dhe Shajkofc të jenë në një këshill lokal.

Këshilltarët kanë të drejtën e tyre të propozojnë dhe të marrin vendime, komisionet, grupet dhe punëtoritë ato bëjnë vetëm rekomandime, ata mund të rekomandojnë por kuvendi merr vendim.

z.Naim Çunaku, theksoi, nuk po flasë me qëllim të replikës por mos ta deformatojmë debatin sepse nga asnjë folës në këtë kuvend nuk dëgjova që të ketë thënë se ne kemi marrë vendim në punëtori, asnjëri nga ne nuk tha që kemi marrë vendim por kemi arritur dakordancë, dakordimi dhe vendimi nuk janë të njëjta sepse të gjithë ne këtu e dimë se kush merr vendim.

Kryesuesi i Kuvendit, theksoi, ne nuk ia kemi muhar askujt të drejtën këtu që mos të bëjë propozime, ne jemi munduar që t'i përafrojmë qëndrimet dhe këto qëndrime i kemi ofruar mes veti siç po shihet këtu rreth 90%, edhe pse ka propozime të reja unë nuk po shohë asgjë të keqe sepse nuk është njësoj kur bisedojnë 10 persona dhe 35 persona, andaj unë po shohë që këto propozime kanë qëllimin më të mirë që mos të kemi telashe në zbatimin e kësaj rregulloreje në terren, njëri ndër propozuesit e parë në këtë mbledhje ishte këshilltari i nderuar z.Naim Çunaku andaj mos të humbim kohë më shumë por të vazhdojmë tutje.

z.Naim Çunaku, theksoi, i nderuari kryesues është e vërtetë se unë i pari bëra propozim dhe hapa debatin rreth kësaj çështje sepse ju së bashku me ne në atë punëtori dhe i gjithë grupi u dakordua për atë propozimin që e bëra unë dhe këtë propozim nuk e ke marrë parasysh edhe pse jemi dakorduar në punëtori dhe një dakordim të asaj punëtorie e propozova këtu.

I nderuari Kryesues propozimin e bërë nga unë e keni pranuar në formë të shkruar dhe keni heshtur sepse ky propozim i është adresuar këshilltarëve të kuvendit komunal, kryesuesit të kuvendit, kryetarit të komunës, dhe të gjithë ju e keni pranuar këtë propozim në formë të shkruar elektronike.

z.Florent Hasani, theksoi, kam një pyetje për drejtorin e DPUMM-së dhe drejtoreshën e DA-së, nëse një fshat është i pa banuar a duhet të jetë i përfaqësuar në këshill lokal.

znj.Antoneta Ejupi, U.D. drejtoresh e DA-së, theksoi, sipas udhëzimit administrativ përcaktohet se çdo fshat duhet të jetë i përfaqësuar në këshill lokal të fshatrave ose lagjeve urbane pavarësisht se a ka banorë ose jo sepse ne nuk mund t'ia mohojmë një të drejtë ndonjë qytetari që të kthehet të jetojë në fshatin e tij prej ndonjë fshati tjetër apo prej qyteti për këtë arsye secili fshat duhet të jetë i përfshirë në këshill lokal.

Kryesuesi i Kuvendit, theksoi, kemi mbetur te propozimi i këshilltares znj.Drita Pajaziti.

znj.Drita Pajaziti, theksoi, unë qëndroj prapa asaj që fshati Turuçicë gjithëherë ka qenë pjesë e bashkësisë së fshatit Orllan dhe mendoj se edhe tani duhet të jetë pjesë përbërëse e këshillit lokal të fshatit Orllan dhe tani mora kritika nga banorët e fshatit Turuçicë që janë kundër të jenë pjesë përbërëse e ndonjë këshilli lokal të ndonjë fshati tjetër përpos këshillit të fshatit Orllan, kështu që propozoj që fshati Turuçicë të jetë pjesë përbërëse e këshillit të fshatit Orllan.

z.Florent Hasani, theksoi, për mos me tejkaluar normën apo numrin e këshillave të fshatrave që është përcaktuar në bazë të udhëzimit administrativ kisha propozuar që fshatrat Lluzhan, Llugë, Sallabajë, Godishnjak, Sallabajë, të jenë në një këshill ose fshatrat e pjesës së sipërme të Komunës së Podujevës si Revuç, Pakashticë e Poshtme, Pakashticë e Epërme, Repë, të jenë një këshill kurse në gollak të kemi ndarje të dy këshillave psh të kemi një këshill të veçantë të fshatrave Turuçicë, Rakinicë, Muhazob, Metergofc, dhe fshati Orllan të jetë një këshill me fshatrat tjerë.

z.Leutrim Krasniqi, U.D. drejtor i DPUMM, theksoi, sa i përket propozimit që fshati Turuçicë t'i bashkohet këshillit lokal të fshatit Orllan në bazë të numrit të këshillave ka të drejtë mirëpo në anën tjetër atëherë fshatin Rakinicë po e lëmë pa kontakt gjeografik me fshatrat Herticë dhe Ballofc, kurse sa i përket propozimit të këshilltarit z.Florent Hasani për të krijuar numër më të madh të këshillave të fshatrave në pjesën e Orllanit ne e kemi analizuar këtë dhe në atë pjesë kemi një numër të vogël të banorëve dhe vetëm një këshill mjafton për këtë hapësirë mirëpo nëse ne tani krijojmë këshillin e fshatrave Lluzhan, Llugë, Sallabajë, Godishnjak, është numër mjaftë i madh dhe me numër të banorëve dhe në fund unë kam një sugjerim për të gjithë ju para se të votoni mendoni se a është e drejtë kjo ndarje apo s'është e drejtë sepse nuk është e thënë se funksionon ajo që propozohet.

z.Ardi Hasani, theksoi, dua t'i bashkëngjitëm propozimit të z.Florent Hasani, që fshati Llugë të jetë pjesë e këshillit të fshatrave Bellopojë, Halabk, Tërnavë, në mënyrë që ta krijojmë edhe një këshill në zonën e gollakut.

z.Naim Çunaku, theksoi, kjo është e tepërt i nderuari kryesues kur diskutohet për një lokalitet që s'kanë të bëjnë asgjë me të e që unë vij nga ai lokalitet.

Kryesuesi i Kuvendit, theksoi, ne dëgjuam disa propozime që të ketë lëvizje të një fshati nga një këshill në një këshill tjetër, vetëm te propozimi i këshilltares znj.Drita Pajaziti do ta bëjmë një ndryshim dhe te propozimi i këshilltarit të z.Florent Hasani që hekurudha të jetë vijë ndarse në mes të këshillave urbane.

z.Xhevdet Maloku, theksoi, fillimisht po më vjen shumë çudi prej kolegut z.Naim Çunaku që thirret shumë në rregullore por tani e merr fjalën pa iu dhënë të lutem z.Naim isha parafolës para teje respektoje rendin.

Sa i përket propozimit që të jetë një këshill lokal i fshatrave Lluzhan, Llugë, Shakovicë, Godishnjak, po ashtu të ndahet fshati Llugë, Penuhë dhe fshati Lluzhan me fshatin Godishnjak në një këshill prapë këto nuk qëndrojnë kjo dihet se këto fshatra kanë numër të madh të banorëve dhe le të mbeten kështu siç janë, nëse do të ketë propozime tjera unë nuk e di por këshilli lokal i fshatrave Lluzhan, Llugë qëndrojnë shumë mirë si dhe këshilli lokal i fshatrave Sallabajë, Godishnjak, Shakovicë, besoj se në këto këshilla lokale të fshatrave nuk ka nevojë të bëhet ndërhyrje sepse unë dhe kolegu im z.Naim Çunaku jemi banorë të asaj ane dhe jemi dakord për këtë.

Kryesuesi i Kuvendit, theksoi, propozime tjera ne nuk mund të marrim sa i përket ndryshimeve të këshillave lokale të fshatrave, ne kemi mundur të propozojmë kalimin e një fshati nga një këshill në një këshill tjetër por ne ende nuk e kemi dhënë vendimin përfundimtar, mirëpo kur unë kam kërkuar nga shefat e grupeve të këshilltarëve të subjekteve politike të përfaqësuara në këtë Kuvend ju nuk u pajtuat që të jepet pëlqimi dhe ky dokument të kaloj në votim, sa i përket propozimeve unë i mbështes propozimet e znj.Drita Pajaziti dhe z.Florent Hasani.

znj.Drita Pajaziti, theksoi, kam një pyetje për drejtorin e DPUMM-së, se a është e kundërligjshme bashkimi i fshatit Turuçicë në këshillin lokal të fshatrave; Orllan-Muhazob-Metergoc-Bllatë-Bërvenik-Kalaticë-Brainë-Kushevicë,kurse fshati Rakinicë të kaloj në këshillin lokal të fshatrave Ballofc, Herticë, Surdull.

z.Ragip Fetahu, theksoi, mënyra se si po vihen në votim këto propozime nuk është në rregull sepse së pari fjalën duhet të ia japësh drejtorit se a janë ato propozime konform atyre pikave të rregullores dhe udhëzimit administrativ dhe a përputhen ato fshatra territorialisht dhe gjeografikisht mes veti para se të dalin ato propozime në votim, ne po votojmë diçka që se dimë çka po votojmë, pastaj ato vendime duhet t'i rikthejmë edhe një herë për shfuqizim dhe kështu po vazhdon 24 h seanca e kuvendit, kam një kërkesë për ju z.kryesues sepse ka 30 minuta deri më tani që kam kërkuar fjalën mirëpo kjo kërkesë e imja deri më tani nuk është marrë parasysh.

z.Leutrim Krasniqi, U.D. drejtor i DPUMM, theksoi, sa i përket pyetjes rreth propozimit tuaj znj.Drita Pajaziti një gjë e tillë ligjërisht nuk është e ndaluar po është propozim jo i përshtatshëm dhe jo praktik për shkak se po mbetet fshati Rakinicë, së fundi për këtë çështje ju asambleja e kuvendit vendosni jo unë.

znj.Drita Pajaziti, theksoi, meqenëse kërkesë e banorëve të fshatit Turuçicë është që ky fshat të kaloj në këshillin lokal të fshatrave Orllan-Muhazob-Metergoc-Bllatë-Bërvenik-Kalaticë-Brainë-Kushevicë, unë këtë po e kërkoj që kjo kërkesë e tyre të realizohet.

Kryesuesi i Kuvendit, theksoi, atëherë propozimin e znj.Drita Pajaziti që fshati Turuqicë të kaloj në këshillin lokal të fshatrave; Orllan-Muhazob-Metergoc-Bllatë-Bërvenik-Kalaticë-Brainë-Kushevicë.

Pas votimit, Kryesuesi i Kuvendit konstatoi se njëzëri, me 21 PËR nga anëtarët e Kuvendit sa ishin prezent në sallë, mbështet propozimi që fshati Turuqicë të kaloj në këshillin lokal të fshatrave; Orllan-Muhazob-Metergoc-Bllatë-Bërvenik-Kalaticë-Brainë-Kushevicë.

znj.Sebastina Vokrri, theksoi, kam një propozim sa i përket nenit 19 të kësaj rregulloreje ku thuhet anëtarët dhe kryetarët e këshillave lokale të fshatrave vendbanimeve apo lagjeve urbane zgjedhën me mandat 4 vjeçar me mundësi rizgjedhje edhe për një mandat sipas procedurave të njëjta, unë kisha propozuar që zgjedhja e kryetarëve të jetë me rotacion 6 muaj ose 1 vit pastaj të bëhet rizgjedhja e kryetarit të fshatrave vendbanimeve apo lagjeve urbane.

z.Arjant Topanica, theksoi, sa i përket propozimit të koleges znj.Sebastina Vokrri këtë e kemi diskutuar paraprakisht sa është e mundshme kjo por problemi ka qenë se për tu zgjedhur një kryetar i këshillave lokale të fshatrave vendbanimeve apo lagjeve urbane duhet të thirret kuvendi andaj me delegacion nuk mund t'ia delegosh kompetencat e kryetarit diku tjetër por kryetarin duhet kuvendi me zgjedh dhe po më duket jo e arsyeshme për çdo vit me thirr kuvend zgjedhor për rizgjedhje të kryetarit të këshillave lokale të fshatrave vendbanimeve apo lagjeve urbane ky ishte problemi i rotacionit që e kemi diskutuar që në fillim, si ide parimisht është e mirë për shkak të lidh mërisë së fshatrave por për shkak të realizueshmërisë është e pa mundur se çdo herë duhet të thirren kuvendet për zgjedhjen e kryetarëve të këshillave lokale të fshatrave vendbanimeve dhe lagjeve urbane.

znj.Sebastina Vokrri, theksoi, faleminderit për sqarimin i nderuari koleg z.Arjant Topanica, mirëpo unë mendoj se periudha kohore prej 1 viti nuk është periudhe e shkurt sepse ka mundësi që të mblidhen këshillat lokale të fshatrave vendbanimeve dhe lagjeve urbane andaj propozoj që përzgjedhja e tyre të bëhet për periudhën kohore 6 muaj ose 1 vit.

znj.Antoneta Ejupi, U.D. drejtoresh e DA-së, theksoi, faleminderit për sugjerimin e nderuara këshilltare znj.Sebastina Vokrri, ne të gjithë po pajtohemi që propozimi juaj është shumë praktik mirëpo kemi një udhëzim administrativ i cili përcakton zgjedhjen dhe mandatin e kryetarit të këshillave lokale të fshatrave vendbanimeve dhe lagjeve urbane, në këtë rast ne nuk mundemi të propozojmë diçka ose të miratojmë diçka që është në kundërshtim me udhëzimin administrativ.

z.Florent Hasani, theksoi, propozimi im ishte që këshilli lokal urban qendra 6 shtrirjen në veri ta ketë deri te hekurudha si vijë ndarëse me këshillin lokal urban qendra 4 dhe në jug perëndim prapë shtrirja të jetë deri te hekurudha si vijë ndarëse me këshillin lokal qendra 2.

Kryesuesi i Kuvendit, theksoi, atëherë propozimin e z.Florent Hasani që këshilli lokal urban qendra 6 shtrirjen në veri ta ketë deri te hekurudha si vijë ndarëse me këshillin lokal urban qendra 4 dhe në jug perëndim prapë të jetë hekurudha si vijë ndarëse me këshillin lokal qendra 2.

Pas votimit, Kryesuesi i Kuvendit konstatoi se njëzëri, me 23 PËR nga anëtarët e Kuvendit sa ishin prezent në sallë, mbështet propozimi që këshilli lokal urban qendra 6 shtrirjen në veri ta ketë deri te hekurudha si vijë ndarëse me këshillin lokal urban qendra 4 dhe në jug perëndim prapë të jetë hekurudha si vijë ndarëse me këshillin lokal qendra 2.

Kryesuesi i Kuvendit, theksoi, besoj se debati rreth kësaj pike të rendit të ditës ka përfunduar sepse lidhur me këtë çështje kemi debatuar edhe në seancën e kaluar dhe kemi marrë propozime të cilat janë të mirëseardhura, propozime këto me qëllimin më të mirë që kjo rregullore të jetë e aplikueshme.

Andaj për mos të humbur kohë më shumë e vë në votim Rregulloren për organizimin dhe bashkëpunimin e Komunës me fshatra, vendbanime dhe lagje urbane në territorin e Komunës së Podujevës, sipas draftit përkatës të prezantuar më 30 qershor 2022 dhe plotësim ndryshimeve të prezantuara dhe të shpërndara sot në fillim të vazhdimit të seancës nga Drejtoria e Administratës dhe Drejtoria e Planifikimit Urban dhe Mbrojtjes së Mjedisit, me theks përshkrimet në paragrafët 1.1 deri në 1.6 të nenit 4 përfshirë edhe shtojcat e Rregullores përkatëse, si dhe propozimeve të paraqitura dhe miratuara nga ana e anëtarëve të Kuvendit të Komunës.

Pas votimit, Kryesuesi i Kuvendit konstatoi se nga 24 anëtarë/e të Kuvendit sa ishin prezent në sallë, me 23 vota PËR, 1 votë KUNDËR dhe asnjë votë të përmbajtur, miratohet Rregullorja për organizimin dhe bashkëpunimin e Komunës me fshatra, vendbanime dhe lagje urbane në territorin e Komunës së Podujevës, sipas draftit përkatës të prezantuar më 30 qershor 2022 dhe plotësim ndryshimeve të prezantuara dhe të shpërndara sot në fillim të vazhdimit të seancës nga Drejtoria e Administratës dhe Drejtoria e Planifikimit Urban dhe Mbrojtjes së Mjedisit, me theks përshkrimet në paragrafët 1.1 deri në 1.6 të nenit 4 përfshirë edhe shtojcat e Rregullores përkatëse, si dhe propozimeve të paraqitura dhe miratuara nga ana e anëtarëve të Kuvendit të Komunës.

10. Të Ndryshme

z.Artrit Mulliqi, theksoi, kam një pyetje për ekzekutivin që ka të bëj me varrezat e qytetit sepse ekziston një thënie popullore që para se t'i ndërtojmë shtëpitë tona duhet ta dimë se ku i kemi varret tona, qyteti i Podujevës është në një gjendje kaotike në qoftë se brenda një periudhe shumë të shkurtër kohore nuk bëhet një zgjidhje për varrezat e qytetit ne shumë shpejt nuk do të kemi vend se ku t'i varrosim të afërmit tanë.

Lidhur me këtë kërkoj një përgjigje nga ekzekutivi nëse është e mundshme, e di se kanë filluar procedurat nga ekzekutivi për caktimin e lokacionit për varrezat e qytetit por dua ta di se deri ku kanë shkuar këto procedura sepse e di që edhe në të kaluarën kjo procedurë ka filluar në kohën kur ekzekutivin e ka udhëhequr LDK-ja, që nga vitii 2008, mirëpo deri më tani nuk është bërë asgjë konkrete në këtë drejtim.

znj.Edona Shabani, theksoi, edhe pse drejtorët e drejtorive përkatëse nuk janë të pranishëm unë desha t'i bëjë disa pyetje ose t'i jap disa sugjerime, desha të lidhem në temën sa i përket realizimi të projekteve të fshatrat nga vij unë si Shtedim, Mirofc, Ballofc, në fshatin Shtedim janë ndërpre projektet sa i përket shtrirjes së rrjetit të ndriçimit publik për shkaqe politike, gjithashtu në fshatin Mirofc është ndërpre ky projekt në gjatësi 1000 m dhe asfaltimi i rrugëve në gjatësi 400m, rruga në fjalë është "Ganimete Miftar Hajdari", ndërsa në fshatin Shtedim është ndërpre asfaltimi i rrugës në gjatësi 700m, rruga quhet "Luigj Gurakuqi".

Sa i përket fshatit Ballofc është devijuar shtrirja e rrjetit të ndriçimit publik nga rruga kryesore për në rrugë dytësore si dhe mungojnë trotualet në pjesën e sipërme të fshatit ku rrezikohet siguria e nxënësve të cilët në mungesë të trotuarit detyrohen të ecin rrugës dhe nuk kanë të siguruar transportin publik. Gjithashtu kemi edhe nënshkrime të peticioneve sa i përket ndërtimit të fabrikës në fshatin Mirofc që e kundërshtojnë ndërtimin e saj madje edhe ngritje të kallëzimeve penale, për të gjitha këto a mundet dikush të na japë ndonjë shpjegim edhe pse nuk janë drejtorët prezent për të gjitha këto unë pres shpjegime.

z.Adnan Zymeri, theksoi, arsyja pse sot unë po e marr fjalën është për një komunikim që kam pasë ta bëjë me kryetarin meqenëse kryetari nuk qenka prezent këtu si përfaqësuese e tij nga radhët e ekzekutivit është nënkryetaria e komunës, diskutimi im ka të bëjë me një vendim që e ka nxjerrë kryetari për lejin e hapësirave të komunës për bashkatdhetarët tanë që në prizmin tim është vendim i mirë në shenjë mirëseardhje për kontributin e tyre që e gëzojmë për ta por përkundër kësaj përveç këtij benefiti sa do simbolik që ua kemi dhënë gjatë diskutimeve dhe takimeve që i kemi me qytetarët rezident të Komunës së Podujevës ata kanë pakënaqësi dhe e konsiderojnë padrejtësi goxha të madhe që atyre nuk iu lejohet shfrytëzimi i të njëjtës hapësirë që iu lejohet mërgimtarëve në këtë periudhë kohore.

Nëse ekziston vullneti e di që mundet me pas modalitete për ta zgjidhur këtë çështje se nëse nuk na pengon oborri i Komunës i mbushur me vetura në këtë periudhë kohore sa janë në pushime mërgimtarët se di pse mund të na pengojë kjo çështje në periudhat tjera kohore kur nuk janë mërgimtarët në pushime, kjo nëse nuk është e lejuar për një periudhë kohore më afatgjatë p.sh mundet oborri i Komunës të shfrytëzohet për 15-20 minuta nga qytetarët të cilët janë me veturë dhe kanë nevojë për kryerjen e shërbimeve të ndryshme komunale atëherë ata qytetarë duhet të paguajnë për parkim të veturës në vlera të caktuara në treg.

Përveç qytetarëve edhe anëtarët e asamblesë komunale nuk e kanë kurrfarë mundësie që ta shfrytëzojnë parkingun e komunës përderisa e njëjta gjë ndodh për drejtorët e drejtorive të komunës dhe nuk e di pse një drejtor ka të drejtë ta shfrytëzojë parkingun e komunës për veturën e tij kurse një asamblist mos ta ketë këtë të drejtë por para asamblistëve po e them se poenta kryesore e këtij propozimi është që të jepet në shfrytëzim afatgjatë parkingu i komunës për qytetarët rezident në Komunën e Podujevës.

z.Xhevdet Maloku, theksoi, për arsyen e vendosjes së flamurit të KF.Llapi në foltore kam një sqarim dhe ky sqarim nuk ka të bëjë me ligjëratë se sa e duam KF.Llapin se kjo gjë dihet se KF.Llapi duhet nga të gjithë ne dhe për këtë kam një thirrje për DKRS-në që të gjejë alternativa që ta ndihmojë këtë klub i cili na përfaqëson dhe na bënë krenar, kështu që të gjinden forma të ndryshme që ta përkrahim KF.Llapin dhe ta ngrisin në nivelet më të larta.

z.Ekrem Rrahmani, theksoi, edhe pse nuk janë prezent drejtorët e drejtorive ne po i parashtrojmë disa pyetje që kanë të bëjnë me disa çështje një ndër to është edhe ajo e mirëmbajtjes së mbeturinave po flas për pjesën e fshatrave Gllamnik, Sibofc, Lluzhan ku kompania e kontraktuar nuk e kryen shërbimin e saj me kohë ashtu siç ka qenë ditën e enjte dhe nuk kemi marrë kurrfarë njoftimi apo arsyetimi lidhur me vonesën e saj dhe mos kryerjen e shërbimi.

Një çështje tjetër është edhe ndërtimi i trotuarit në të cilin janë bërë punime deri në ditën e zgjedhjeve në muajin tetor dhe në ditën e zgjedhjeve janë ndërprerë punimet mirëpo tani ai ka mbete i pa përfunduar dhe për ndërtimin e këtij trotuari ne nuk e dimë se kush ka qenë menaxher i tij dhe në bazë të cilit projekt realizohet ai dhe për këtë ne duam sqarime se a i janë ndarë mjetet kontraktorit dhe se i njëjti a i ka marrë ato mjete dhe pse ka mbetur i pa përfunduar ai projekt apo ky projekt është i paraparë tani në projekt buxhet dhe parashihet vazhdimi i tij.

Sa i përket ndriçimit në fshatin Sibofc njëherë e ka goditur rrufeja atë rrjet dhe më asnjëherë nuk ka funksionuar dhe askush nga komuna nuk ka ardhë e të shikojë se ku është defekti që nuk funksionon ai ndriçim dhe ne nuk e dimë atë defekt se a është si shkak i rrufesë apo djegies së trafos, ai rrjet i ndriçimit publik fizikisht ditën duket shumë bukur po natën nuk funksionon dhe i tërë fshati ka mbete në errësirë.

z.Arjant Topanica, theksoi, shqetësimin e njëjtë e kam edhe unë sa i përket ndriçimit publik për arsye se kam marrë shqetësime të shumta që nuk dihet se a është ndriçimi i cilësisë së dobët sepse pas shtrirjes së rrjetit të ndriçimit publik menjëherë fillon mosfunksionimi i tij si pasojë e defekteve, sa i përket shtrimit të trotuareve meqenëse drejtori i DSHPMSHP nuk qenka këtu po e theksoi se kisha pasur dëshirë që kur ka projekte nga lokalitetet të cilat vijmë ne asamblistët do të ishte e rrugës që të konsultohet dhe dakordohet me ne paraprakisht për pjesën e rrugës apo të trotuarit se kah është me më

prioritet për qytetarët për arsye se jemi përfaqësues të lokaliteteve të caktuara mundemi me i ditë edhe me i njohtë problemet kërkesat dhe prioritetet që i përkasin atyre.

Një shqetësim të shkurt po e ngrisë sa i përket rr.”Skenderbeu”, meqenëse është projekt në realizim dhe kisha dashur një sqarim prej drejtorit pse kanë filluar punimet në këtë periudhë kur dihet se muajt korrik dhe gusht janë muajt më të ngarkuar të vitit dhe kemi pasur shumë shqetësime se nëse ajo rrugë bllokohet për hyrje në qytet do të stërngarkohet rruga “Zahir Pajaziti” dhe nuk e di se si do të funksionoj duke e ditur se edhe bashkatdhetarët tanë tani janë në pushime në vendlindje.

z.Valon Demolli, theksoi, fillimisht dua të ndërlihem me një shqetësim që po paraqitet në qytetin tonë nga shitësit ambulant që veprimtarinë e tyre po e zhvillojnë në shesh dhe ankesat e tyre nuk po merren parasysh andaj kërkojmë nga drejtoritë përkatëse që të gjejnë forma dhe të mundësojnë operimin e tyre dhe mos të trajtohen me përbuzje, në të gjithë botën ka sheshe ku shitësit ambulant zhvillojnë veprimtarinë e tyre andaj kërkojmë që të merren praktika më të mira dhe tu bëhet një zgjidhje këtyre, mos të mbyllen sytë për ato biznese që uzurpojnë prona publike dhe po tregohet forcë te njerëzit që sigurojnë bukën e gojës me këtë aktivitet.

znj.Marigona Lahu, Nënkryetare e Komunës, theksoi, po mundohem të përgjigjem në disa prej pyetjeve të cilat ju i parashtruat mirëpo për informata më të sakta ju kisha lutur që t’i drejtoheni drejtorive përkatëse, po përgjigjem në pyetjen e parë të këshilltarit z.Artrit Mulliqi e cila ka të bëjë me varrezat e qytetit.

Ne si Komunë kemi ndarë një lokacion për varrezat e qytetit mirëpo jemi në fazën përfundimtare të procedurave të shpronësimit për sipërfaqen të cilën e kemi destinuar për varreza të qytetit së bashku me varrezat e qytetit janë edhe disa parcela të cilat i nevojiten Komunës dhe janë në fazën e procesit të shpronësimit.

Sa i përket parkingut të Komunës po ndalem te pjesa e parkingut për asamblastët, që besoj se është shumë e drejtë që asamblastët ta shfrytëzojnë parkingun e komunës dhe për këtë çështje së bashku me drejtoreshën e DA-së do të shohim mundësinë se si ta procedojmë, sa i përket qytetarëve për shfrytëzimin e parkingut në hapësirat e Komunës ne kemi marrë këtë vendim se e dimë që gjatë muajve të verës kemi qarkullim të madh të veturave në qytet dhe rrugët bllokohen, tani jemi në procesin e fundit të hartimit të planit të mobilitetit i cili shumë shpejtë do të dal në kuvend për aprovim plan ky i cili do ta zgjidhë çështjen e parkingut, gjithashtu edhe për parkingun nëntokësor kemi filluar procedurat për realizimn e tij.

Sa i përket pjesës së financimit të KF Llapi, Komuna e Podujevës gjithherë publikon shpalljen për financimin e klubeve sportive mirëpo KF. Llapi është klub më specifik për shkak se është klub i cili garon në garat e super ligës dhe realisht financohet përmes FFK-së, ne e kemi mbështetë KF Llapin me mundësitë tona kur do që kemi pasur hapësirë, vitin e kaluar i kemi nda 10,000.00€ , për KF Llapin mjete për të cilat kemi marrë vërejtje në raportin e auditorit, kështu që kurdo që i kemi mundësitë financiare ne e mbështesim jo vetëm KF Llapin por secilin klub i cili ka sukses dhe e përfaqëson Komunën tonë.

Sa i përket shitësve ambulant është krijuar një vijë e shitjes për ata shitës ambulant të cilët fatkeqësisht atë vijë nuk janë duke e respektuar, unë kam qenë vetë ai person që jam marrë me këtë çështje mirëpo jam takuar me ata shitës dhe të njëjtët nuk e respektojnë vijën të cilën ua ka përcaktuar komuna dhe janë duke i shkakuar disa probleme, mirëpo ne jemi në kontakt të vazhduar me ta, këto ishin disa përgjigje të pyetjeve tuaja për pjesën e infrastrukturës rrugore iu përgjigjet drejtori i DPUMM-së kurse për pyetjet tjera drejtorët e drejtorive përkatëse.

z.Leutrim Krasniqi, U.D. drejtor i DPUMM, theksoi, sa i përket pjesës që u përmenden tri fshatrat Shtedim, Mirofc, Ballofc, për fshatin Shtedim është një kontratë e vitit 2021 që është kontratë dy vjeçare dhe momentalisht ne po kemi probleme me operatorët e caktuar për shkak të ngritjes së çmimeve për këtë arsye është një rrugë që gjendet në fshatin Shtedim e që besoj që do të kemi komoditetin edhe prej kompanive që të fillojmë asfaltimin e saj e sidomos për të gjitha kontratat që janë lidhur në vitin e kaluar.

Çështja e fabrikës në fshatin Mirofc, sa i përket kësaj fabrike peticioni i cili është ngritur, është ngritur pas lëshimit të kushteve ndërtimore, për të marrë leje ndërtimore fillimisht lëshohen kushtet ndërtimore pastaj vjen leja ndërtimore, kështu që fabrika në momentin që i kompletton kushtet vjen dhe aplikon për leje mirëpo momentalisht ka 3 ose 4 muaj që është në proces të përmbushjes së kushteve dhe në qoftë se i përmbush kushtet normalisht që po, komuna e ka për obligim pjesën, strukturën si objekt për ta lëshuar lejen kurse sa i përket ndotjes që është një shqetësim kryesor për banorët është pëlqimi mjedisor që lëshohet prej Ministrisë së Mjedisit dhe Planifikimit Hapësinor.

Në rast se Ministria e Mjedisit dhe Planifikimit Hapësinor e sheh të arsyeshme se ajo fabrikë nuk e ndotë ajrin ajo atëherë merr një vendim, mirëpo edhe peticionin që e kanë ngritë banorët unë e kam dërguar në Ministrinë e Mjedisit dhe Planifikimit Hapësinor që edhe ata ta kenë parasysh peticionin ose më saktë shqetësimin që e kanë banorët për këtë fabrikë.

Çështja tjetër që ka të bëjë me rr.”Skenderbeu”, tashmë edhe pse është koha kur në vendlindje vijnë bashkatdhetarët dhe qarkullimi i qytetarëve është më i madh në të njëjtën vijë është edhe koha kur punohet, ne e dimë këtë aspekt mirëpo duke marrë parasysh këtë gjë dhe procedurat që duhet të ndjekim së bashku me operatorin në fjalë që është përcaktuar si kontraktor punimet do të realizohen në disa faza me të vetmin qëllim mos pengimin e qarkullimit të qytetarëve, mirëpo bëjë thirrje publike që të gjithë qytetarët të shfrytëzojnë rrugë alternative e jo çdo herë ta ndjekin atë rrugë sepse janë duke u zhvilluar punime dhe ka një pengesë në këtë drejtim.

Dua të ndërlihem edhe me çështjen e shitësve ambulant edhe pse pak a shumë e potencoi edhe Nënkryetarja e Komunës znj.Marigona Lahu, DPUMM me kërkesë të DSHPMSh ka përcaktuar hapësirën ku do të qëndrojnë shitësit ambulant që është një pozitë e favorshme mirëpo në raste të caktuara atyre nuk po iu pëlqen ajo pozitë e shitjes dhe po dalin jashtë kësaj mirëpo nuk qëndron fakti se këta shitës nuk i ka marrë parasysh komuna por ka caktuar një hapësirë për ta që për mendimin tim është një hapësirë mjaftë e favorshme.

Kryesues i Kuvendit e konstaton të përfunduar këtë mbledhje.

Mbledhja përfundoi në orën 12:35

Procesverbalin e mbajti

Osmon Bajrami

Nr.prot.01-060/04-0058143/22

Podujevë,

30 qershor 2022, e ndërprerë

15 korrik 2022, e përfunduar

Kryesuesi i Kuvendit

Hilmi Hoxha